

BAGIAN II.
TAON 1905-1914

I

TJABANG - TJABANG T. H. H. K. : JANG BAROE DAN JANG BERDIRI SENDIRI.

DENGEN tjepeet di dalem taon-taon brikoeftja di sana-sini ada berdiri Hoen Kiok-Hoen Kiok dari T. H. H. K.

Tjabang T. H. H. K. di Tanah-Abang diberdiriken oleh 17 pendoedoek di dalem vergadering jang diadaken pada 20 Maart 1905 dengan Bestuur terdiri dari toeantoean Kapitein Lim Tieng Hoey, President, Soe Hoen Tjiang, Vice-President, Tee Pek Soey, Tee Boen Som, Lauw Teng Seng, Ong Teng Gie, Lim Tieng Bouw dan Oey Lim, Commissarissen, Tjio Ma Tjouw, Adviseur, Tjoa Beng Liang dan Tan Kim Hay, Secretarissen, Tan Tjoen Hong dan Tan Tjoen Sioe, Kassiers, Oey Tek Liang dan Tan Tjoen Soey, Ceremoniemeesters, Tjio Tieng Bouw dan Oey See Giok, Collecteuren. Bestuursvergadering 2 April 1905 telah perkenanken pendirian Hoen Kiok itoe dan briken Instructie jang tertijitak di atas zegel dari f 1.50.

Di dalem ini vergadering djoega poen telah perkenanken diberdirikennja Tiong Hoa Hwe Koan Hoen Kiok Indramajoe oleh 54 orang Tionghoa di itoe tempat pada 28 Maart 1905 dengan Bestuur diperlengkepken dari toeantoean Luitenant Tan Goan Lim, President, Luitenant-titulair Tan Liang Siang, Vice-President-Adviseur, Tan Ma Teng, Auw Seng Hie, Tan Soen Hoey, Oey Ngo Bie, Pouw Teng Tjay, Khoe Tjeng Liam, Jo Poen Hok, Lim Liang Eng, Yo Soen An, Poey Po Lim, Tan Goan Seng, Lim Tjoei Seng, Kwee Tjoan Sek dan Poey Hong Gie, Commissarissen, Theng

Liang Eng, Secretaris, Pouw Kim Siang, Kassier, dan Tan Hong Bie, Ceremoniemeester.

Sebagimana di dalem hal menoelad T. H. H. K. di dalem gerakan adaken sekolah Tionghoa Bogor ada jang briken tjonto paling doeloe, demikian poen Buitenzorg ada berdjalan paling moeka di dalem hal adaken satoe organisatie jang berdiri sendiri, pada sasoedanja djadi Hoen Kiok dari T. H. H. K. Batavia satengah taon lebih lamanja. Di dalem sidang Perhimpoenan-besar Loear-biasa dari lid-lid T. H. H. K. di Bogor pada 20 Mei 1905 telah diambil poetoesan boeat minta hak rechtspersoon sendiri. Satelah poetoesan ini diambil oleh Tjabang di Bogor, oleh itoe Hoen Kiok telah dioetoes toeantoean Tan Kie Lam, Vice-President, dan Tjie Tjin Hoay, Iste Secretaris dari Tjabang Bogor, dengan teranter oleh toeantoean Tan Tjoen Keng, Commissaris dari itoe Hoen Kiok, boeat mengadep di dalem vergadering loear-biasa dari Bestuur, jang diadaken pada 21 Mei, aken sampeken salinan poetoesannja itoe Perhimpoenan-besar Loear-biasa dari Tjabang Bogor. Di dalem soerat dari itoe Tjabang ada diminta, biarpoen itoe Hoen Kiok soeda berdiri sendiri, oewang contributie lid-lid Afd. A dan B dari T. H. H. K. jang beroemah di Bogor dibriken sebagimana sekarang 5/6 bagian padanja, dengan perdjandjian jang 1/6 bagian dari oewang contributie lid-lidnya sendiri ia nanti kasi pada T. H. H. K.

RIWAJAT 40 TAON



T. H. H. K. BATAVIA

Berhoeboeng dengen ini permintahannja Tjabang Bogor, jang hendak berdiri sendiri, di dalam itoe persidangan loear-biasa dari Kaoem Pengeroes tida bisa diambil poetoesan jang pasti. Bestuur tjoema tetepken, jang di dalam Perhimpoenan-besar Loear-biasa, jang aken diadaken pada 10 Juni 1905, nanti oleh Bestuur aken dimadjoe-ken voorstel boeat lepaskan Tjabang Bogor dari kakoeasahannja T. H. H. K. Batavia dan briken padanja semoea barang-barang dan sebaginya jang ada di dalam rcemahnja jang memang telah dibeli dengen oewang dari kasnya sendiri, soepaja Tjabang itoe boleh masoek rekest boeat dapat hak rechtspersoon. Lebih djaoe Kaoem Pengeroes poen aken voorstel 5/6 bagian pendapatan contributie dari lid-lid Afid. A dan B di Buitenzorg dikasiken pada kas itoe perkoempoelan di Bogor dengan contra-prestatie 1/6 bagian dari pendapatan contributie lid-lidnya sendiri nanti dibriken pada T. H. H. K. di Batavia.

Perhimpoenan-besar Loear-biasa dd. 10 Juni 1905 telah trima-baek semoea voorstel dari Kaoem Pengeroes, dan poetoesan ini moelai berlakoe pada tanggal Statuten dari T. H. H. K., demikian itoe Tjabang Bogor aken pake nama, diakoeh sah oleh Sri Padoeka Gouverneur-Generaal.

Lid-lid T. H. H. K. di Palembang dengen soerat dd. 12 December 1905 minta, soepaja di Palembang diberdiriken Tjabang, tapi pada itoe lid-lid diminta ditetepken doeloe itoe di dalam satoe Perhimpoenan-besar jang marika moesti bikin, sebagaimana jang ada dimaksoedken di dalam ajat 3 fatsal 21 dari Statuten T. H. H. K.

Di dalam satoe Algemeene Vergadering pada 22 December 1905 48 pendoedoek Tionghoa di Poerbolinggo telah berdiriken satoe perkoempoelan dengan pake nama T. H. H. K. dan marika minta soepaja perkoempoelan itoe diakoeh djadi Tjabang T. H. H. K. Batavia. Atas permintahan marika dibales, menoeroet poetoesannja Perhimpoenan-besar Loear-biasa dari Lid-lid pada 18 Januari 1906, bahoea T. H. H. K. Poerbolinggo itoe ditrima djadi Tjabang, djikaloe semoea lid

Bestuur T. H. H. K. itoe ada djadi lid-lid dari T. H. H. K. Batavia.

T. H. H. K. Hoen Kiok di Serang telah diberdiriken oleh 33 orang di dalam satoe Algemeene Vergadering jang diadaken pada 15 April 1906, dengen toean Oey Bouw Soen sebagai Beschermer-heer dan terpimpin oleh toean-toean Lie Soe Foeng, President, Tan Hin Tjong, Tan Se An dan Tjoa Hoet Pie, Vice-President, Poa Tjing Pay, Tan Hi Tan, Yo Eng Tjoen, Kang Tiauw Tong, Gan Sam Leng, Lim Ek Kioe, Sie Tjiip Bie, Oey Tiang Hi, Gouw Kang Hoat, Touw Eng Bouw, Lim Sek Kim, Lim Tjing Jan, Tjoa Hok Lim, Gan Tjay Seng, Liauw A Tjioe dan Tjiong A Thay, Commissaris, Lim Seng Touw dan Tan Hing San, Adviseur, Sie Keng Hie, 1ste Secretaris, Tjie A Moek, 2de Secretaris, Souw Kay Lian, plv. Secretaris, Sie Tjoen Keng, 1ste Kassier, Lim Kian Tjiang, 2de Kassier, Lie Njoen Tiam dan Tjo Kiam Ek, Ceremoniemeester, Oey Djin Ho dan Oey Goan Tjay, Collecteur. Ini telah ditrima-baek oleh Bestuur pada 13 Mei 1906, dan diakoeh sah pendirianna oleh Perhimpoenan-besar Loear-biasa dari Lid-lid dd. 21 Juni 1906.

Pendirian T. H. H. K. di Serang ada ditjelah dengan soerat oleh Secretaris dari perkoempoelan Hok Tek Beng di sana. Ini telah membikin Bestuur T. H. H. K. itoe toelis soerat pada T. H. H. K. Batavia, soepaja Kaoem Pengeroes di sini toeloeng oeroes itoe. Oleh Kaoem Pengeroes ini soewal diberesken dengen silahken goeroe-kapala Lim Hoei Djie bales soeratnja Secretaris Hok Tek Beng itoe.

Di dalam boelan brikoetnja ada ditrima satoe soerat tertanggal 25 Juni 1906 dari toean Lim Ek Hwat di Bandjermasin jang ada minta advies dan keterangan tentang sekola Tionghoa, sebab pendoedoek di sana hendak berdiriken sekola demikian.

Luitenant Lim A Pat di Muntok pada 8 September 1906 kabarken, bahoea di Muntok aken diberdiriken satoe perkoempoelan boeat adaken sekola Tiong Hoa Hwe Koan dengen soeda dipilih lid-lid pengeroesnya, mendjawab warta mana Bestuur

RIWAJAT 40 TAON



T. H. H. K. BATAVIA

menjataken soekoer dan djoega oetaraken pe-mandangannja tentang perlengkepan Bestuurnja.

Pendirian Tjabang Bandjermasin oleh 47 lid T. H. H. K. pada 25 Februari 1907 telah diperkenankan oleh Kaoem Pengeroes pada 24 Maart 1907. Soesoenan Bestuur dari itoe Hoen Kiok ada: toeantoean Lim Thay Tjong, President, The Oei Yok, Vice-President, Lim Ke An, Oe Oei Kie, Ang Lim Peng, Go Kiat Seng, Ang Lim Siang, Teng A Po, Kho Lin Yang dan Thio Soen Kiang, Commissaris, Teng Seng Sioe, Kassier, Tan Ek Beng, Secretaris, Kwe Liang Po, Adviseur, dan Ong Keng Lie, Ceremoniemeester.

Tiong Hoa Hwe Koan Hoen Kiok Soekaradja telah tertijpta di dalem satoe Algemeene Ledengadering pada 23 Maart 1907, jang diadaken oleh 32 orang, dengan Beschermheer toeantitulair Kho Yoe Seng, dan Bestuur terdiri dari toeantoean Kho Yoe Keng, President, Go Boe Fa, Vice-President, The Thiam Hok, Lauw Kok Leng, Lie Eng Hin, The Tong, Kho Han Tjwan dan Oey Sam Yang, Commissaris, Tan Hay Siang, Adviseur, Kho Han Tiong, 1ste Secretaris, Kho Tjen Hiem, 2de Secretaris, Liem Tjoe Kauw, 1ste Kassier, Kho Han Lie, 2de Kassier, dan Thio Khay Ka, Ceremoniemeester. T. H. H. K. Batavia telah kabaelken itoe pada 2 April 1907.

Sembilan-belas hari kamoedian — 21 April 1907 — dikaboelken pendirian Tjabang T. H. H. K. Batavia di Soemedang, jang dilakoeken oleh 17 orang pada 11 April 1907 dan dikapalaken selakoe Kaoem Pengeroes oleh toeantoean Tjiong Joen Soen, President, Thio Pek, Vice-President, Lim Kim Ho, Secretaris, Tan Tiam An, Oey Ki Ka, Tan Tiam Ho, Lim Tiang Tjoan, Lie Hong Gan, Oey Ek Toa, The Boen Hok, Tjio Kay Kie dan Oey Bian Hong, Commissaris, Oey Tiang Goan, Adviseur, Tjan Ngo Koei, Kassier, Oey Bian Siong, Ceremoniemeester, Oey Seng Beng dan Ko Jeng An, Collecteur.

Perhimpoenan-besar Loear-biasa dd. 14 Juli 1907, salaennja menetepken pendiriannja Tjabang-

tjabang T. H. H. K. di Bandjermasin, Soekaradja dan Soemedang, poen telah perkenankan diberdiri-kennja Hoen Kiok-Hoen Kiok di Pangkal-Pinang dan Banjoemas. Di tempat jang terseboet pertama Tjabang T. H. H. K. diberdiriken oleh 20 orang pada 27 Mei 1907. Beschermheerschap dari Tjabang Pangkal-Pinang dihatoerken pada toean Lay Nam Sen, dan lid-lid Bestuurnja ada terdiri dari toeantoean Luitenant Oen Kheng Boe, President, Oen Kheng Liang dan Lay Ngian Long, Vice-President, Lay Nam Tjhong dan Tjia Fo Soen, Adviseur, Lay Djit Siong dan Oen Kheng Hoa, Kassier, Lim Tjheng Hoen, Ceremoniemeester, Tjin Boei Ngian dan Boen Goean Tjhian, Collecteur, Yap Ngim On, Secretaris, Lay Nam Wie, Hioe Soei Sian, Boen Tjin Thian, Ha Sauw Khi, Tjhia A Sioe, Tjhia A Picuw, Foe Ngim Foek, Liauw Lian Tjhoi, Li Moek Lin, Njiam Jat Fa, Hi Foeng Sie dan Foe Ho Koek, Commissaris. Samentara gelaran Beschermheer dari T. H. H. K. Hoen Kiok di Banjoemas dipersembahken pada toean J. J. Meyer, Assistant-Resident di sana, dan Bestuur terdiri dari toeantoean Luitenant Tjiong A Hwe, President, Liem Tjiang Swi, Vice-President, Siem Boen Bi, Go Boen Tjiang, Sia Joe Djin, Tan Giek Tjay, Ong Kek Tjiong, Ting Tat Swa, Be Pek Hok dan Ong Tjieng In, Commissaris, Tjia Kwat Tjoen, Adviseur, Siauw Sin Bi, 1ste Secretaris, Lauw Hay Goen, 2de Secretaris, Tji Tek Hong, 1ste Kassier, Ong Tjieng Jang, 2de Kassier, dan Siauw Ma Jan, Ceremoniemeester.

Hoen Kiok di Tjilatjap diberdiriken pada 29 Juni 1907 oleh 34 orang dan diperkenankan oleh Kaoem Pengeroes Batavia pada 12 September 1907; Bestuurnja terdiri dari toeantoean Auw Khe Joe, President, Phoa Ik Tjay, Vice-President, Tjwa Kian Bie, 1ste Secretaris, Tan Sioe Hok, 2de Secretaris, Tan Hway Tho, 1ste Kassier, Kho Tjin Kiat, 2de Kassier, Lie Wie Wan, Adviseur, Phoa Ik Kwan, Tjwa Kian Hoe, Kwee Tjiong Hay, Kwee Hoey Tjoen, So Ik Tjia, Phoa Ing Khoen, The Po Bie, Liem Djin Tik, Oey A Teng dan Kho Tjin Seng, Commissaris, Phoa Tjin Tik, Ceremoniemeester.



ter, dan Phoa Tiong Tjay, Collecteur; Beschermheer ada toean Luitenant Phoa Tjin Thay.

Kamoedian menjoesoel pendirian Hoen Kiek di Poerwokerto oleh 48 lid T. H. H. K. di sana pada 21 Augustus 1907, dan dikaboelken oleh T. H. H. K. Batavia pada 26 October 1907. Beschermheer dari itoe Tjabang ada toean The Tjoen Ho, samentara Kaoem Pengeroes terdiri dari toean-toean Tan Hay Siang, President, Oey Soe Ka, Vice-President, Oey Tik Sing, Adviseur, Tan Hay Siek, 1ste Secretaris, Kwe Koat Tjin, 2de Secretaris, The Tiam Hok, Oey Joe Wan, Thio Keng Siang, Lie Eng Soey, Tan Tieng Gan, Go Yoe Tjay, Thio Tjoan Seng, Sie Tjin Beng, Kho Ho Tjwan dan Siauw Sin Tik, Commissaris, Thio Keng Soey, 1ste Kassier, Oey Tjo Gie, 2de Kassier, dan Nie In Tao, Ceremoniemeester.

Sascedanja ini ada qilirannja Blinjoe, Banka, aken berdiriken Hoen Kiek jang diakoeh oleh T. H. H. K. Batavia pada 18 Juni 1908. Soesoenan Kaoem Pengeroes dari Tjabang di Blinjoe ada: toean-toean Kapitein Tjen Ton Long, President, Ng Lian Tjoeng, Vice-President, Tjhong Siak Kong, Adviseur, Tja Tjiap Kin, Kassier, Loe Kang Koei, Ceremoniemeester, Lian Koei Hie, Collecteur, Bong Sin Fai, 1ste Secretaris, Tja Boen Kong, 2de Secretaris, Bong Loek Soe, Tjen Kioeng Long, Tjen Thoeng Koei, Tjhin Tjiap Siong, Tjiong Thiam Ngie, Then Ngie Tjhong, Tjhong Siak Boen dan Tjen Tet Hap, Commissaris.

Satelah berselang ampir 1 taon baroe ada di berdiriken laen tjabang lagi. Jaitoe oleh pendoedoek Krawang di dalem satoe Perhimpoenan-besar, jang telah diadaken pada 13 Februari 1909, dan ini telah dikaboelken oleh Bestuur pada 10 April 1909. Beschermheer dari itoe Tjabang ada toean The Ban Sioe, samentara Bestuurnja ada terdiri dari toean-toean Tja Kie Hong, President, Tjiong Goan Khe dan Khouw Sin Tie, Vice-President, Han Oen Tie dan Tan Tiauw Tjoan, Adviseur, Lie Keng Tjiang, 1ste Kassier, Tan Tjeng Seng, 2de Kassier, Thouw Koen Bouw, 1ste Secretaris, Tan A Kiat, 2de Secretaris, Jap Kim Beng

dan Nio A Soe, Ceremoniemeester, Tan Kim Hoa dan The Tian Siong, Collecteur, Tjiong Goan Ho, Ong Kian Bie, Thio Eng Hong, Jo Tieng Kim, Kie Jam Ten, Tan Tay Sek, The Tjoe Lim, Lie Keng Siang, Ouw Pek Som dan Tja Tiang Koen, Commissaris.

Laen tempat poela jang ikoet toeladan boeat berdiriken Tjabang T. H. H. K. Batavia ada Rangkas-Betoeng, jaitoe di dalem satoe vergadering jang telah diadaken oleh 51 lid T. H. H. K. jang beroemah di sana pada 24 Juni 1909, dan diloe-loesken oleh Kaoem Pengeroes Batavia pada 18 Juli 1909. Bestuur ini Tjabang ada diperlengkepen dari toean-toean Kho Boen Ko, President, Tjan Tiong Beng dan Tan Heng Tjiong, Vice-President, Sim Hok Tek dan Sie Sek Kwie, Adviseur, Tan Eng Ho, 1ste Kassier, Nio Lian Sie, 2de Kassier, Jo Kim Seng, 1ste Secretaris, Lie Kim Tjo, 2de Secretaris, Tan Tjo Liang, Ceremoniemeester, Ong Boen Lick, Oey A Hoen, Sim Kwie Liang, Lie A Sam, Phoa Keng Hian, Oey Tiang An, Tjo Hong Po, Teng A Siong, Oey Giok He, Tan Ka Kip, The Kim Kiat, Tja Tjo, Lim Tiang Hoey dan Pe Pwe, Commissaris.

Soengeilit laloe menjoesoel, satelah berselang kira-kira $1\frac{1}{2}$ taon. Pendirian Tjabang Soengeilit dilakoeken di dalem algemeene vergadering tanggal 17 December 1910 oleh 30 pendoedoek Tionghoa di sana. Pada 26 December 1910 Bestuur telah loeloesken penjiptahan Tjabang itoe. Iapoe-nja Kaoem Pengeroes ada terdiri dari toean-toean Bong Kap Njan, President, Oud-Luitenant Boen Tjiong Kie, Vice-President, Boen Khi Lioeng, Secretaris, Tjoeng Sak Tjhin, Kassier, Bong Khoei Njan dan Bong Koei Foeng, Commissaris, Bong Kie Fa, Adviseur, Thong Njoek San, Ceremoniemeester, dan Ngan Ten Fat, Collecteur. Luitenant Bong Kong Hian diangkat djadi Beschermheer.

Pendoedoek Tionghoa di Mr. Cornelis poen tida maoe katinggalan, apapoela letaknja itoe tempat memang tida djaoe dari Batavia. Pada 21 Januari 1911 diadaken satoe algemeene vergadering, di-

RIWAJAT 40 TAON



T. H. H. K. BATAVIA

mana diambil poetoesan aken berdiriken satoe perkoempoelan jang nanti adaken roemah-sekola dan minta itoe diakoeh djadi Tjabang dari T. H. H. K. Batavia. Permintaan ini telah dikaboelken pada 22 Januari 1911. Beschermheer dari Hoen Kiok Mr.-Cornelis ada toeant Luitenant Lauw Kwie Yoe, dan Kaoem Pengeroesnya ada terdiri dari toeant-toean Lauw Bong Siang, President, Tjhung Hong Goan dan Tan A Sam, Vice-President, Gouw Peng Liang dan Tjie Tjo Tjio, Adviseur. Lauw Tjeng Ngauw, Lim Hong Kan, Tan Boen Toei, Tjan Oen Boen, Tjo Tiang In, Lie Bian Keng, Lauw Tiang Soen dan Oey Sie Kwie, Commissaris, Kwa Hauw Tong, 1ste Secretaris, Na Sioe San, 2de Secretaris, Lauw Bok Im, 1ste Kassier, Thio Hok Liang, 2de Kassier, Lauw Hay Goan dan Nio A Lian, Ceremoniemeester, Lim Tjeng Hong, Lauw Nge dan Tan Ko, Collecteur.

Tjabang T. H. H. K. di Siaoe telah didijelmahkan dengan tjara biasa, jaitoe di dalem satoe algemeene vergadering, oleh 33 orang pada 29 Januari 1911 dengan sebagai Bestuur diangkat toeant-toean Ao Diong Goan, President, Tan Tieng Goan, Vice-President, Tja Djie Tjiat, 1ste Secretaris, Sie Boen Eng, 2de Secretaris, Tan Tjin Soei dan Tjan Tjao Tjoe, Commissaris, Tjan Tjao Long dan Tan Sam, Penningmeester, Ong Hok Die dan Ong Kie Pao, Adviseur, dan Tan Tjin Soei Ceremoniemeester. Ini pendirian telah diloeloesken oleh T. H. H. K. Batavia pada 21 Mei 1911.

Satoe taon kamoedian geloembang mendiriken Tjabang T. H. H. K. sampe di Tasikmalaja. Perhimpoenan-besar boeat mendiriken itoe telah diaaken pada 3 Maart 1912, dan proces-verbaal tentang itoe, jang dikirimken pada Batavia, ada dipertandaken-tangan oleh 35 lid. Ini Hoen Kiok poenja berdiri ada diloeloesken oleh Bestuur pada 5 Mei 1912. Beschermheer dari ini Tjabang Tasikmalaja ada toeant Luitenant Khouw Siauw Seng. Kaoem Pengeroes ada terdiri dari toeant-toean Tan Tjeng Tong, President, Tjiong A Ngo dan Khouw Tjoen Hoa, Vice-President, Ko Keng Hie, Adviseur, Gouw Eng Koan, Vice-Adviseur, Tan Kim Thay, 1ste Kassier, Tjan Geng Yoe, 2de Kas-

sier, Yo Eng Lok, 1ste Secretaris, Yo Tek Seng, 2de Secretaris, Tjoe Siauw Liat, Boe A Sie, Thio A Kong dan Liauw Kang Liang, Ceremoniemeester, Lie Eng Boen dan Oey Soen Heng, Collecteur, Nio Hong Sioe, Lim A Yoek, Yo Toan Hong, Lim Poen Kian, Oey Boen Kwe, Lay Tjiat Kwe, Gouw A Siat, Oey Djin Seng, Gouw A Giok, Yo Tek Liong, Thio Yoe Kiam, Yap Swy Hong, The Le San, The Ke Soa, Lie Ke Tjoe, Tjan Kie Thio, Giam Lauw dan Tan Hong Ge, Commissaris.

Pendirian T. H. H. K. Hoen Kiok Keboemen telah dilakoeken pada 26 Mei 1912 oleh 26 orang, dan dikaboelken pada 9 Juni 1912. Soesoenan Bestuur ada: toeant-toean Tjam Bian Tjoan, President, So Djhan Yam dan Liem Boen Tjay, Vice-President, The Ham Tjiang, Adviseur, Khoe Tjiang Eng, 1ste Secretaris, Tan Beng Bin, 2de Secretaris, Sie Tjoe Tik, 3de Secretaris, Tjoe Kiem Yang, 1ste Kassier, Kwa Boen Hok, 2de Kassier, Liem Tjoe Wan, Ceremoniemeester, Tan Wie Ho, Collecteur, Tio Ting Siang, Tan Beng Khim, Tjook Ie Sin, Tan Gin Ong, Oei Wan Tiong, Liem Kim An, Go Hwat Tjay, Sie Tjay Bing, Khoe Ho Hian, Pik Djeng Kie, Liem Beng Phi dan Theng Teng Hwat, Commissaris.

Di dalem itoe vergadering djoega dari 9 Juni 1912 Kaoem Pengeroes telah akoeh diberdirikenja Tjabang T. H. H. K. di Gorontalo, jang telah ditjiptaken oleh 49 orang pada 5 Mei 1912 dan berada di bawah pimpinan toeant-toean Luitenant Sie Boe Hiang, President, Sie Boen Tjie, Vice-President, Po Tong Hien, Adviseur, Yo Un Tjiauw, Secretaris, Liem Ka Soet, Kassier, Lie Eng Hiok, Ceremoniemeester, Sie Tiong Tjeng, Collecteur, Tan Giok Tong, Liem Lie Kho, Nie Boen Tjeng dan Ong Teng Hoen, Commissaris.

Sabelon taon 1912 berachir kombali telah dikaboelken pendiriannja satoe Tjabang, jaitoe di Toboali pada 27 November 1912. Ini Hoen Kiok telah diberdiriken pada 27 October 1912 dan mempoenjai Bestuur jang terdiri dari toeant-toean Bong Kit Siong, President, Thoeng Kim Tjhoy, Vice-President, Sim Nijat Tjhoy, Adviseur, Bong Khie Tjie,



1ste Secretaris, Ngoey Joek Sem, 2de Secretaris, Tan Sioe Lian, Kassier, Bong Soeng Hie, Bong Joen Tjin, Liong Kim Seng, Lie Tjin Siong, Tjhang Tit Nam, Sim Njiat Fa, Thoeng Boe Sen dan Bong Joen Tjhoy, Commissaris, Tjin Tjie Joen, Ceremoniemeester, dan Jong Sin Khay, Collecteur.

Achirnja di dalem ini periode dari 10 taon (1905 - 1914) kombali ada tertijet poela pendirian njia satoe Tjabang, jaitoe Hoen Kiok di Tjilamaja, kira-kira berselang 1½ taon sadiek berdirinja Tiong Hoa Hwe Koan Hoen Kiok Toboali. Ini Hoen Kiok Tjilamaja ada djadi hasil dari ichtiarnja 33 orang jang telah adaken algemeene vergadering pada 25 Februari 1914. T.H.H.K. Batavia telah loeloesken pendirian itoe pada 2 Maart 1914. Bestuur dari ini Tjabang ada terdiri dari toeantoean Tjoa Dji Sioe, President, Tan Eng Lin, Vice-President, Na A Seng, Adviseur, Khoe Tjoeng Hie, 1ste Kassier, Tan Kang Siong, 2de Kassier, Loa Sian Ie, 1ste Secretaris, Lauw Beaw Soei, 2de Secretaris, Ong Kim Tek, Thio Hong Kin, Lim Phe, Loa An, Phoa Tjeng Koei, Ang Tjiuw dan Lie A Tjoen, Commissaris, Ong Swan Low, Ceremoniemeester, dan Lie Tjeng Hoay, Collecteur.

Dengan berdirinja ini Hoen Kiok, T. H. H. K. sama-sekali djadi ada mempoenjai pada achir taon 1914, jaitoe pada waktoe beroemoer tjoekoep 15 taon, tida koerang dari 25 Tjabang ! Hoen Kiok-Hoen Kiok ini ada terdiri di Tangerang, Tjiandjoer, Bandoeng, Tanah-Abang, Indramajoe, Poerbolinggo, Serang, Bandjermasin, Soekaradja, Soemedang, Pangkal-Pinang, Banjoemas, Tjilatjap, Poerwokerto, Blinjoe, Krawang, Rangkas-Betoeng, Soengeilit, Mr.-Cornelis, Siaoe, Tasik-malaja, Keboemen, Gorontalo, Toboali dan Tjilamaja, menoeroet roentoenan pendiriannja. Ini poen ada dioendjoek di dalem Jaarlijksche Algemeene Ledenvergadering ka-15, jang diadaken pada 20 Februari 1915, tapi 2 aken kaloeear, jaitoe Tjabang Tjiandjoer dan Tjilatjap, jang masing-masing soeda dapat hak rechtspersoon sendiri, kaloeearnja kadoea Hoen Kiok mana telah ditrima-baek oleh Algemeene Ledenvergadering itoe djoega.

Berhoeboeng dengen permintahannja Kaoem Pengeroes Tjabang T.H.H.K. di Bandjermasin, soepaja T. H. H. K. kirim satoe oetoesan ka Samarinda aken geraken satoe Hoen Kiok di itoe tempat, pada 2 April 1907 telah diambil poetoesan mengangkat toeantoean Tan Tjong Long djadi oetoesan pergi ka Samarinda goena itoe maksoed, apabila soeda dapat dikoempoel oewang oeroenan tjoekoep boeat ongkosnjia pengiriman oetoesan itoe. Boeat djalanken lijt goena ini telah diangkat toeantoean Luitenant Lie Hin Liang. Tapi ini maksoed tida djadi dilakoeken : Perhimpoenan Loear-biasa dari Kacem Pengeroes pada 21 April 1907 telah batalken pengiriman oetoesan itoe dan oewang oeroenan jang soeda dapat dikoempoel dikombaliken pada masing-masing pendermanja.

Tida cesah ditoetoerken lagi, bahoea di dalem pakerdjhahan berdiriken Tjabang oleh tempat-tempat jang tersangkoet T.H.H.K. poen soeka briken bantoean. Oepama di waktoe Serang hendak berdiriken Hoen Kiok di sana, atas permintahannja bebrapa pendoedoek di sana pada 31 Maart 1906 Bestuur telah ambil poetoesan angkat toeantoean Tan Kim An, Tan Kim San dan Ouw Sian Tjeng djadi commissie boeat bantoe geraken pendirian T. H. H. K. di sana, jang kamoedian djadi Tjabang.

Ini Hoen Kiok-Hoen Kiok keadahannja tida selamanja ada baek, sebab djoega marika ada alamken geloembang peroentoengan. Sebagi tjonto bisa dioendjoek di sini, bahoea di dalem Perhimpoenan-besar Loear-biasa dari Lid-lid pada 2 December 1906 antara laen-laen ada dibitjaraken djoega keadahannja T.H.H.K. Hoen Kiok Tjiandjoer dan oeroesan koebrahnja Hak Tong dari ini Tjabang. Itoe koetika toeantoean Tan Koei Wan soeda diangkat mendjadi commissie boeat oeroes hal itoe terlebih djaoe dengen dibri tempo sampe 31 December 1906 ; kaloe di dalem ini tempo oeroesan itoe belon djoega bisa beres, Kaoem Pengeroes dibri koeasa boeat tjaboet instructienja itoe Tjabang. Broentoeng penjaboetan itoe telah tida kadjadjan.

Bahoea Kaoem Pengeroes T.H.H.K. di Batavia ada perhatiken dengen soenggoe-soenggoe keaduhan-dalem dari Hoen Kiok-Hoen Kiok ada terboek-

RIWAJAT 40 TAON



T. H. H. K. BATAVIA

ti dengen ditrima-baeknya voorstel toean Tan Kim Bo pada 11 Maart 1909 boeat hatoerken pikiran pada Tiong Hoa Hwe Koan Hoen Kiok di Bandjermasin aken adaken satoe Buitengewone Ledenvergadering boeat anoegrahi gelaran Kie Joe Seng Kong pada toean The Oei Yok, Oud-Vice-President Hoen Kiok di sana, jang telah berphala besar pada Tiong Hoa Hwe Koan Hoen Kiok Bandjermasin.

Di Bandjermasin di itoe koetika boekan tjoema ada Tiong Hoa Hwe Koan Hoen Kiok, jaitoe Tjabang di Bandjermasin dari T.H.H.K. Batavia, tapi di seblah itoe poen ada satoe perkoempoelan Tiong Hoa Hwe Koan laen jang berdiri sendiri.

Di antara ini Tiong Hoa Hwe Koan di Bandjermasin dan Tiong Hoa Hwe Koan Hoen Kiok di itoe tempat djoega ada terbit pertjidrahan, dan ini pertjidrahan ada begitoe roepa, hingga menarik perhatiannja toean Ong Kong Kie, Secretaris Oetoesan Tiongkok di Batavia, jang di itoe waktoe sedeng berada di Batavia, hingga toean Ong madioeken voorstel pada T.H.H.K. Batavia aken kirim satoe oetoesan pergi ka Bandjermasin boeat damiken itoe perselisihan. Ini voorstel telah dimoefaket di dalem Perhimpoenan Loeare-biasu dari Bestuur pada tanggal 28 Maart 1909. Telah diambil poetesan boeat angkat toean Tan Kim San djadi oetoesan T.H.H.K., samentara pada President dan Secretaris dari T.H.H.K. dibriken kakoe-asahan aken kasi soerat volmacht pada oetoesan itoe di atas kertas zegel dari f 1.50 boeat lakoeken pakerdahan jang diserahkan padanja dan boeat laen-laen hal lagi jang nanti diseboetken di dalem itoe soerat volmacht. Aken tetapi, sabelon-nja toean Tan Kim San brangkat ka Bandjermasin, lebih doeloe Bestuur nanti toelis soerat pada Tiong Hoa Hwe Koan Bandjermasin dan Hoen Kiok di sana boect menanja, apa marika soeka dibikin akoer satoe sama laen atawa tida. Apabila satoe antaranja tida maoe trima dibikin rempoek, T.H.H.K. tida djadi kirim oetoesan.

Satoe soerat dari Tiong Hoa Hwe Koan Hoen Kiok Bandjermasin tertanggal 19 Tjhiaqwe 2460 (9 Februari 1909) telah dibilitjaraken di dalem ini persidangan. Dengan itoe soerat Hoen Kiok Ban-

djermasin ada minta Kaoem Pengeroes Batavia poenja advies, bagimana Bestuur Tjabang itoe haroes berlakoe terhadep pada permintahan lepas dari toean-toean Luitenant Lie Tjay Teng, Lie Tjay Ho, So Siong Tjhian dan Kho Ko Hap, masing-masing President, Vice-President, Commissaris dan Commissaris, sedeng doea toean jang terseboet blakangan malahan minta brenti djoega djadi lid T. H. H. K. Terhadep pada ini oeroesan diambil poetesan, Iste Secretaris T. H. H. K. nanti toelis soerat pada lid-lid Bestuur itoe aken minta marika tarik poelang marika poenja permintaan brenti dengen bri nasehat jang baek pada marika dan kasi-taoe djoega hal T. H. H. K. hendak kirim oetoesan ka sana boeat damiken pertjidrahan di antara Tiong Hoa Hwe Koan di itoe tempat dan Tjabang Tiong Hoa Hwe Koan Batavia di sana. Pada Kaoem Pengeroes Tiong Hoa Hwe Koan Hoen Kiok di Bandjermasin dikasi pikiran boeat loeloesken permintahannja itoe ampat lid Pengeroes, kaloe marika tetep minta brenti djoega. Pada itoe Hoen Kiok poen dikasi-taoe boeat djangan kasi berlakoe ajat 2 fatsal 4 dari Huishoudelijk Reglement (jang boenjinja: Siapa melanggar poetessannja Perhimpoenan-besar, nanti didenda oleh Kaoem Pengeroes f 500.—) pada marika itoe.

Tapi Tiong Hoa Hwe Koan Bandjermasin, sebagimana jang teroetara di dalem iapoenna soerat tertanggal 4 April 1909, menjataken ia tida soeka berdamai, hingga itoe niatan mengirim oetoesan ka Bandjermasin poen djadi dicoeroengken.

Djoega pertjidrahan di antara sesama-lid-lid Bestuur dari Hoen Kiok sering diberesken oleh Kaoem Pengeroes di Batavia. Berhoeboeng dengan pertjidrahan sama iapoenna Vice-President, pada 20 Juni 1910 Hoen Kiok Rangkas-Betoeng telah minta Batavia kirim satoe commissie aken bikin beres itoe. Sebagi lid-lid itoe commissie Kaoem Pengeroes T.H.H.K. Batavia telah angkat toeantoean Lim Tieng Siang dan Khoe An Kauw, jang telah madioeken rapport marika di dalem Bestuursvergadering dari tanggal 25 September 1910, dalem mana dikabarkan, pertjidrahan itoe soeda



dibikin beres. Itoe commissie voorstel, soepaja Kaoem Pengeroes itoe Hoen Kiok diwadjibken memalihara boekoe Notulen, jang sedari berdirinja itoe Hoen Kiok — pada 24 Juni 1909 — tida perna diadaken !

Sebagimana soeda dioendjoek, Beschermheer dari Tiong Hoa Hwe Koan Hoen Kiok Banjoemas ada toean J. J. Meyer, jaitoe Assistant-Resident di sana. Koetika ini toean soeda letaken djabatannja ini dengen dapet pensioen dan ada berdiam di Nederland, Buitengewone Algemeene Ledenvergadering dari Hoen Kiok di Banjoemas, jang telah diadaken pada tanggal 16 Juli 1911, telah briken gelaran Kie Joe Seng Kong pada itoe oud-Beschermheer. Djoega Tiong Hoa Hwe Koan Hoen Kiok di Soekaradja telah briken itoe gelaran Kie Joe Seng Kong pada toean J. J. Meyer, poetaesan oentoek mana telah diambil di dalem Buitengewone Algemeene Ledenvergadering tanggal 22 Juli 1911. Ini ada oendjoek besarnja pertoeloengannja toean Meyer pada itoe kadoea Hoen Kiok — pertoeloengan dari fihak laen bangsa jang menaro sympathie besar pada gerakan T.H.H.K., hingga dengen djalan angkat toean terseboet djadi lid Kie Joe Seng Kong kadoea Hoen Kiok itoe oendjoek marika poenja berrima-kasi. Ini poetaesan dari kadoea Hoen Kiok itoe telah ditetepken oleh T.H.H.K. Batavia pada 15 October 1911.

Laen oeroesan dalem (intern) dari Tjabang jang menarik hati dan jang membikin djadi diminta penjampoeran-tangannja Kaoem Pengeroes di Batavia ada oeroesan Hoen Kiok Gorontalo berdiriken satoe perkoempoelan muziek. Toeant Liem Ka Soet, Kassier dari itoe Tjabang, telah madjoecken protest pada Kaoem Pengeroes di Batavia scewal itoe perkoempoelan muziek, jang itoe Hoen Kiok telah berdiriken dengen ongkosnya Hoen Kiok. Ini protest telah djadi salah-satoe punt pembitjarahan dari Bestuursvergadering tanggal 1 December 1912, jang ambil poetaesan boeat karbiken pada Tjabang Gorontalo, bahoea itoe perkoempoelan muziek boleh diberdiriken, tapi dengen fonds sendirian, tegesnya tida boleh dipake

oewang kas Hoen Kiok boeat pikoe ongkos-ongkosnya.

Dan kabetoelan sekali, satelah berselang satoe taon lebih sedikit, T.H.H.K. Batavia poen ada poenja sebagai satoe tjabang di Batavia satoe perkoempoelan muziek !

Di Batavia ada diberdiriken perkoempoelan muziek Tiong Hoa Im Gak Hwee. Ini muziekvereening dengen soerat tertanggal 12 Maart 1914 telah minta pada Bestuur T.H.H.K. soepaja itoe perkoempoelan muziek didjadiken tjabang dari ini perkoempoelan. Ini permintahan telah diloelesken pada 23 Maart 1914. Berhoeboeng dengen ini, toeant Tan Kim Bo, Iste Secretaris, diwadjibken rentjanaken satoe Instructie bagi itoe „Afdeeling Muziek“. Ini „Afdeeling Muziek“ ada dapet nama „Tiong Hoa Hwe Koan Im Gak Poh“. Sebagimana orang taoe, sekarang ini Afdeeling Muziek soeda berdiri sendiri lagi dengen nama-bermoelanja, jaitoe Tiong Hoa Im Gak Hwee, jaitoe moelai pada 8 Februari 1923.

Antara Tjabang-tjabang ada banjak jang tida djalanken marika poenja kawadjiban terhadep pada T.H.H.K. Batavia dengen betoel. Penjetoran 1/6 bagian dari contributie jang ditetepken atawa pengiriman peritoengan contributie atjapkali di-alpaken.

Ini keadahan telah membikin Kaoem Pengeroes djadi djengkel, hingga di dalem Jaarlijksche Algemeene Ledenvergadering dari 25 Februari 1913 dimadioeken voorstel boeat membri koeasa pada Bestuur aken koebrakken Hoen Kiok-Hoen-Kiok jang tida pegang betoel kawadjiban. Tapi di dalem itoe persidangan besar ada dioendjoek djoega, itoe kakoeasahan baroe aken di-goenaen, apabila kealpahannja soeatoe Hoen Kiok di dalem hal melakoeken kawadjibannja soeda ternjata tida bisa diperbaeki lagi. Kakoeasahan boeat mengoebrakken Hoen Kiok oleh Perhimpoenan-besar itoe kamoedian ada dibriken pada Bestuur.

Djadi sadiek diambil poetaesan boeat berdiriken Hoen Kiok-Hoen Kiok, jaitoe di dalem taon 1904, sampe pada Bestuur dibriken kakoeasahan boeat

RIWAJAT 40 TAON



T. H. H. K. BATAVIA

kcebrahken Tjabang jang tida djalanken betoe kawadjibannja terhadep pada Hoofdbestuur di Batavia ada berdjalan 9 taon. Di dalem itoe 9 taon kaliatan niata pengalaman-pengalaman jang didapetken oleh T.H.H.K. Batavia dengan iapoena Hoen Kiok-Hoen Kiok tida ada terlaloe menjennangken.

Satoe taon kamoedian, di dalem boelan Maart 1914, Tiong Hoa Hwe Koan Hoen Kiok Indramajoe ada minta dibebaskan dari kawadjiban membre 1/6 bagian dari contributie lid-lid di sana pada T.H.H.K. Batavia, soepaja dengan begitoe itoe Tjabang djadi tida oesah minta rechtspersoon sendiri. Kerna permintahan ini ada melanggar Instructie Tjabang, permintahan itoe pada 23 Maart 1914 telah ditoekan, samentara terlebih djaoe pada itoe Hoen Kiok diberiaeken, bahoea kaloe ia rasa dengan berdiri sendiri ongkosnja bisa djadi lebih enteng, T.H.H.K. Batavia tida kaberatan boeat ia minta hak rechtspersoon.

Di dalem itoe vergadering djoega telah dibilitarkan oendangan Tjabang Bandoeng boeat T.H. H.K. Batavia kirim wakil aken membre advies di dalem Algemeene Ledenvvergadering dari lid-lid di sana jang hendak diadaken pada 22 Maart (djadi kemarenja diadaken Bestuursvergadering oleh T.H.H.K. Batavia), dimana antara laen-laen nanti dibilitarkan djoega oeroesan minia rechtspersoon bagi itoe Tjabang. T.H.H.K. djawab soeratnya Hoen Kiok Bandoeng, bahoea Kaoem Pangoeroes tida bisa kirim wakil, dan terhadep pada soewal Hoen Kiok Bandoeng hendak minta hak

rechtspersoon sendiri T.H.H.K. Batavia tida ada poenia kaberatan soetoe apa, asal sadja semoea oeroesan jang ada berhoeboeng dengen ini perkoempoelan dibikin beres sebagimana moesti.

Doea Tjabang pertama jang telah ditjaboet instruksi marika lantaran soeda dapat hak rechtspersoon sendiri masing-masing, adalih Hoen Kiok di Tjiandjoer dan di Tjilatjap, jang sadiek itoe waktoe djadi Tiong Hoa Hwe Koan Tjiandjoer dan Tiong Hoa Hwe Koan Tjilatjap. Pengoebrahan Tjabang ini telah dilakoeken di dalem sidang Jaarlijksche Algemeene Ledenvvergadering taon ka-15, jang telah diadaken pada 20 Februari 1915, dan poetoesan ini berlakoe moelai pada tanggal kaloearnja Besluit rechtspersoon bagi itoe kadoea T.H.H.K.

Teritoeng sama T.H.H.K. Buitenzorg, jang telah berdiri sendiri di dalem taon 1905, djadi sampe pada achir taon ka-15 dari berdirinja Tiong Hoa Hwe Koan Batavia ada berdiri 3 T.H.H.K. laen di berbagi-bagi tempat, jang terlebih doeloe ada djadi Hoen Kiok dari Batavia. Tida haroes dilopaken, di seblah ini T.H.H.K., jang bermoela ada djadi Tjabang dari T.H.H.K. Batavia, ada berdiri banjak T.H.H.K. di laen-laen tempat, jang telah ditjiptaken dengen toeroet tjonto di Batavia dan mempoenjai maksoed dan toedjoehan sama seperti T.H.H.K. Batavia, tapi belon perna djadi Tjabang dari T.H.H.K. Batavia, seperti Semarang dan Mlangu.

Pada waktoe bertindak masoek ka dalem iapoena taon-pengidoepan ka-16 T.H.H.K. djadi ada poenia 23 Hoen Kiok.

II

PERSARIKETAN T. H. H. K. -- T. H. H. K.: TIONG HOA TJONG HWE DAN DJAWA HAK BOE TJONG HWE.

ITOEROETNJA jionto jang dibriken oleh Tiong Hoa Hwe Koan di Batavia di laen-laen tempat ada denga doea djalan. Pertama, denga berdiriken perkoempoelan-perkoempoelan T. H. H. K., jang kamoedian diminta T.H.H.K. di Batavia acoh itoe sebagai iapoenja Tjabang atawa Hoen Kiok; dan kadoea, denga tjiptaken perkoempoelan-perkoempoelan T. H. H. K., jang betoel ada mempoenjai saroepa toedjoehan seperti T. H. H. K. di Batavia, tapi toch tida ada dijadi Tjabang dari itoe Tiong Hoa Hwe Koan pertama, dijadi jang tida ada berdiri di dalem hoeboengan apa djoega denga T. H. H. K. di Batavia.

Di banjak tempat ada berdiri T.H.H.K.-T.H.H.K., jang masing-masing ada poenja sekolahann Tiong-hoa, tapi jang boekan ada dijadi Hoen Kiok dari T.H.H.K. Batavia. Marika ini oepamanja ada T. H. H. K. Semarang, T. H. H. K. Malang, T. H. H. K. Soerabaja dan T. H. H. K. Kediri.

Salaennja ini ada djoega perkoempoelan-perkoempoelan T. H. H. K., jang bermoela ada dijadi Tjabang dari T. H. H. K. Batavia, tapi kamoedian telah berdiri sendiri, dari jang mana jang pertama ada T. H. H. K. Buitenzorg dan doea poela jang paling doeloe ada T. H. H. K. Tjiandjoer dan Tjilatjap.

T.H.H.K. Batavia denga iapoenja Tjabang-Tjabang tentoe sadja ada mempoenjai perhoeboengan jang rapet satoe sama laen, samentara T. H. H. K.-T. H. H. K. jang laen-laen boleh dibilang ada bekerdjia denga mentjil sendiran.

Ini telah membuat orang rasaken perlencia ada perhoeboengan di antara itoe semoea organisatie-organisatie T.H.H.K. Denga adanya perhoeboengan satoe sama laen toch segala apa bisa diaoer denga terlebih beres.

Teroetama perkoempoelan-perkoempoelan di laen-laen tempat ada insaf kafaedahannja itoe, dan oleh kerna T. H. H. K. di Batavia ada dijadi jang paling toea dan jang paling berpengalaman, marika teroetama ada toedjoehken mata marika pada T. H. H. K. Batavia di dalem hal mengadakan satoe organisatie teratoer di antara semoea perkoempoelan T. H. H. K.

Ada loear-biasa, bahoea pikiran boeat adaken satoe perhoeboengan jang teratoer di antara semoea perkoempoelan T.H.H.K. — pada mana Hoen Kiok-Hoen Kiok dari T.H.H.K. Batavia tentoe sadja ada dipandang dijadi satoe denga T.H.H.K. ini — telah dioetaraken oleh tiga perkoempoelan T.H.H.K. laen ampir denga berbarengan di dalem satoe boelan, jaitoe boelan Mei. Diambil me-noeroet roentoonan soerat marika jang marika toelis pada T. H. H. K. Batavia, perkoempoelan-perkoempoelan itoe adalah : T. H. H. K. Semarang jang menoelis pada 1 Mei 1905, T. H. H. K. Malang jang kirim soerat pada 5 Mei 1905, dan T. H. H. K. Kediri jang oetarakken kahendakannja di dalem satoe toelism jang pake tanggal 18 Mei 1905 pada Kaoem Pengeroes T. H. H. K. Batavia.

Soerat dari T.H.H.K. Kediri, atawa lebih betoel dari toeac Sie Kok Soen, President dari itoe perkoempoelan, telah dibilitjaraken di dalem Bestuurs-vergadering tanggal 23 Mei 1905. Denga itoe

RIWAJAT 40 TAON



T. H. H. K. BATAVIA

soerat toean Sie Kok Soen ada bri pikiran aken atoer, soepaja (a) semoea perkoempoelan jang pake nama Tiong Hoa Hwe Koan nanti anggep T.H.H.K. Batavia dijadi kapalanja, dan (b) T.H.H.K. Batavia tjari 1 orang di Peking atawa Japan, jang pande melakoeken djabatan Inspecteur Sekola, boeat atoer semoea sekola dari perkoempoelan-perkoempoelan T. H. H. K. di koeliling tempat, biar bisa dijadi saroepa pladjarannja, samentara gadjinja ini Inspecteur moesti dipikol oleh perkoempoelan-perkoempoelan T. H. H. K., banjankna sama rata satoe dengen laen, dan ongkos spoor dan ongkos-makannja nanti dibajar oleh itoe perkoempoelan, jang didatengi olehnya.

Voorstel-vorstel dari T. H. H. K. Kediri dijadi ada (1) tjiptaken satoe persariketan di antara T. H. H. K.-T. H. H. K. dengan T. H. H. K. Batavia sebagi kapalanja, dan (2) persatoean di dalem pladjaran dengen angkat satoe Inspecteur boeat preksa pladjaran di semoea sekola Tionghoa. Laen dari itoe, soeratnja T. H. H. K. Kediri ada oendjoek satoe penghargaan tinggi pada T. H. H. K. Batavia.

Di dalem balesannja T.H.H.K. Batavia pada toean Sie Kok Soen, lebih doeloe dihatoerken tri-ma-kasi pada itoe President T.H.H.K. Kediri jang telah hargai tinggi pada T.H.H.K. Batavia. Kaoem Pengeroes T.H.H.K. Batavia njataken moefaket boeat mengadaken satoe Inspecteur Sekola dan djoega soeka toeloeng tjari orang jang pande di Tiongkok atawa Japan boeat pangkoe itoe djabatan, samentara tentang itoe persariketan jang di-voorstel T.H.H.K. Batavia minta toean Sie toeloeng rempoeken dengen perkoempoelan-perkoempoelan T. H. H. K. di koeliling tempat.

T.H.H.K. Semarang dengen soerat tertanggal 1 Mei, jang dibilitarkan di dalem Buitengewone Bestuursvergadering tanggal 4 Juni 1905, ada min-ta, soepaja T.H.H.K. adaken satoe Inspecteur Sekola jang pande boeat djalan mengatoer pladjaran di sekola-sekola T. H. H. K., soepaja semoea sekola dari perkoempoelan-perkoempoelan jang pake nama T. H. H. K. atawa jang bermaksoed saroepa dengen T. H. H. K. satoe sama laen pladjarannja bisa dijadi sama.

Soerat tertanggal 5 Mei 1905 dari T.H.H.K. Malang ada kasi pikiran, soepaja (a) T.H.H.K. kirim circulaire pada masing-masing perkoempoelan T.H.H.K. di koeliling tempat aken minta semoea perkoempoelan itoe nanti soeka toeroet satoe atoeran, agar satoe sama laen bisa dijadi rempoek dan roekoek, (b) masing-masing goeroe jang T.H. H.K. kirim ka laen tempat, dibikinken contract, dalem mana ditentoeken brapa gadjinja dan brapa lama moesti bekerdja, dan (c) goeroe-goeroe jang bersalah di dalem pakerdjahan boleh lantas dilepas, dan T.H.H.K. Batavia lantas toeloeng kirim penggantinja, sedeng hal kalepasan goeroe itoe moesti diwartaken di dalem soerat-soerat-kabar dengen diterangkan kasalahannja, samentara laen perkoempoelan T.H.H.K. dilarang pake itoe goeroe, maksoed dari peratoeran mana adalah soepaja goeroe-goeroe nanti djaga hati-hati kawad-jiban marika dan tida bisa bikin soesah pada perkoempoelan.

Djadi voorstel-vorstel dari Semarang dan Malang doe-a-doea tida ada begitoe tandes seperti pikiran dari Kediri, jang hendak adaken persariketan dari semoea perkoempoelan T.H.H.K. dengan T.H.H.K. Batavia sebagi kapalanja. Tapi tigatiganja ada mempoenjai saroepa angen-angen, jaitoe adaken satoe systeem onderwijs boeat seantero perkoempoelan T.H.H.K., atawa dengen laen perkatahan adaken satoe persariketan onderwijs jang maksoednjia, soepaja leerprogramma dari semoea sekolah dari perkoempoelan-perkoempoelan T.H.H.K. atawa perkoempoelan-perkoempoelan jang poenja maksoed bersamahan dengan T.H.H.K. dijadi saroepa.

Di itoe waktoe ada dikandoeng niatan aken adaken satoe conferentie dari President-President perkoempoelan-perkoempoelan T.H.H.K. Berhoe-boeng dengen itoe pada Semarang dan Malang dibales, bahoea itoe soewal-soewal baek dibilitarkan di dalem itoe conferentie dari President-President perkoempoelan-perkoempoelan T.H.H.K.

Tentang itoe Conferentie President-President dari semoea perkoempoelan-perkoempoelan T.H.H.K. telah tida kadengeran banjak.



Tapi niatan boeat adaken satoe organisatie jang teratoer di antara itoe sakean banjakanja perkoem-poelan T.H.H.K. jang di itoe waktoe ada berdiri di sana-sini di saloeroeh Java, ada dikerdjaken te-roes.

Moelai dari sini riwajat pergerakan T.H.H.K. saoemoemnjia, djadi boekan tjoema T.H.H.K. Batavia sadja, bertindak masoek ka dalem iapoenja djeman jang penting.

Koendjoengan oetoesan Tiongkok, toean Lauw Soe Kie, ada membantoe banjak di dalem oeresan mengadaken Inspecteur.

Di dalem Bestuursvergadering 22 Juni 1905 toe-an Tan Kim San, jang di itoe waktoe ada pangkoe djabatan Ceremoniemeester dari T.H.H.K., telah bertaoeken pada Kaoem Pengoeroes, bahoea menoeroet kabar dari toean Luitenant Khoe A Fan, satoe oetoesan dari Tjongtik di Kwitang dan Kwisay, di dalem perdjalananja ka Penang, nanti mampir di Batavia boeat meliat T.H.H.K. Batavia poenia sekola. Berhoeboeng dengan ini Bestuur telah menoelis pada toean Luitenant Lie Hin Liam, soepaja toean ini soeka kasi pake iapoenja gedong di Tjengkareng sebagi tempat-menginep-nja itoe tetamoe dari T.H.H.K., sebagimana jang toean Lie Hin Liam telah berboeat, koetika toean Kang Yu Wei mengoendjoengi Batavia.

Tapi sasoeda liwat 4 boelan baroe kadengeran apa-apaa poela tentang koendjoengan satoe oe-toesan dari Tiongkok. Di dalem vergadering loear-biasa pada 25 October 1905 Kaoem Pengoeroes ada bitjaraken hal penjamboetan oetoesan dari Peking jang nanti dateng tida lama lagi, menoeroet voorstelnja toean Khoe A Fan, oetoesan mana dateng kamari perloenja boeat preksa roemah-roemah-sekola Tionghoa di Hindia-Olanda.

Laloe kombali tida terdenger soeatoe apa poela sampe pada pertengahan boelan Maart taon bri-koenja, taon 1906. Pada tanggal 14 Maart 1906 T.H.H.K. telah angkat toean Luitenant Khoe A Fan, Vice-President dari ini perkoempoelan, djadi oe-toesan T.H.H.K. aken anter toean Lauw Soe Kie, jang dikirim oleh Gouverneur dari Liang Kwang, boeat liat-liat sekola-sekola T.H.H.K. dan sebaginja di Djawa Wetan. Ongkos-djalannja oetoesan-oetoe-

san itoe seberapa boleh nanti dipikoelken dengen oewang oeroenan. Menoeroet toean Kwee Tek Hoay — di dalem iapoenja toelisan „Atsal moelahnja timboel Pergerakan Tionghoa jang modern di Indonesia”, III, „Moestika Romans” December 1936 — toean Lauw Soe Kie, jang djabatannja ada berhoeboeng djoega dengen onderwijs, boeat la-koeken ini pakerdjahan pergi preksa sekola-sekola T.H.H.K. di Java telah dibri titel Admiraal dari pa-soekan laoet Tiongkok dan ia dateng di Java dan mengadep pada Gouverneur-Generaal dan laen-laen pembesar dengen pake uniform officier laoet.

Satelah meliat-liat keadahan sekola, toean Lauw Soe Kie telah madjoeken voorstel-voorstel sebagai brikoept pada T.H.H.K. Batavia: sekola T.H.H.K. (1) ditoetoep pada saban hari Minggoe, (2) diboe-ka pada saban Tje-it dan Tjapgo, (3) klas-klas sekola dikasi nama Ka, It, Phia, Teng, enz., (4) djendela-djendela roemah-sekola ditambah, (5) goeroegoeroe T.H.H.K. dapat vrij sewah roemah, (6) moe-rid-moerid tambah pladjaran batja Keng, (7) tam-bah tempat boeat adjar sekola, dan (8) adaken fonds oewang sekola. Bestuur telah trima-baek boeat madjoeken voorstel-voorstel itoe pada Al-gemeene Vergadering menoeroet poetcesannja pada tanggal 31 Maart 1906. Di dalem ini ver-gadering djoega Kaoem Pengoeroes telah bitjaraken satoe voorstel laen dari toean Lauw Soe Kie, jang betoel ada mengenaken soewal onderwijs saoemoemnjia, tapi tida mempoenjai perhoeboengan dengen systeem onderwijs jang digoenaken di dalem ini sekola. Jaitoe adaken satoe sekola-goeroe malem. Berhoeboeng dengen ini telah diambil poetoesan adaken sekola malem, tapi oe-wang boeat mengongkosken ini tida aken diambil dari kas biasa, hanja goena itoe nanti dipenggoet contributie loear-biasa, jang aken didjadiken satoe Fonds jang tida ditjampoer pada kas T.H.H.K. Itoe 8 voorstel jang laen telah tida diteroesken pada Algemeene Vergadering, hanja tentang itoe telah diambil kapoetoesannja di dalem sidang Bestuur jang brikoenja (13 April 1906), jang telah trima-baek apa jang diseboet pada angkah-angkah 1, 2, 3 dan 6, jaitoe boeat toetoep sekola pada saban hari Minggoe, boeka pada saban Tje-it dan Tjap-

RIWAJAT 40 TAON



T. H. H. K. BATAVIA

go, klas-klas sekola dikasi nama Ka, It, Phia, Teng, enz., dan bagi moerid-moerid ditambah pladjaran batja Keng, perobahan-perobahan mana dengen lantas didjalanken moelai boelan Tiong-hoa jang mendatengi (Siegwee 2457). Toean Lauw poenja voorstel laen di itoe waktoe masih belon bisa ditoeroet.

Toean Lauw Soe Kie poenja pakerdahan penting jalah pengaduhan satoe conferentie di Bandoeng di antara semoea perkoempoelan-perkoempoelan T.H.H.K. Sebagi wakil T.H.H.K. Batavia ka dalem ini conferentie telah dioetoes toean Tan Kim San, dan ini toean pada 13 Mei 1906 ada rapport pada Bestuur, bahoea ia sebagai wakil T. H.H.K. Batavia telah toeroet teeken soerat-perdjandjian jang berhoeboeng dengan oercesan pengaduhan satoe Inspecteur Sekola, jang telah diinsaf perloenza oleh berbagi-bagi perkoempoelan T.H. H.K. Itoe soerat-perdjandjian ada tetepken boeat bajar pada Inspecteur Sekola gadji f 400.—, jang moesti dipikoiel oleh masing-masing perkoempoelan T.H.H.K. menoeroet banjknja goeroe-goeroe jang sasoeatoe perkoempoelan jang tersangkoet ada poenja, sebagimana jang kamoedian nanti ditetepken dengen soerat oleh toean Lauw Soe Kie, jang nanti toeloeng tjariken Inspecteur itoe. Bestuur telah trima-baek ini rapport dari toean Tan Kim San.

Soewal Inspecteur Sekola dengen itoe conferentie di Bandoeng pada awalnya taon 1906 ada dapat roepa jang terlebih tetep.

Biarpoen begitoe, kaliatannja itoe masih belon bisa kadjadian dengen tiepet.

Di itoe koetika soeda ada dirempoeki niatan adaken satoe persariketan, satoe Tjong Hwe. Lieutenant Tan Keng Djian, President dari Soet Sien Hwee di Pemalang, ada banjak bekerdja goena ini. Satoe renjana peratoeran Tiong Hoa Hwe Koan Tjong Hwe, jaitoe boeat adaken Inspecteur Onderwijs bagi sekalian Hak Tong di Hindia-Olanda, telah dikirim olehnya pada T.H.H.K. Batavia, jang pada 21 Juni 1906 angkat toean-toean Lie Kim Hok dan Gouw Peng Liang ka dalem commissie boeat preksa itoe, samentara terlebih djaoe ini commissie ada diminta djoega boeat

madjoeken voorstel, bagimana baeknja diaoter rentjana fonds pengaduhan satoe Inspecteur Onderwijs.

Commissie jang diangkat boeat pahamken itoe rentjana jang dikarang oleh toean Tan Keng Djian telah madjoeken iapoenja rapport di dalem Bestuursvergadering tanggal 11 Juli 1906. Kaoem Pengeroes telah njataken moefaket dengen pikirannya itoe commissie. Itoe koetika tindakan boeat adaken satoe organisatie di antara perkoempoelan-perkoempoelan T.H.H.K. dan laen-laen perkoempoelan jang ada poenja saroepa maksoed seperti T.H.H.K. soeda dapetken kamadjoean begitoe roepa, hingga di dalem itoe persidangan djoega dari tanggal 11 Juli 1906 telah diangkat toean-toean Phoa Keng Hek, President, dan Tan Tjong Long, Commissaris, menjadi oetoesan-oetoesan T.H.H.K. Batavia aken hadlirken conferentie dari perkoempoelan-perkoempoelan T.H. H.K. dan sebaginjia jang aken diadaken pada tanggal 24 Gogwee 2457 (15 Juli 1906) di Semarang dengen mengambil tempat di gedong T.H. H.K. di sana. Rapport dari commissie pemahaman rentjana Tjong Hwee jang dikarang oleh toean Tan Keng Djian dipoetoesken diserahkan pada itoe kadoea oetoesan boeat dibilitaraken di dalem itoe conferentie di Semarang.

Dengen conferentie jang diadaken di Bandoeng oleh toean Lauw Soe Kie, itoe conferentie di Semarang dijadi ada conferentie kadoea, di dalem mana wakil-wakil dari berbagi-bagi perkoempoelan T.H.H.K. ada bikin pertemuanh satoe sama laen aken atoer satce perhoeboongan jang rapet bagi kabaekannja semoea perkoempoelan T.H. H.K. dan perkoempoelan jang ada bersamahan maksoed.

Verslag dari ini conferentie di Semarang telah dibriken oleh toean Tan Tjong Long di dalem sidang Bestuur dari tanggal 9 Augustus 1906.

Conferentie di Semarang telah bikin terdiri Tiong Hoa Tjong Hwe, satoe persariketan pertama dari perkoempoelan-perkoempoelan T.H.H.K. dan perkoempoelan-perkoempoelan laen jang mempoenjai satoe maksued dengen T.H.H.K., dan amat bisa dijadi poen ada dijadi satoe persarike-



tan pertama dari perkoempoelan-perkoempoelan Tionghoa di ini negri.

Kadoedoekan dari Tiong Hoa Tjong Hwe ada ditetepken di Semarang.

Dari nama Tiong Hoa Tjong Hwe, jang dijadi ada berarti Perkoempoelan Centraal dari orang Tionghoa, orang bisa tarik conclusie tentang sifatnya itoe pendirian, jaitoe bahoea ia maoe bekerdja di dalem lapangan oemoem sebagai persarikatan oemoem dari perkoempoelan-perkoempoelan Tionghoa, atawa dengen laen perkatahan : ia boekan tjoema bekerdja di dalem kalangan onderwijs meloeloe.

Dengen adanja ini persarikatan, pergerakan T.H.H.K. di Java dijadi masoek ka dalem satoe djeman baroe.

Boleh dibilang berbareng dengen diberdirikenja Tiong Hoa Tjong Hwe ada dikirim oleh Gouverneur Liangkwang toean Wong Fong Cheang sebagai Inspecteur Sekola ka Java.

Ini Inspecteur Sekola ada dikirim oleh Gouverneur Liangkwang pada Consul Tiongkok di Singapore, sebab itoe koetika di Hindia-Olanda masi belon ada consulaat-consulaat Tiongkok¹⁾, dan pada 24 October 1906 consul Tiongkok di Singapore kirim telegram pada T.H.H.K. Batavia boeat minta T.H.H.K. oetoes orang ka sana aken samboet itoe Inspecteur Sekola dan djoega boeat anter ia-ini di dalem perdjalanan dari Singapore ka Batavia. Malemnja dengen lantas diadaken satoe Buitengewone Bestuursvergadering dengen dikapalcken oleh toean Luitenant Khoe A Fan selakoe voorzitter boeat bitjaraken oeroesan ini. Di dalem itoe persidangan oleh voorzitter telah divoorstel boeat angkat toean Tan Kim San dijadi oetoesan T.H.H.K. dengen oendjoek, bahoea toean Tan Kim San soeda perna dijadi oetoesan T.H.H.K. koetika menjamboet pada toean Lauw Soe Kie dan telah kanjatahan, bahoea ia ada tjoekoep tjakep aken lakoeken pakerdahan itoe, voorstel mana telah ditrima-baek, dan toean Tan Kim San lebih

djaoe ditetepken moesti brangkat ka Singapore pada hari Saptoe brikoetnja (27 October 1906). Itoe koetika toean Lie Hin Liang njataken pikirannja, bahoea baek angkat djoega satoe oetoesan laen, jang aken lantas bisa gantiken toean Tan Kim San, kaloe ini toean dapet halangan jang mendadak atawa toelak angkatan ini. Toean Ang Sioe Tjiang lantas voorstel toean Khoe A Fan sebagai itoe oetoesan pengganti, jang telah ditrima-baek oleh vergadering.

Demikian dengen disamboet di Singapore oleh oetoesan T.H.H.K., Inspecteur Sekola jang pertama telah indrek poelo Java, jaitoe toean Wong Fong Cheang, jang gadjinja dibajar oleh Gouverneur Liangkwang.

Satelah toean Wong soeda sampe di Batavia, pada 4 November 1906 T.H.H.K. lantas kirim telegram pada Tiong Hoa Tjong Hwe, meminta Tiong Hoa Tjong Hwe lekas kirim orang ka Batavia aken anter ini inspecteur pergi ka Semarang. Berdiarnja ini Inspecteur Sekola di Batavia roepanya telah timboelken salah-mengarti pada Tiong Hoa Tjong Hwe, jang — menoeroet kawat-balesannja pada T.H.H.K. Batavia poenja telegram terseboet, terkirim pada tanggal 6 November 1906 dari Semarang — soeda atoer, soepaja itoe Inspecteur Sekola dari Singapore brangkat teroes ka Semarang. Tiong Hoa Tjong Hwe di dalem telegramnya itoe poen ada menanja, kenapa itoe Inspecteur Sekola ditahan di Batavia, berhoeboeng dengen mana Tiong Hoa Tjong Hwe njataken, bahoea Batavia jang haroes anterken itoe Inspecteur Sekola ka Semarang.

Boeat ilangken salah-mengarti dan doegahan jang tida betoel dari Tiong Hoa Tjong Hwe tentang soewal datengnja itoe Inspecteur Sekola ka Batavia terlebih doeloe dan boekan dengen langsoeng dari Singapore menoedjoeh ka Semarang. T.H.H.K. Batavia dengen telegram kabarken pada Tiong Hoa Tjong Hwe, bahoea Tjongkok telah kirim Inspecteur Sekola itoe pada Consul Tiongkok di Singapore, jang lantas telegram pada T.H.H.K. Batavia minta T.H.H.K. Batavia kirim orang boeat samboet, dan T.H.H.K. kabarken pada Tjong Hwe, jang T.H.H.K. nanti kirim orang ka Singapore.

¹⁾ Tentang riwajat Consulaat Tiongkok di sini batjalah artikel „A brief historical sketch of the Chinese Consulate-General at Batavia Java“ oleh toean F. T. Sung, Consul-Generaal Tiongkok di Batavia (1931 - 1937) di dalem „Sin Po Jubileum-Nummer 1910 - 1935“.

RIWAJAT 40 TAON



T. H. H. K. BATAVIA

Itoe Inspecteur Sekola moesti dateng ka Batavia, demikian dikasi keterangan lebih djaoe di dalem itoe telegram dari T.H.H.K. Batavia pada Tiong Hoa Tjong Hwe di Semarang, sebab ia ada bawa satoe soerat dari Consul Olanda boeat Directeur van Onderwijs, Eeredienst en Nijverheid. Achirnya dengen itoe kawat T.H.H.K. minta lagi Tiong Hoa Tjong Hwe perloeken kirim oetoesan ka Batavia boeat anter itoe Inspecteur Sekola ka Semarang.

Keterangan lebih djaoe tentang kadatengannja Inspecteur Sekola Wong Fong Cheang di Batavia Kaoem Pengeroes minta 1ste Secretaris briken pada Tjong Hwe dengen soerat.

Dengen begini itoe salah-mengarti dapat disingkirken.

Pada laen taonnja, 1907, pada tanggal 5 Mei, oleh Tiong Hoa Tjong Hwe diadaken conferentie dengen memindjem gedongnya T.H.H.K. Semarang.

Buitengewone Bestuursvergadering pada tanggal 21 April 1907 telah angkat toeant Kan Hok Hoei, Commissaris T.H.H.K., menjadi wakil dari T.H.H.K. Batavia di dalem itoe conferentie Tiong Hoa Tjong Hwe di Semarang, samentara kaloe toeant Kan Hok Hoei dapat halangan aken lakoe-ken itoe kawadjiban, toeant Phoa Keng Hek, President, jang nanti pergi ka itoe conferentie.

Sebagi kasoedahan dari conferentie itoe, nama Tiong Hoa Tjong Hwe berachir, pada sasoedanja digoenaken kira-kira satoe taon lamanja. Ker-na di dalem itoe conferentie dari 5 Mei 1907 itoe persarikatan ditoekar namanja dijadi Djawa Hak Boe Tjong Hwe, dalem mana ada tergenggem sifatnja itoe organisatie dengen terlebih njata, ja-itoe hendak bekerdja di dalem kalangan onderwijs sebagai satoe badan central.

Kadoedoekannja itoe Tjong Hwe poen dipindaken dari Semarang ka Batavia, dan T.H.H.K. Batavia dapat kawadjiban boeat angkat Kaoem-Pengoeroesnya.

Ini pengangkatan Bestuur dari Djawa Hak Boe Tjong Hwe telah dilakoeken oleh T.H.H.K. Batavia di dalem persidangan loear-biasa dari Kaoem Pengeroes pada tanggal 12 Mei 1907, di dalem

vergadering mana toeant Kan Hok Hoei telah briken rapportnya tentang itoe conferentie di Semarang.

Sebagi Pengeroes dari Djawa Hak Boe Tjong Hwe Bestuur T.H.H.K. Batavia telah angkat toeantoeant Phoa Keng Hek, President, Luitenant Khoe A Fan dan Kan Hok Hoei, Vice-President, Tan Kim Bo dan Tjiong Poe Joen, 1ste dan 2de Secretaris, Lim Tjeng Siang, Kassier, Tan Hok Tin, Luitenant Oey Boen Hoey, Oey Han Seng dan Tan Tjong Long, Commissaris, dan Lie Kim Hok dan Oud-Luitenant Lie Hin Liang, Adviseur.

Bestuur poen menentoeken, bahoea persida-njan dari Kaoem Pengeroes Djawa Hak Boe Tjong Hwe ini ada sah, djikaloe di dalem persida-njan itoe ada berhadir sadja : 1 President atawa Vice-President, 1 Secretaris, 1 Kassier, 2 Commissaris, dan 1 Adviseur atawa wakilnja marika itoe, djikaloe salah-satoe dari Lid-lid Pengeroes ini dengen sasoenggoenja ada dapat halangan aken toeroet bersidang.

Djoega peratoeran dari persarikatan ini dipoe-toesken boeat dirobah dan diperbaeki oleh Con-ferentie dari Lid-lid Tiong Hoa Tjong Hwe. Ini pakerdahan poen dijadi ada terserah pada T.H. H.K. Batavia. Oleh Kaoem Pengeroes T.H.H.K. Batavia goena kerdjaken perobahan dan perbae-kan itoe di dalem itoe vergadering loear-biasa dari tanggal 12 Mei 1907 telah diangkat satoe commissie jang terdiri dari toeant-toean Kan Hok Hoei voorzitter, Lie Kim Hok, Tan Tjong Long dan Tan Kim Bo, lid-lid.

Toeant Kan Hok Hoei poen ada bawa soerat-soerat dan boekoe-boekoe kapoenchannja Tjong Hwe dari Semarang, djoega oewang contant sa-djoemblah f 1243.12, jaite sisah oewang kas dari Tjong Hwe, jang Kaoem Pengeroes T.H.H.K. la-loe trimaken pada toeant Lim Tjeng Siang, jang di dalem itoe vergadering baroe diangkat dijadi Kassier Djawa Hak Boe Tjong Hwe.

Statuten dari persarikatan Djawa Hak Boe Tjong Hwe telah diakoeh sah dengen besluit Sri Padoe-ka Gouverneur-General tertanggal 14 April 1909 No. 22 dan ada termoeat di dalem „Javasche Cou-rant“ tanggal 23 April 1909 No. 32, dijadi pada sa-



soedanja berdiri 3 taon (dengen teritoeng itoe taon pertama, dalem mana ada dipake nama Tiong Hoa Tjong Hwe).

Menoeroet itoe Statuten, maksoednya itoe bond, jang diberdiriken boeat 29 taon lamanja moelai dari harian itoe Statuten diperkenankan, adalah :

a. Oendjoek pada Lid-lidnya satoe tempat boeat ia-orang bikin perhimpoenan atawa vergadering ;

b. menetepken satoe peratoeran boeat pelajaran di sekola-sekola dari bond, aken goena Lid-lid ;

c. mengangkat satoe atawa bebrapa Inspecleur-sekola dengen gelaran „Kwan Hak Se Tjong Tang“ boeat preksa bebrapa roemah sekola dari perkoempoelan jang dijadi Lid dari ini bond ;

d. bikin serta piara satoe Fonds boeat toetoep segala belandja dan onkost-onkost.

Djadi, sebagimana ternjata dari loekisan iapoenja maksoed-maksoed, Djawa Hak Boe Tjong Hwe ada satoe persarikatan jang melceloe niat bekerdjia di dalem kalangan onderwijs sadja, satoe hal jang soesah dibilang tentang Tiong Hoa Tjong Hwe.

Sebagimana soeda dibilang, Statuten dari Djawa Hak Boe Tjong Hwe telah diakoech sah dengen besluit Sri Paduka Gouverneur-Generaal tertanggal 14 April 1909 No. 22. Itoe koetika Dawa Hak Boe Tjong Hwe soeda tida berkadoedoekan di Batavia lagi, hanja soeda pinda ka Soerabaja, kerna menoeroet peratoeran memang perwakilan dari itoe bond, oleh T.H.H.K. di Batavia, Semarang atawa Soerabaja, tjoema boeat satoe taon sadja. T.H.H.K. Batavia dijadi telah rentjanaken itoe peratoeran bagi Djawa Hak Boe Tjong Hwe. Boeat atoer itoe Statuten terlebih djaoe, pada 11 Januari 1909 telah diangkat toeang Lauw Gick Lan, jang di itoe waktoe ada dijadi 2de Secretaris, dijadi wakil T.H.H.K. Batavia boeat berempoek dengen wakil dari T.H.H.K. Soerabaja, dan terlebih djaoe djoega boeat masoeki soerat-permoehoenan aken minta Statuten dari itoe Djawa Hak Boe Tjong Hwe diakoech sah oleh Sri Paduka Gouverneur-Generaal dan oeroes apa jang perloe dalem hal itoe, hingga itoe Statuten ditrima-

perbaek dan diperkenankan oleh Pamerentah. Itoe perkenan dari Pamerentah dijadi telah diperoleh pada kira-kira tiga boelan kamoeidian.

Menoeroet Statuten dari ini Persarikatan, jang ditrima dijadi lid dari itoe Bond adalah perkoempoelan-perkoempoelan Tionghoa jang diakoech seperti rechtspersoon dan mempoenjai Hak Tong dalem Poelo Djawa dan Madoera. Dalem hal begini itoe perkoempoelan seperti lid dari ini persarikatan dianggep ada diwakilken oleh Bestuurnja (fatsal 4 ajat 2).

Boeat dijadi lid, perkoempoelan jang tersangkoet wadjib kasi pada Raad van Toezicht dari Bond soerat-pertelahan dari banjaknja goeroese sekola Tjeng-Im jang bekerdjia padanja dan dari djoembah moerid sekola pada Hak Tong dari itoe perkoempoelan jang hendak masoek dijadi lid. Kamoeidian pada saban tiga boelan satoe kali sasoectoe lid moesti kasi masoek liist demikian pada Raad van Toezicht. (Fatsal 4 ajat 3).

Algemeene Vergadering dari lid-lid ini Bond, jang diadaken pada saban Shagwee, nanti pilih satoe wakil dari Bond di antara perkoempoelan-perkoempoelan T.H.H.K. Batavia, T.H.H.K. Semarang dan T.H.H.K. Soerabaja (fatsal 5 ajat 1). Tapi seandehnya salah-satoe di antara tiga perkoempoelan ini tida dijadi lid, doeza jang laen ada poenja hak boeat oendjoek satoe perkoempoelan laen, djoega lid dari Bond dan pernanja di salah-satoe antara tempat-tempat terseboet, boeat toeroet dipilih dijadi wakil (fatsal 5 ajat 2), lantaran mana dijadi perwakilan Djawa Hak Boe Tjong Hwe selaloe ada di Batavia, Semarang atawa Soerabaja sadja.

Itoe wakil dari Bond diangkat boeat satoe taon Imlek (fatsal 5 ajat 3), dan Besluur dari ini perkoempoelan, jang diangkat dijadi wakil dari Bond, nanti angkat bebrapa orang di antara lid-lid perkoempoelannja aken dijadi lid-lid Raad van Toezicht dari ini Bond (fatsal 5 ajat 4), jang terdiri dari satoe President, doeza Vice-President, ampat Commissaris, doeza Adviseur, doeza Secretaris dan satoe Kassier.

Ini Raad van Toezicht ada dijadi pemimpin dari semoeza algemeene vergadering dari Bond (fatsal

RIWAJAT 40 TAON



T. H. H. K. BATAVIA

7 ajat 1), jadi ada ambil kadoedoekan sebagai Bestuur dari satoe perkoempoelan. Lantaran pada ini Bond dengan tjara demikian tida diadaken Bestuur, maka djoega itoe Kaoem Pengeroes jang oleh T.H.H.K. Batavia pada 12 Mei 1907 telah diangkat bagi Djawa Hak Boe Tjong Hwe, dengan toean Phoa Keng Hek sebagai President, menoeroet itoe Statuten — dan sebagimana jang ada teroendjoek djoega di dalam Atoeran Penoe-toep dari itoe Statuten — ada jadi Raad van Toezicht dari itoe Persariketan, dan ini Raad van Toezicht pertama poenja perlengkepan ada sama dengan apa jang telah ditetepken di dalam Bestuursvergadering terseboet dari T.H.H.K. Batavia dengan doea katjoealian, jaitoe sebagai Secretaris-en, dengan tida dipetjah lagi di antara 1ste dan 2de Secretaris, boeat gantinja toean-toean Tan Kim Bo dan Tjiong Poe Joen, diangkat toean-toean Tan Kim Bo dan Thio Sek Liong, samentara sebagai salah-satoe Commissaris ada berdoedoek toean Hauw Tek Kong menggantiken toean Oey Han Seng.

Lid-lid Raad van Toezicht diangkat boeat lamanya satoe taon Imlek (fatsal 5 ajat 6), samentara apabila satoe antaranja tida berlakoe sebagimana moesti, wakil Bond ada koeasa aken petjet ia dan angkat laen orang dari antara lid-lidnya boeat jadi pengantinjya (fatsal 5 ajat 7).

Perkoempoelan jang dipilih jadi wakilnja Bond, tapi tampik, diwadjibken bajar dendahan pada Bond banjaknja f 3000.— (tiga riboe roepia!), jang lantas boleh ditagi (fatsal 6 ajat 1), tapi ini dendahan tida dikenaken pada perkoempoelan jang pada taon doeloean soeda wakilken ini Persariketan (fatsal 6 ajat 2). Baek lid-lid Raad van Toezicht maoepoen wakil dari ini Bond, menoeroet boenjinja fatsal 6 ajat 3, boleh dipilih kom-bali.

Satoe boelan sabelonnja lid-lid Raad van Toezicht melepaskan jabatan marika, di dalam tempo 30 hari itoe Raad moesti adaken satoe algemeene vergadering di tempat, dimana ada ka-doedoekan Bestuurnja, dalam mana aken dibitjaraken (a) rekening en verantwoording dan (b) hal angkat satoe wakil (fatsal 7 ajat 2).

Paling laat doea boelan sabelon diadaken vergadering ini, Raad van Toezicht moesti kirim soerat pada lid-lid dari Bond aken menanja, apa jang marika ingin bitjaraken di vergadering, sedeng lid-lid wadjib kirim penjaoetan di dalam lima-belas hari saosoedanja trima itoe soerat (fatsal 7 ajat 4). Dengan perhatiken kainginannja lid-lid, satoe boelan pada sabelonnja algemeene vergadering diadaken, Raad van Toezicht wadjib kasi kabar pada lid-lid hal-hal apa jang nanti dioeroes di itoe vergadering (fatsal 7 ajat 5).

Saban lid ada poenja hak boeat kirim satoe oetoesan dengan disertaken soerat-koeasa boeat kasi satoe soeara (fatsal 7 ajat 6); jang tida kirim oetoesan, menoeroet penetapan fatsal 7 ajat 7 moesti bajar denda f 200.— (doea ratoes roepia) pada Bond.

Di dalam algemeene vergadering aken tjoema dabitjaraken hal-hal jang soeda dikasi taoe dengan soerat; laen-laen soewal melinken boleh dioeroes, djikaloe diperkenankan oleh doea-per-tiga bagian dari djoemblahnja lid-lid Bond jang berhadir atawa diwakili di itoe algemeene vergadering (fatsal 7 ajat 8).

Tentang pemoengoetan soeara ada ditetepken di dalam fatsal 7 ajat 10, bahoea apabila di kadoea fihak ada sama banjaknja soeara, di dalam algemeene vergadering nanti lid-lid Raad van Toezicht jang hadlir jang aken kasi poetesan, sedeng di dalam perhimpunan lid-lid Raad van Toezicht di dalam keadahan demikian poetesan aken dibriken oleh Presidentnja.

Djikaloe ada oeroesan perloe jang moesti dikasi poetesan dengan lekas, Raad van Toezicht lebih doeloe moesti minta adviesnja T. H. H. K. Batavia, T. H. H. K. Semarang dan T. H. H. K. Soerabaja (fatsal 8 ajat 1), dan toedjoe hari kamoedian ini poetesan moesti dikasi-taoe dengan soerat pada lid-lid dari Bond jang moesti menoeroet poetesan itoe (id. ajat 2).

Wakil dari Bond tjoema boleh dilepas dari pa-kerdjahannja dengan poetesan njra satoe algemeene vergadering loear-biasa jang sengadja di-boeka di Semarang, Soerabaja atawa Batavia



atas permintahannja lebih dari saparoh djoem-blahnja lid-lid dari Bond (fatsal 9).

Contributie jang moesti dibajar oleh perkoem-poelan-perkoempoelan jang dijadi lid dari Djawa Hak Boe Tjong Hwe ada tiap-tiap boelan f 3.— boeat sasoeatoe goeroe-sekola Tieng-Im jang ada dipakerdjaken, contributie mana moesti dibajar di moeka, menoeroet fatsal 10.

Pakerdahan, gadji dan ongkos-perdjalanen dari satoe atawa bebrapa Inspecteur Sekola nanti diaetoer oleh Raad van Toeziicht (fatsal 11).

Soewal goeroe-goeroe ada ditetepken di dalem fatsal 12. Lid jang ingin tjari goeroe boeat sekolahannja, haroes minia pertoeloengannja Raad van Toeziicht dan lantas serahken segala ongkos-nja (ajat 1). Kaloe ada lepas satoe gceroe tida dengan hormat, lid wadjib kabarken ini pada Raad van Toeziicht dengan bertaoeken djoega namanja itoe goeroe dan sebabnja (ajat 2). Lid-lid tida boleh trimi satoe goeroe bekerdja, djikaloe tida bri-taoe ini hal terlebih doeloe pada Raad van Toeziicht (ajat 3). Kaloe melanggar ini atoeran-atoeran, lid nanti didenda f 100.— aken goena Bond.

Pertijidahan di antara lid-lid saboleh-boleh aken didamiken oleh Raad van Toeziicht (fatsal 13 ajat 1), dan kaloe tida berhasil, ini aken dibawa ka algemeene vergadering jang nanti kasi poe toesan (id. ajat 2), poe toesan mana moesti ditoeroet oleh masing-masing fihak, dan jang tida maroe toeroet aken dikaloearken dari Bond (id. ajat 3).

Lid-lid jang brenti atawa dikaloearken, tida boleh djadi lid lagi, kaloe tida dengan poe toesan-ja algemeene vergadering, jang nanti kasi poe toesan tentang hal itoe.

Demikian perkoem-poelan-perkoempoelan jang mempoenjai sekolahannja djadi terhoeboeng satoe sama laen di dalem itoe persariketan Djawa Hak Boe Tjong Hwe, jang menoeroet Statutennja tjoema bekerdja boeat Java dan Madoera sadja. Apa sebab laen-laen poelo tida dimasoeken ka dalem lapangan bekerdja dari Djawa Hak Boe Tjong Hwe? Bisa djadi oleh kerna letaknja djaoe, djadi soesah boeat Inspecteur-inspecteur Se-

kola djalan sana-sini boeat sekolahann antero lid-lidnja itoe Bond, kaloe itoe Persariketan ada poenja anggota-anggota di loear Java dan Madoera.

Dengen tergaboeng di dalem satoe Persariketan ada terlebih banjak pengharepan, jang onderwijs Tionghoa bisa diaetoer dengen satjara jang terlebih sampoerna dan djoega dengen bersamahan satoe sama laen.

Boeat Conferentie Djawa Hak Boe Tjong Hwe jang diadaken di dalem taon 1908, pada 20 April 1908 telah diangkat toeac-toean Luitenant Khouw Kim An dan Oey Han Seng, doeac-doeac Commisaris dari T. H. H. K., aken djadi wakil T. H. H. K.

Tentang pakerdahannja Djawa Hak Boe Tjong Hwe di dalem taon 1908 antara laen-laen bisa disebot, bahoea dengen soeratnja tertanggal 9 Lakgwee 2459 (7 Juli 1908) itoe Bond telah minta keterangan pada T. H. H. K. Batavia — dan tentoe djoega pada laen-laen anggotanja — tentang (1) brapa banjak adanja goeroe-goeroe dari T.H. H.K. Batavia, (2) djoemblahnja moerid-moerid lelaki dan moerid-moerid prampoean, (3) namanja President dan Vice-President, dan (4) nommer dan tanggalnja besluit dari rechtspersoon T.H.H.K., dari pertanjahan-pertanjahan mana djawabannja pertanjahan-pertanjahan 1 dan 2 ada boeat diraportken pada Hak Boe Po di Peking, samentara jang laen-laen ada boeat dimasoeken ka dalem register dari Djawa Hak Boe Tjong Hwe. Berbareng dengen didjawabnja itoe pertanjahan-pertanjahan menoeroet poe toesan-ja Bestuurs-vergadering tertanggal 18 Juli 1908 Secretaris T. H.H.K. nanti sakalian kasi pikiran boeat atoer tingkat-an-tingkatan pangkat goeroe dan gadjinja sasoeatoe tingkatan itoe aken dihatoerken dengen soerat pada Hak Boe Po di Peking oleh Djawa Hak Boe Tjong Hwe, jang nanti kirim djoega peratoeran sekolahann pada Madjelis itoe seperti keterangan tentang peratoeran sekolahann di poelo Djawa.

Djoega boeat pertijidahan di antara satoe perkoem-poelan T.H.H.K. dengen satoe perkoem-poelan laen perna diminta itoe Bond poenja perantaran boeat bikin dami.

RIWAJAT 40 TAON



T. H. H. K. BATAVIA

Pada pertengahan taon 1908 Hoa Siang Tjong Hwee di Djokjakarta ada dapat pertijidrahan dengan T.H.H.K. di itoe tempat. Berhoeboeng dengan ini persetorian itoe perkoempoelan-dagang di Djokjakarta telah menoelis soerat pada Hoa Siang Tjong Hwee di Batavia boeat minta ini perkoempoelan-dagang di Batavia soeka toeloeng bikin dami itoe pertijidrahan. Hoa Siang Tjong Hwee laloe menoelis soerat pada T.H.H.K. Batavia, meminta T.H.H.K. Batavia poenja bantoean di dalem oeroesan ini. T.H.H.K. Batavia pada 16 Augustus 1908 bri koeasa pada toean Pek Sioe San, lid Bestuur dari T.H.H.K. Cheribon, boeat pèrgi mengadep pada Djawa Hak Boe Tjong Hwe di Soerabaja, ka tempat mana poesatnja itoe Persariketan telah dipindaken pada sasoedanja berkadoedoekan satoe taon lamanja di Batavia, seperti oetoesan dari T.H.H.K. Batavia aken minta Djawa Hak Boe Tjong Hwe lekas bikin dami itoe pertijidrahan.

Besuursvergadering tanggal 15 September 1908 ada bitjaraken circulaire Djawa Hak Boe Tjong Hwe di Soerabaja, jang tertoe lis dengan hoeroef Tionghoa zonder tanggal dan zonder nommer, dengan mana ada dikabariken, bahoea pada tanggal 27 Phewee 2459, jaitoe pada hari-lahirnja Khong Hoe Tjoe, ia hendak gantoeng Pay Pian anoegrahannja Keizer Kong Sie. Kaoem Pengoeroes telah ambil poetoesan boeat menania pada Tjong Hwe, bagimana boeninja itoe Pay Pian dan apa sebab iapoena circulaire tida paké tanggal-boelan dan nommer. T.H.H.K. Batavia djadi ada kasi satoe tegoran, soepaja salandoetnja correspondentie dari itoe Bond dilakoeken dengan terlebih rapi.

Djawa Hak Boe Tjong Hwe, jang bisa dipandang dioega sebagai satoe Centrale boeat tjariken atawa lever goeroe-goeroe pada sekola-sekola jang perloe itoe, tentoe sadja achir-achirnja dapat pikiran boeat adaken Kweekschool (sekola-goeroe) di Java, soepaja bisa menoeloeng dengan lekas pada lid-lidnja jang perloe dapat goeroe, kerna boeat panggil goeroe dari Tiongkok ada makan terlaloe banjak tempo dan blandja. Djoega pendirian satoe sekola-tengah Tionghoa ada di'ichtiar-ken oleh itoe persariketan.

Pada 7 October 1908 Djawa Hak Boe Tjong Hwe, jang itoe koetiika bertempat di Soerabaja, menoelis pada T.H.H.K. Batavia boeat minta T.H.H.K. ini tjari keterangan tentang pertijidrahan jang terbit di antara T.H.H.K. Buitenzorg dan goeroe Bok Kee Djiang jang dilepas dari pakerdjahannja. Toean Kapitein Khouw Kim An telah dioendjoek oleh Bestuur T.H.H.K. Batavia aken tjari-tace oeroesan pertijidrahan itoe.

Berhoeboeng dengan oeroesan tjari goerce boeat berbagi-bagi sekola disini, Djawa Hak Boe Tjong Hwe telah bikin perdjandjian dengan toean Ong Kong Kie, Secretaris oetoesan Tiongkok di Den Haag, jang di itoe wakoe ada koendjoeng-ken Java, aken panggil goeroe dari Peking dengan perantarahannja Hak Boe Po di sana. Itoe perdjandjian, menoeroet soeratinja itoe Persariketan pada 15 December 1908, ada tetepken ongkos kapal boeat goeroe jang dipanggil dateng dari Peking ka Java besarnja f 200.—. Kaloe itoe goeroe kamoedian hendak poelang lagi ka Tiongkok, ia moesti dapat ongkos-kapal sakean banjaknja djoega. Contract-bekerja ditetepken 3 taon. Djoega gadji dan pernaekan gadji dari goeroe-goeroe dari berbagi-bagi tingkatan (goeroe-kapala, goeroe kadoea dan goeroe katiga) ada ditetepken. Itoe goeroe-goeroe poen aken dapat tempat-tinggal prodeo, tapi makan atas ongkos marika sendiri. Di dalem Bestuursvergadering dari tanggal 11 Januari 1909 dari T.H.H.K. Batavia ada dioendjoek, bahoea itoe soerat dari Djawa Hak Boe Tjong Hwe soeda dibales dengan ada dibriken pikiran, soepaja itoe ongkos-kapal baek di'ichtiarken agar menjadi moerahan, kerna bagi Hak Tong - Hak Tong di tempat-tempat ketjil ongkos itoe ada terlaloe berat, boeat oeroesan mana orang tida bisa membikin pertimbangan dengan dasarken pada keadahan roemah-roemah-sekola di tempat-tempat besar, seperti Batavia, Semarang dan Soerabaja. Dan Kaoem Pengoeroes moefaket dengan itoe balesan.

T.H.H.K. perna minta perkenannja Djawa Hak Boe Tjong Hwe boeat oendang sendiri 2 goeroe dari Tiongkok, menoeroet voorstel dari toean Tan Kim San di dalem sidang Bestuur 11 Maart 1909,



dengen pertoeloengannja toean Kim Sim Long, goeroe T.H.H.K., jang itoe koetika berada dengen verlof di Nanking; kadoea goeroe ini baroe aken dioendang, kaloe itoe Persariketan briken perke-nannja. Sebagimana orang taoe, menoeroet per-atoeran Djawa Hak Boe Tjong Hwe (fatsal 12 ajat 1), boeat oendang goeroe baroe lid haroes minta pertoeloengannja Raad van Teezicht dari itoe Bond.

Boeat conferentie Djawa Hak Boe Tjong Hwe di Soerabaja pada 27 Shagwee 2460 (16 Mei 1909), pada 28 Maart 1909 dipooetesken aken angkat djadi wakil toean Phoa Keng Hek, President, dan kaloe toean Phoa dapat halangan aken dioetoes toean Tan Tjong Long, 2de Kassier, samentara bila ini toean poen tida bisa pergi ia aken di-gantiken oleh toean Oey Peng Lin, Commissaris.

Itroe koetika oleh T.H.H.K.-T.H.H.K. di Java soeda ada dikirim moerid-moerid ka Nanking boeat lan-djoetken pladjaran marika, berhoeboeng dengen kabar jang ditrima dari toean Tjian Soen, Secretaris dari gezantschap Tiongkok di Den Haag, jang di dalem taon 1906/1907 telah koendjoeng-ken sekola T.H.H.K. Batavia bersama-sama toean Tong Hong Wie, attaché pada itroe gezantschap, bahoear di sekola Pamerentah Tiongkok di Nanking bisa ditrima moerid-moerid dari sekola T.H.H.K. di Poelo Djawa boeat teroesken pladjaran marika dengen tida oesah bajar oewang sekola, samen-tara tempat-tinggal dan makan poen aken ditanggoeng oleh Pamerentah Tiongkok (liat Notulen No. 146 dari Buitengewone Bestuursvergadering tanggal 1 Januari 1907). Rombongan pertama dari moerid-moerid Poelo Djawa ka Nanking telah brangkat pada tanggal 2 Februari 1907 ka Tiong-kok dengen dianter oleh toean Thio Sek Liong, itoe waktoe 2de Secretaris T.H.H.K. Batavia; ba-njaknja itroe pengiriman pertama ada 21 moerid.

Moerid-moerid dari Java jang ada di Nanking pada 14 Shagwee 2460 (3 Mei 1909) minta dengen soerat, soepajia T.H.H.K.-T.H.H.K. di Lamyang soe-ka bantoe oewang pada iichtiarnja Tjontok Toan Hong aken berdiriken satoe roemah-sekola baroe jang lebih besar di Nanking boeat menerima moe-

rid-moerid dari Lamyang melandjoetken pladjaran marika.

Pada itoe moerid-moerid pada 9 Juni 1909 oleh T.H.H.K. Batavia telah dipooetesken boeat dibales, bahoear T.H.H.K. Batavia lagi berichtiar aken me-njampeken permintahan marika itoe. Salinan soe-rainja moerid-moerid ini oleh Kaoem Pengoeroes dikirim pada Djawa Hak Boe Tjong Hwe, jang di-minita berichtiar oleh T.H.H.K., soepajia bisa diki-rim oewang bantoean boeat mendiriken itoe roe-mah-sekola baroe jang ada sanget perloe bagi moerid-moerid dari Lamyang jang berada di Nan-king aken melandjoetken pladjaran marika. Goena bitjaraken ini soewal dengen terlebih mateng, pa-da 7 Juli 1909 telah diambil poetesan aken ang-kat toean Luitenant Nio Hoey Oen, itoe koetika Vice-President, djadi oetoesan T.H.H.K. ka Soera-baja pada Djawa Hak Boe Tjong Hwe.

Toeau Nio Hoey Oen telah sampe di Soerabaja pada tanggal 16 Juli 1909 dengen disamboet di station Soerabaja oleh toean Phoa Lian Tjeng, Vice-President Djawa Hak Boe Tjong Hwe.

Laloe pada 18 Juli 1909 diadaken vergadering Kaoem Pengoeroes Djawa Hak Boe Tjong Hwe, dan dengen moefakeinja oetoesan T.H.H.K. Bata-via, Tjong Hwe nani menoelis terlebih doeloe pada Tjontok di Nanking aken menanja, apa be-ner boenjinja itoe soerat dari moerid-moerid Poelo Djawa, jang dikirimken pada semoea T.H.H.K. di Hindia-Olanda tentang hal berdiriken sekola di Nanking aken trima moerid-moerid dari Java. Kaloe soeda dapat balesan dari Tjontok, baroe Tjong Hwe nanti atoer apa jang perloe.

Kascedahannja ini tida tertjetet di dalem boe-koe Notulen.

Doea punt laen poen telah dibilitjaraken.

Jaitoe pemboekahan Kauw Yok Hwe, jang In-specteur Wong Fong Cheang hendak adaken; ini hal diserahken toeau Nio Hoey Oen oeroes de-njen itoe Inspecteur.

Laen punt lagi ada soewal T.H.H.K. Batavia te-lah bri idzin pada itoe Inspecteur Sekola aken koem-peelken moerid-moerid Hak Tong-Hak Tong di sekola T.H.H.K. Batavia boeat dioedji pladjaran ma-rika dan dikoerniaken diploma. Ini examen te-

RIWAJAT 40 TAON



T. H. H. K. BATAVIA

lah diadakan pada tanggal-tanggal 23 - 25 Siegwee 2460 (10 - 12 Juni 1909), pada mana ada toeroet ambil bagian moerid-moerid dari Hak Tong-Hak Tong di Garoet, Bandoeng, Bogor, Tanah-Abang, Pasar-Baroe, Serang dan Tangerang, kira-kira 30 moerid sama-sekali, dan dibriken diploma pada moerid-moerid jang loeloes. Djawa Hak Boe Tjong Hwe beranggepan, T.H.H.K. Batavia soeda bersalah dengen briken idzin pada Inspecteur Wong aken adaken examen itoe dan dibriken diploma, oleh kerna ini ada melanggar poetoesannja sidang Conferentie. Toean Nio Hoey Oen di dalem itoe vergadering dari Djawa Hak Boe Tjong Hwe ada moefaket boeat menjataken T.H.H.K. Batavia ada bersalah di dalem hal ini.

Tentang koendjoengannja toeac Nio Hoey Oen pada Soerabaja dan hal-hal jang telah dibilitarkan di dalem itoe vergadering dikabarken oleh Djawa Hak Boe Tjong Hwe pada T.H.H.K. dengen soerat tertanggal 19 Juli 1909. Berhoeboeng dengan itoe ceroesan examen, pada 5 Augustus 1909 Bestuur telah ambil poetoesan aken minta ma'af boeat itoe kasalahan, dan bri koeasa pada Secretaris aken terangken doedoeknja itoe hal pada Tjong Hwe.

Boeat preksa pertjidrahan antara T.H.H.K. Bandjermasin dan Hoen Kiok di itoe tempat dari T. H.H.K. Batavia, Djawa Hak Boe Tjong Hwe menanja, apa tida baek ia angkat salah-satoe lid Bestuur dari T.H.H.K. Batavia aken djadi oetoesan Djawa Hak Boe Tjong Hwe. Tapi T.H.H.K. Batavia tida moefaket dengen itoe (Bestuursvergadering 31 October 1909).

Djawa Hak Boe Tjong Hwe poen berbareng dengan itoe ada menanja pikirannja T.H.H.K. Batavia tentang soewal kasi masoek rekest pada Pamerentah Tiongkok aken minta Inspecteur Wong dilepas dari jabatannja menoeroet permintahannja T.H.H.K. Semarang. Ini poen tida dapat kasetoedjoehannja T.H.H.K. Batavia, jang pada 31 October 1909 serahken pada 1ste Secretaris boeat kasi keterangan tentang ini hal.

Di dalem pengiriman moerid-moerid, jang plajarannja ada sampe tjoekoep, ka Tiongkok, Tiong Hoa Hwe Koan ada bekerdjá bersama-sama de-

ngen Djawa Hak Boe Tjong Hwe, sebagimana jang ada ternjata di dalem poetoesan jang diambil pada 11 April 1910. Di itoe waktoe ada dibilitarkan pengiriman lima moerid ka Nanking aken landjoek ken pladijaran marika terlebih djaoe di Kie Lam Hak Tong. Bestuur telah ambil poetoesan, bahoea terlebih doeloe aken dikirim telegram pada Djawa Hak Boe Tjong Hwe boeat minta diperkenankan itoe pengiriman moerid-moerid.

Sampe di sini riwajat perhoeboengan Tiong Hoa Hwe Koan Batavia dengen Djawa Hak Boe Tjong Hwe soeda deket sampe pada achirnya.

Sasoeda kita batja di dalem notulen dari vergadering-vergadering Kaoem Pengoeroes tanggal 13 Maart 1910 dan 11 April 1910, bahoea pada tanggal 29 Shagwee 2461 (8 Mei 1910) aken diadakan conferentie Djawa Hak Boe Tjong Hwe di Soerabaja, dan sebagai wakil-wakil Tiong Hoa Hwe Koan diangkat toeac-toean Oud-Luitenant Lie Hin Liang dan Oey Soan Yoe, tapi toeac Lie Hin Liang blakangan kabarken ia tida bisa pergi ka Soerabaja, di dalem Bestuursvergadering tanggal 25 September 1910 ada dibilitarkan soewal minta brenii djadi lid dari Djawa Hak Boe Tjong Hwe, kerna ditimbang ini Persariketan tida ada faedahnja bagi Hak Tong. Poetoesan jang pasti tida ada diambil di dalem itoe vergadering, hanja tjoema ditetepken, bahoea di dalem oeroesan ini Kaoem Pengoeroes aken minta terlebih doeloe pikirannja President (Bestuursvergadering itoe ada dipimpin oleh toeac Liauw A Joeng, wd. Vice-President), dan kaloe President, toeac Phoa Keng Hek, moefaket dengen itoe, Kaoem Pengoeroes boleh lantas minta namanja Tiong Hoa Hwe Koan Batavia ditjaboet dari daftar lid-lid Djawa Hak Boe Tjong Hwe. Djadi di dalem azas Bestuur soeda moefaket kaloeear dari itoe Persariketan.

Dengen moefaketnya President, kamoedian Tiong Hoa Hwe Koan Batavia telah oendoerken diri dari itoe persariketan.

Bahoea ini poetoesan ada menggemperken, bisa dimengarti.

Goena menerangkan sebab-sebabnya jang membuat Tiong Hoa Hwe Koan tida soeka djadi anggota Djawa Hak Boe Tjong Hwe terlebih lama,



pada 26 December 1910 telah diangkat toean Tan Tjong Long djadi oetoesan Tiong Hoa Hwe Koan ka conferentie Djawa Hak Boe Tjong Hwe, jang aken diadaken pada 8 Tiapdjiegwee 2461 (8 Januari 1911).

Samentara itoe, T. H. H. K.-T. H. H. K. laen ada berdaja aken membikin Batavia soekā hoeboeng-ken diri lagi pada itoe Persariketan.

Atas permintahannja Bestuur Tiong Hoa Hwe Koan Semarang toean Pek Sioe San telah madjoeken voorstel, soepaja Batavia soekā djadi anggota Djawa Hak Boe Tjong Hwe poela. Ini voorstel dari toean Pek telah dbitjaraken oleh Kaoem Pengeroes di dalem satoe vergadering loear-biasa pada 3 Februari 1911. Batavia menjataken tida ada kaberatan aken bersariket lagi di dalem Djawa Hak Boe Tjong Hwe, tapi boeat ini ada dimadjoeken perdjandjian begini: (1) Tiong Hoa Hwe Koan Semarang minta dengan soerat aken Tiong Hoa Hwe Koan masoek kombali djadi lid, dan (2) kaloe soeda djadi lid poela, Tiong Hoa Hwe Koan Batavia tida maoe djadi wakil dalem taon 2462, jalah taon jang sedeng dihadepken.

Oleh Tiong Hoa Hwe Koan Semarang laloe dikirim satoe oetoesan ka Batavia, jaitoe toean Song Ping Hwan, aken sampeken itoe permintahan. Satoe vergadering meloeloe boeat bitjaraken ini ceroesan telah diadaken pada 3 Maart 1911, dalem mana poen ada toeroet berhadir toean Song Ping Hwan, dan terlebih djaoe djoega toean Wong Fong Cheang, Inspecteur Djawa Hak Boe Tjong Hwe. Di dalem itoe persidangan, jang dipimpin oleh toean Tan Kim Say, Vice-President, telah diambil poetoesan boeat trimā dengan senang hati itoe oendangan dan masoek kombali djadi lid dari Djawa Hak Boe Tjong Hwe moelai pada 4 Djiegwee 2462 (4 Maart 1911), tapi djoega dengan perdjandjian, kaloe ini tida ada tersangkoet dengan Statuten dari Tjong Hwe.

Tapi ini hal soeda tida kadjadian.

Dan precies satoe taon kamoedian, jaitoe di dalem Jaarlijksche Algemeene Ledenvergadering tanggal 8 Maart 1912, ini soewal telah dimadjoeken lagi.

Pembitjarahan di dalem ini Persidangan Besar Taonan telah dilakoeken di atas dasar soeratnja Djawa Hak Boe Tjong Hwe, tertanggal „Yang Lek” 23 Djiegwee, jang minta Tiong Hoa Hwe Koan Batavia djadi lid poela. Tentang soewal ini lama djoega telah dilakoeken pertimbangan di dalem itoe Persidangan Besar. Kamoedian atas voorstelnja toean Tan Kim Say, Vice-President, ini persidangan telah memoetoesken: „Tiong Hoa Hwe Koan Betawi boleh djadi kombali Lid dari Djawa Hak Boe Tjong Hwe, tapi dengan perdjandjian, sekola Tiong Hak jang hendak didiriken di Semarang, tida dipikoel oeroesan dan ongkosna oleh itoe Persariketan, hanja dioeroes dan ditanggoeng oleh Tiong Hoa Hwe Koan Semarang sendiri, sebagai djoega Tiong Hak jang bakal didiriken di Betawi oleh Tiong Hoa Hwe Koan Betawi, kerña banjak soesah bagi Tiong Hoa Hwe Koan Betawi dan Soerabaja boeat rawatken itoe midrasah di Semarang, apabila di blakang kali Hak Boe Tjong Hwe terpindah dari Semarang”.

Memang dengan soerat tertanggal 29 Gogwee 2462 (25 Juni 1911), djadi pada sasoedanja Tiong Hoa Hwe Koan Batavia ambil poetoesan boeat masoek kombali djadi lid, atas permintahannja Tiong Hoa Hwe Koan Semarang, jang telah kirim oetoesan ka Batavia, Djawa Hak Boe Tjong Hwe telah minta Tiong Hoa Hwe Koan Batavia bantoe toendjangen aken berdiriken satoe sekola-tengah di poelo Djawa. Tiong Hoa Hwe Koan Batavia di itoe waktoe djoestroe sedeng repot daijken pendiran satoe Tiong Hak di Batavia. Maka permintahannja Djawa Hak Boe Tjong Hwe dibales dengan dibri-taoe, bahoea Tiong Hoa Hwe Koan Batavia ada senang hati dengan gerakannja Tjong Hwe dalem hal hendak mendiriken Tiong Hak, tapi Tiong Hoa Hwe Koan Batavia maoe beresken lebih doeloe soewal Tiong Hak jang Batavia soeda moelai geraken, dan kamoedian baroe nanti timbang atoerannja Tiong Hak jang Tjong Hwe niyat berdiriken.

Tapi achirnja Tiong Hoa Hwe Koan Batavia belon perna menjadi lid lagi dari Djawa Hak Boe Tjong Hwe.

RIWAJAT 40 TAON



T. H. H. K. BATAVIA

Menoeroet Djawa Hak Boe Tjong Hwe poenja salah-satoe orgaan di dalem taon 1911, itoe Persariketan ada poenia 93 anggota di dalem taon terseboet ²⁾, samentara soesoenan Bestuur di itoe waktoe ada sebagi brikoet: Voorzitter, toeant Jtjoe Ping Hie; Vice-Voorzitter, toeant-toean Be Kwat Yoe, Kwa Wan Hong; Thesaurier, toeant Oei Ik Tjoe; Adviseur, toeant The Sioe Liep, dan Commissariissen toeant-toean Oen Tik Hing, Liem Bwan Tjoe, Tjan Tjut Djie, Tjoe Hie, Siek Djwee Kioe, Kwee Oen Tiong, Liem Khiem Siang, Han Hie Kie dan Tan Boen Oen. Sebagimana orang taoe, di itoe waktoe Tiong Hoa Hwe Koan Batavia soeda brenti djadi anggotanja.

„Ini pendirian sampe pada taon 1920 soedah tida diopen lagi. Mendadak pada taon 1926 be-

¹⁾ Liat Liem Thian Joe, „Riwajat Semarang 1416 - 1931”, Semarang 1933, p. 198.

brapa orang Tionghoa di Koetoardjo bergerak boeat tjoba hidopeken poela itoe perkoempoelan, dengen pindahken kadoedoekannja ka itoe kota, serta bawa sekalian boekoe-boekoe kapoenja’annja Hak Boe Tjong Hwee. Boeat samentara waktoe kita dapat liat itoe perkoempoelan dapatken soemangget baroe; pada „Sin Po” Chineesche Editie di Batavia itoe tempo kita liat ia ada bikin perhoeboengan, dengen minta satoe pagina dari lembarannja itoe soerat-kabar setiap Saptoe boeat itoe perkoempoelan bersoeara atawa njataken pendapetannja. Tetapi belon liwat satoe taon ini tindakan poen kombali soedah dingin, sahingga sampe sekarang ini tida terdenger poela bagaimana kabarnja.“ Demikian toeant Liem Thian Joe toelis di dalem iapoenia boekoe „Riwajat Semarang 1416 — 1931”, Semarang, 1933, p. 200.

III

SEKOLA TIONG HOA HWE KOAN.

SEBAGIMANA dikatahoei, sadiek diadaken sekola Inggris, jang dinamaken Yale Institute atawa Afdeeling C, Tiong Hoa Hwe Koan boleh dibilang ada poenja doea sekolahán.

Niatan gaboeng itoe doea sekola menjadi satoe telah bisa disampeken pada permoelahan taon 1905. Pada 8 Januari 1905 Bestuur telah trima-baek poetoesannja Commissie Sekola Tjina T.H.H.K. aken qaboengken „Sekola Tjina dan Sekola Inggris T.H.H.K. djadi satoe moelain dari 1 Tjia Gwe 2456”.

Ini pergaboengan kabanjakan tjoema ada bersifat administratif dan laen dari itoe berarti djoega, bahoea sekola-sekola itoe ditaro di satoe tempat. Persatoean pladjaran, jaitoe tegesnja djadi tida ada speciaal pladjaran Tionghoa dan speciaal pladjaran Inggris, baroe tjoema dapet disampeken di dalem taon-taon jang paling blakang sadja.

Biarpoen begitoe tida bisa disangkal, bahoea satoe kamadioean ada dibikin dengan itoe tindakan, sebab pengeroesan sekola djadi ada di dalam satoe tangan atawa satoe badan.

Samentara itoe kaperloeannja moerid-moerid ada dapet perhatian sapenoehnja dari Bestuur. Pada 25 Maart 1905 ada dibilitaraken hal mendiriken satoe Fonds boeat membri pakean, memalihara, dan, kaloe ada perloe, mengirim ka Europa atawa ka laen negri anak-anak moerid Sekola Tjina T.H. H.K. jang miskin aken memadioeken lebih djaoe pladjaran marika di benoewa itoe.

Di sini kita djadi ada berhadepan dengan soewal berdiriken satoe studiefonds aken goenanja moerid-moerid jang miskin, tapi pinter.

Ini Fonds telah dipotoesken diberdiriken, dan satoe commissie telah diangkat boeat oeroes Fonds itoe, dengen terdiri dari toeantoean Lieutenant Lie Hin Liam, Voorzitter, Thung Bouw Kiat, Tan Hok Tin, Tan Kim An, Oey Koen Ie Sia dan Gouw Ek Pa, Lid, dan Kwee Kim Hong, Secretaris-Thesaurier.

Dengen poatoesan Bestuursvergadering dd. 24 Juli 1905 telah diangkat Kaoem Pengeroes baroe bagi itoe Fonds, jang ditetepken sebagai brikoet : Voorzitter, toeantoean Lieutenant Lie Hin Liam ; Lid, toeantoean Lieutenant Nio Hoey Oen, Tio Tek Hong, Lim Tjeng Siang dan Gouw Ek Pa, dan Secretaris-Thesaurier toeantoean Lie Kim Hok.

Djam berladjar ada ditetepken dari pagi djam 8.30 sampe djam 10.30, djam 11 sampe 12, dan djam 1.30 sampe 3.30 sore.

Pada 22 Juni 1905 toeantoean Tan Kim San, Ceremoniemeester, kasi taoe, bahoea ia dapet denger dari toeantoean Khoe A Fan, Vice-President T.H.H.K., bahoea satoe oetoesan dari Tjiong Tok di Kwitang dan Kwisay, di dalem perdjalanan ka Penang nanti mampir di sini aken meliat T.H.H.K. Batavia poenja sekola.

Bestuur T.H.H.K. telah minta pada toeantoean Lie Hin Liam, soepaja ia soeka kasi pake gedongnja di Tjengkareng aken djadi tempat-menginepnja itoe tetamoe T.H.H.K., sebagimana jang doeloean itoe Lieutenant soeda berboeat koetika toeantoean Kang Yu Wei dateng mengendoengi.

Sabelon taon 1905 berachir, oleh toeantoean Lieutenant Khoe A Fan ada dimadioeken satoe voorstel jang penting.

RIWAJAT 40 TAON



T. H. H. K. BATAVIA

Toean Khoe madjoeken pikiran, soepaja Tiong Hoa Hwe Koan adaken Sekola Tjina di waktoe malem, dengen toean-toean Lim Hoei Djie, goeroe-kapala, dan Jap Goan, goeroe klas 1 dari sekola T.H.H.K., sebagai goeroe-goeroenja dengen gadji masing-masing f 25.— per boelan.

Siapa jang hendak djadi moerid di dalem ini Sekola Malem, sedikitnya moesti mengarti soerat Tionghoa, samentara moerid-moerid itoe boekan moesti bajar oewang sekola, hanja sebaliknya aken dapat bajaran f 5.— per boelan.

Moerid-moerid tjoema boleh dapat pladjaran di itoe sekola paling lama 6 boelan. Djikaloe di dalem tempo 6 boelan pladjarannja tida bisa madjoe, moerid jang tersangkoet nanti dikasi kaloeear dari sekola ini.

Moerid-moerid jang soeda berladjar 6 boelan nanti dipreksa pladjaran marika satjara begini:

Djikaloe ia bisa mengarti 80% dari apa jang soeda diadjar, ia nanti dapat kapoedjian No. 1.

Djikaloe ia bisa mengarti 60% dari apa jang soeda diadjar, ia nanti dapat kapoedjian No. 2.

Djikaloe ia bisa mengarti 50%, ia nanti dapat kapoedjian No. 3, dan djikaloe pengartianya ada koerang dari 50%, ia tida dapat kapoedjian soetae apa.

Moerid-moerid dari itoe Sekola Malem jang telah dapat kapoedjian aken dikirim ka laen tempat, dimana ada sekola T.H.H.K., apabila itoe sekola T.H.H.K. minta goeroe pada T.H.H.K. Batavia, sedeng segala ongkos jang telah dikaloearkan oleh T.H.H.K. Batavia aken goencaja itoe moerid, moesti diganti oleh itoe T.H.H.K. jang hendak pake ia.

Djadi voorstel dari toean Khoe A Fan ada poenja makssoed boekan laen dari pada berdiriken satoe sekola-goeroe boeat — sebagimana jang bisa kaliatan dari lamanja pladjaran, jaitoe 6 boelan sadja, dan djoega pladjaran dibriken di waktoe malem — lever goeroe-goeroe boeat klas-klas jang rendah. Di itoe waktoe orang roepa-roepanja telah insaf kasoekeran aken dapeiken goeroe-goeroe dari Tiongkok, boeat mana kabanjakam ada diminta perloeloengan T.H.H.K. Batavia, hingga dengen djalan adaken sekola-tjalon pada sekola

T.H.H.K. Batavia hendak didapeiken satoe tjara jang gampang aken beroleh goeroe-goeroe.

Ini voorstel dari toean Khoe A Fan telah dibitjarken oleh Bestuur pada tanggal 18 October 1905, jang poetoesken minta toean Khoe A Fan berdamai tentang itoe dengen toean Liutenant Lie Hin Liam, tapi hal kasi gadji f 5.— per boelan pada masing-masing moerid ditoelak.

Ini soewal berdiriken satoe sekola-goeroe-malem, jang Bestuur kaliatannja di dalem principe soeda moefaket, di dalem taon 1905 tida dibitjarken lagi, dan baroe ditimboelken poela, koetika itoe hal dimadjoeken atawa divoorstelken oleh toean Lauw Soe Kie, satoe ambtenaar di Tiongkok jang moesti oeroes djoega soewal onderwijs, di dalem Vergadering Loear-Biasa dari Kaoem Pingoeroes pada 31 Maart 1906. Bestuur itoe waktoe ambil poetoesan boeat boska itoe Sekola Malem dengen oewang fonds jang dikoempoel dengen poengoet contributie loear-biasa, jang tida ditjam-poer pada kas dari T.H.H.K. Doeaa boelan kamoe-dian, pada 20 Mei 1906, ini soewal baroe dibitjarken lagi, dan adalah di dalem ini persidangan jang telah diambil katetepan aken bikin pertjo-bahan boeat 6 boelan lamanja dengen sekola-goeroe, samentara boeat ongkosna dikasi pake f 40.— per boelan. Pada toean Khoe A Fan diserahkan aken atoer itoe sekolah.

Ini pertjobahan boleh dibilang ada djadi jang pertama kali aken mengadaken satoe sekola-goeroe, jang aken bisa lever goeroe-goeroe pada sekola-sekola Tionghoa di Hindia-Olanda. Jang itoe soewal kamoe-dian tida diseboet-seboet lagi ada menjadi kanjatahan, bahoea itoe pertjobahan pertama telah gagal.

Satoe kadjadian jang ada harganja ditijatet di sini di antara hal-hal jang tertampak di dalem taon 1906 adalah permintahannja toean J. F. Knoetsen boeat boleh mengadjar bahasa Inggris pada moerid-moerid T.H.H.K. dengen tida trima bajaran, tapi melaenken sampe di boelan Juni atawa Juli sadja (soerat toean terseboet ada pake tanggal 16 Januari 1906) dan selama itoe tempo T.H.H.K. kasi ia makanan-makanan tjara Tionghoa dan tempat tinggal dengen pertjoema. Tapi pada 14 Maart



1906 Bestuur ambil poeoesan aken menjataken senang hati pada toean Knoetsen aken kabaekannja jang ia hendak oendjoek pada T.H.H.K., tapi dengen menjesel T.H.H.K. tida bisa trima permintaahannja, kerna tida ada sedia tempat jang baek di gedong perkoempoelan.

Itoe koetika namanja sekola-sekola T.H.H.K. soeda tersiar djoega sampe di loear Hindia-Olanda.

Boekti dari penghargaahan jang T.H.H.K.-T.H.H.K. dapatken dari loear diadjahan ini adalah soeratnja Dr. Lim Boon Keng, jang minta soepaja moerid-moerid dari sekola-sekola T.H.H.K. di Hindia-Olanda, jang soeda dapat pladjaran di klas tinggi, dikirim ka roemah-sekola Tiong Hoa Hwe Koan di Singapore boeat teroesken pladjaran marika. Ongkos saban boelan boeat satoe anak ada kira-kira 20 dollar.

Ini permintaahan dari Dr. Lim Boon Keng telah ditrima-baek oleh Bestuur T.H.H.K. Batavia pada 13 April 1906, jang poeoesken aken wartaken ini pada T.H.H.K.-T.H.H.K. di tanah Djawa, soepaja dari roemah-roemah Hak Tong itoe bisa dikirim moerid-moerid ka T.H.H.K. di Singapore.

Kaloe ini hal kadjadian dilakoeken, ini berarti, bahoea sekola-sekola T.H.H.K. di Java ada mendapat peneroesan di sekola T.H.H.K. di Singapore. Tapi soeda tida kadjadian begitoe.

T.H.H.K. Batavia pada 9 Augustus 1906 telah ambil poeoesan boeat toenda doeloe pengiriman moerid-moerid ka Singapore, sebab Kaoem Pengeroes dapat kabar, moerid-moerid jang dikirim ka Singapore melaenken di wakoe malem dapat pladjaran bahasa Tjeng-im bebrapa djam, sedeng di wakoe siang marika tjoema dapat pladjaran bahasa Inggris dan moesti bantoe kasi adjaran bahasa Tjeng-im pada moerid-moerid di Singapore. Pada Dr. Lim Boon Keng, jang dijadi T.H.H.K. poenia Eerelid, ditoelis soerat boeat menanja, bagimana di sekola Singapore diaoter hal mengasi pladjaran pada moerid-moerid jang dikirim oleh T.H.H.K. di poelo Djawa.

Inilah ada apa jang diseboet paling achir tentang itoe perhoeboengan dengen T.H.H.K. di Singapore.

Bahoea boeat oeroesan vacantie di itoe wakoe ada didapetken persatoean di antara T.H.H.K.-T.H.H.K. di Java ada ternjata dari voorstelnja T.H. H.K. Cheribon pada T.H.H.K. Batavia aken robah peratoeran vacantie saban taon dari sekalian Hak Tong. Cheribon voorstel boeat adaken vacantie itoe moelai dari 7 Tjhitgwee sampe 22 Tjhitgwee. Tapi T.H.H.K. Batavia tida ambil poeoesan menoeroet apa jang ia sendiri anggep baek. Dengan poeoesan Bestuur tanggal 11 Juni 1906 pada T.H.H.K. Cheribon dibriken balesan, bahoea perobahan atoeran Hak Tong lebih doeloe moesti dibilitarkan serta ditetepken di dalem Conferentie jang diadakan saban taon.

Sebagi sekola Tionghoa jang pertama tentoe sadja pladjaran jang dibrikin oleh T.H.H.K. Batavia bisa dipandang seperti jang paling baek boeat di Java. Tida heran jang toean Thio Sioe Hong, Secretaris-Thesaurier dari Commissie Sekola T.H.H.K., ada minta T.H.H.K. Batavia kirim satoe lid dari Commissie Sekola dan bebrapa moerid lelaki dan prampoean dari Sekola T.H.H.K. pergi ka Serang boeat kasi liat pladjarannja moerid-moerid itoe di sekolahannja Tjabang Tiong Hoa Hwe Koan di sana. Permintaahannja toean Thio telah diloeloesken pada 6 October 1906 dan padanya Bestuur T.H.H.K. titah bawa bebrapa moerid lelaki dan prampoean ka Serang boeat dioendjoe-ki pladjaran marika di dalem sekolahannja di sana. Boeat ini ia haroes berempoek terlebih doeloe dengan Commissie Sekola, sedeng ongkos perdjalanan dengen spoor di klas 2 pergi dan poelang, demikian djoega ongkos makan boeat ia sendiri dan itoe moerid-moerid tida boleh dipikoel oleh kas Tiong Hoa Hwe Koan.

Pada 9 December 1906 ada dibilitarkan telegramna Consul-Generaal Tiongkok di Singapore tertanggal 6 December 1906, jang minta T.H.H.K. kirim oetoesan ka Singapore boeat samboet Inspecteur Tan Po Tim dan Tong Hong Wie jang dioetoes oleh Pamerentah Tiongkok dateng ka Java boeat liat-liat Hak Tong-Hak Tong di sini. Sebagi oetoesan-oetoesan T.H.H.K. boeat pergi menjamboet itoe Inspecteur di Singapore diangkat toeantoean Luitenant Nio Hoey Oen, Vice-Presi-

RIWAJAT 40 TAON



T. H. H. K. BATAVIA

dent, dan Ouw Sian Tjeng, lid Commissie Sekola T.H.H.K., sementara ongkos-perdjalanannja akan dipikoel oleh pendapatan oewang oeroenan jang akan dikoempol oleh satoe commissie jang terdiri dari toean-toean Tan Hok Tin, Tan Siong Ho, Nio A Tjan dan Lie Oen Seng.

Boeat penjamboetan terlebih djaoe telah diangkat commissie-commissie akan sediaken tempat-tinggal bagi itoe oetoesan Tiongkok, akan samboet sampenia oetoesan-oetoesan itoe di Tandjong-Priok, di station kreta-api dan di gedong Tiong Hoa Hwe Koan, sedeng lebih djaoe diangkat djoega satoe Commissie Peradatan boeat selamanja oetoesan-oetoesan itoe berada di Batavia.

Koendjoengan itoe oetoesan-oetoesan dari Tiongkok poen ada dapat perhatiannja soedagar-soedagar Tionghoa di Batavia. Begitoelah kita dapat batja di dalem Notulen No. 145, bahoea oleh Bestuur Tiong Hoa Hwe Koan pada 21 December 1906 telah dipoetoesken boeat kasi gedong Tiong Hoa Hwe Koan dipake oleh soedagar-soedagar itoe akan berempoeck dalem hal menjamboet dan bikin pesta boeat kahormatannja Kimihe Taydjin jang sampe di Batavia pada 9 Tjapitgwee 2457 (24 December 1906).

Oetoesan-oetoesan jang dateng ada toean-toean Tjian Soen dan Tong Hong Wie, jang ada toeroet berhadir di dalem Perhimpoenan Loear-Biasa dari Kaoem Pengeroes tanggal 1 Januari 1907. Toean Tan Po Tim, jang ada diseboet di dalem telegram-nja Consul-Generaal Tiongkok di Singapore (itoe waktoe di Batavia masih belon ada consulaat Tiongkok), ternjata akan dateng blakangan. Tempat-tinggal dan makannja toean-toean Tjian Soen dan Tong Hong Wie brikoe pengikoet-pengikoet marika telah dioeroes dengan beres oleh satoe commissie, jang diangkat oleh Bestuur T.H.H.K. dan jang terdiri dari toean-toean Luitenant Lie Hin Liam, Eerlid T.H.H.K., dan Luitenant Lie Hin Liang. Marika ada dikasi pake gedongnjia toean Luitenant Lie Hin Liang. Tapi kadoea toean Lie itoe oendjoek pada Bestuur, bahoea boeat tempat-tinggalnja toean Tan Po Tim, jang djoega akan dateng, marika tida bisa oeroes, kerna gedong dari toean Luitenant Lie Hin Liang, jang sekarang dikasi pake

toean-toean Tjian dan Tong, kamoedian hendak digoenaaken oleh iboenja kadoea toean Luitenant itoe. Maka pada 4 Januari 1907 Bestuur minta toean Phoa Keng Hek, President, bitjaraken pada toean Tan Wie Siong, soepaja gedongnjia di Roa Malaka dikasi toean Tan Po Tim pake.

Taon 1907 telah dimoelai dengan satoe warta jang menggirangken. Pada tanggal 1 Januari 1907 telah diadaken Perhimpoenan Loear-Biasa dari Kaoem Pengeroes, dengan ada dihadirken djoega oleh toean-toean Tjian Soen dan Tong Hong Wie, itoe oetoesan-oetoesan dari Tiongkok.

Adalah di dalem itoe persidangan jang toean Tjian Soen membri-taoe pada Kaoem Pengeroes Tiong Hoa Hwe Koan, bahoea sekola Pamerentah Tiongkok di Nanking bisa trima moerid-moerid dari sekola-sekola T.H.H.K. di Java boeat meneroesken pladjaran dengan tida oesah bajar oewang sekola. Ini soewal akan ditotoerken terlebih djaoe di laen fatsal dari ini boekoe.

Pada 14 April 1907 atas prentanja beberapa lid Bestuur dan lid-biasa dari T.H.H.K. telah dikirim telegram pada Hak Boe Po di Peking boeat menjataken soekoernja hati berhoeboeng dengan diangkatnja toean Tong Hong Wie dijadi Inspecteur dari sekola-sekola T.H.H.K. di Poelo Djawa atas namanya Tiong Hoa Hwe Koan dan Tiong Hoa Siang Hwee.

Samentara itoe, oeroesan-oeroesan sekola T.H. H.K. ada meminta terlebih banjak perhatian. Soepaja semoea oeroesan-oeroesan itoe dijadi beres, beberapa lid Commissie Sekola pada 26 October 1907 ada voorstel boeat angkat satoe orang goena itoe. Toean Tan Kim San itoe waktoe laloe diangkat dijadi Directeur boeat oeroes hal-hal jang menjangkoet dengan roemah-sekola. Tapi kerna itoe waktoe masih belon ada Instructie boeat Directeur Sekola, maka ditetepken, itoe Instructie akan dikarang dengan sigrah dan keangkatan toean Tan Kim San moelai pada harian itoe Instructie ditetepken.

Instructie boeat Directeur Sekola Tiong Hoa Hwe Koan Betawi telah ditrima-baek oleh Bestuur pada 1 December 1907, dan ditetepken akan moelai berlakoe pada 1 Tjhiagwee 2459.



Menoeroet itoe Instructie, jang terdiri dari 19 fatsal dan 1 fatsal penoetoep, sebagimana Commissie Sekola demikian poen Directeur diangkat oleh Kaoem Pengeroes T.H.H.K. Di dalem oeresan pilih goeroe-goeroe boeat bekerdja di dalem sekola dan menetepken gadji marika, Directeur Sekola moesti bermoeefakatan dengan Commissie Sekola, tapi Directeur Sekola boleh lantas lepas lebih doeloe goeroe jang soeda terang kasalahannja atawa jang ternjata koerang pande, dan kaloe kadijian hal ini, ia berwadjib lantas bertaoeken itoe pada Commissie Sekola dan Kaoem Pengeroes T.H.H.K. Fatsal 6 ada bilang, bahoea Directeur haroes atoer soepaja paling sedikit saboelan sakali pladjaran moerid-moerid dipreksa oleh Commissie Sekola. Fatsal 8 ajat 2 ada briken kakoeasan besar pada Directeur Sekola, dimana ada dibilang, bahoea Directeur Sekola boleh ambil poe toesan sendiri dalem hal jang moesti dioeroes lekas, tapi tida boleh melanggar poe toesannja Kaoem Pengeroes atawa Commissie Sekola, djikaloë tida sanget perloenza. Tapi djoega Directeur Sekola, mencercet fatsal 9, wadjib taoe segala oeroesan sekola T.H.H.K. dan boeninja Tjhiang Ting (peratoeran) sekola dan ia haroes briken segala keterangan pada jang menanja tentang itoe. Fatsal 10 ada cendjoek, bahoea poe toesannja Commissie Sekola, jang tida dibertaoeken pada Directeur, tida aken dipandang sah oleh Kaoem Pengeroes. Dengan fatsal 15 Directeur Sekola ada diwadjibken boeat paling sedikit saban doea boelan sakali adaken persidangan di antara goeroe-goeroe sekola aken membitjaraken oercesan sekola, soepaja bisa diperbaiki segala apa jang koerang sampoerna.

Djadi kadoedoekannja Directeur Sekola ada penting sekali, dan boleh dibilang kakoeasanannya ada berendeng dengan kakoeasanannya Commissie Sekola.

Boeat trimu moerid-moerid dari laen-laen tempat dateng tinggal dan berladjar di dalem Hak Tong di sini dengen toeroet voorstel dari toeac Tan Kim San pada 24 December 1907 telah diambil poe toesan boeat berdiriken satoe afdeeling baroe, jang aken dinamakan Afdeeling G, dan ka dalem com-

missie boeat karang rentjana peratoerannja ada diangkat toeac Lie Kim Hok sebagai Voorzitter, dan toeac-toeac Tan Hok Tin, Khoe Siquw Eng, Gouw Ek Pa dan Hauw Tek Kong sebagai Lid-lid. Tapi kerna ditimbang pendirian ini Afdeeling G, jang aken djadi samatjem Internaat, boeat di itoe waktoe tida aken bisa diteroesken, niatan itoe pada 5 Januari 1908 telah dilepaskan.

Di itoe waktoe kaliatannja pada moerid-moerid tida dengen sembarang dibriken pladjaran Inggris, jaitoe kaloe belon didapetken kasetoedjoe-hannja masing-masing poenja orang-toea. Maka djoega lid-lid Commissie Sekola pada 18 Juni 1908 telah madjoeken voorstel, soepaja pada moerid-moerid lelaki dan prampoean jang soeda tinggi klasnya dibriken pladjaran bahasa Inggris, djikaloë marika itoe dan orang-toea marika moefaket. Bestuur ada moefaket dengen ini voorstel dan menetepken, bahoea melaenken moerid-moerid lelaki dan prampoean dari Sie Pan (klas 4) dan lebih atas boleh ditrima berladjar di dalam Sekola Inggris. Dari sini kombali ternjata, bahoea persatoean jang telah diadaken ijoema ada persatoean pengeroesan dan persatoean roemah sadja, dan tida mengenaken persatoean leerprogramma dari Sekola Tionghoa dan Sekola Inggris.

Satoe boelan kamoeidian (18 Juli 1908) oleh Directeur Sekola dimadjoeken permintahan boeat robah atoeran mengadjar dengen briken terlebih banjak pladjaran Inggris, sedeng moerid-moerid di klas Sie Pan, jang doeloe tida dapat pladjaran Inggris, sekarang nanti dibriken pladjaran itoe. Bestuur poe toesken aken serahken soewal perobahan pladjaran itoe pada Directeur Sekola, Voorzitter Commissie Sekola, dan toeac Tan Tjong Long, Lid Commissie Sekola.

Pada 3 Januari 1909 kombali dibilitaraken koendjoengannja satoe tetamoe agceng dari Tiongkok, jaitoe toeac Ong Kong Kie, dan hal Inspecteur Wong aken adaken examen boeat oedji pladjarannja moerid-moerid Hak Tong-Hak Tong deket Batavia dan moerid-moerid T. H. H. K. Batavia. Telah ditetepken boeat pake ongkos dari Kas paling banjak f 100.—, dan diangkat satoe commissie boeat atoer penerimahan toeac Ong

RIWAJAT 40 TAON



T. H. H. K. BATAVIA

Kong Kie dan segala oeroesan pada wakoe dibikin examen, commissie mana terdiri dari toeantoean Luitenant Khoe A Fan, Tan Kim San, Oey Koen Ie, Tan Siong Ho, Gouw Ek Pa, Oey Peng Lin, Oey Han Seng, Tjoe Siang Tjay, Kim Sin Long dan Tan Tjiong Long.

Satoe examen besar telah diadaken di sekola Tiong Hoa Hwe Koan Batavia pada tanggal 23—25 Siegwee 2460 (10—12 Juni 1909). Di dalem ini examen ada toeroet ambil bagian djoega moerid-moerid dari Hak Tong-Hak Tong di Garoet, Bandoeng, Bogor, Tanah-Abang, Pasar-Baroe, Serang dan Tangerang — kira-kira 30 moerid sama-sekali, demikian toean Oey Koen Ie, wd.-Directeur Sekola, ada kabarken dengen soerat pada Kaoem Pengoeroes — boeat dioedji pladjaran marika bersama-sama moerid-moerid dari T. H. H. K. Batavia. Pada tanggal 28 Siegwee 2460 (15 Juni 1909) djam 10 pagi aken dilakoeken pembagian diploma.

Berhoeboeng dengen ini examen, Kaoem Pengoeroes pada 6 Juni 1909 telah mewadjibken Commissie Pesta boeat atoer dan hias tempat di dalem Hak Tong jang dipake boeat itoe. Pada itoe commissie poen diserahkan djoega hal atoer makanan tengahari boeat goeroe-goeroe, oetoesan-oetoesan dan moerid-moerid, sedeng ongkosnya dipikoel oleh Kas sekola T. H. H. K. Tempat menoempang boeat moerid-moerid dari laen-laen tempat disediaken oleh Kaoem Pengoeroes atas ongkosnya marika sendiri.

Adalah ini examen jang telah menerbitken rasa koerang-senangnya Djawa Hak Boe Tjiong Hwe. Ini Persarikan anggep, dengen briken idzin pada Inspecteur Wong aken adaken itoe examen dan briken diploma, T. H. H. K. Batavia soeda berlakoe salah. Toeac Nio Hoey Oen, oetoesan T. H. H. K. Batavia di dalem vergadering Djawa Hak Boe Tjiong Hwe di Soerabaja, ada moefaket boeat menjataken, bahoea T. H. H. K. ada ber salah di dalem ini hal.

Satoe perobahan besar pada leerprogramma sekola T. H. H. K. jang mengenaken iapoena kadoea afdeeling — jaitoe bagian sekola Tiong-hoa dan bagian sekola Inggris — satoe hal jang

tida ada banjak diseboet di dalem Notulen sampe sabegitoe djaoe, ada dipotoesken di dalem Buitengewone Bestuursvergadering dd. 16 Mei 1910.

Dengen ini perobahan salandoetnja di dalem sekola bagian Tjeng-Im klas Ko Teng Siauw Hak diadjar sadja ilmoe bahasa dan njanjian Tjeng-Im dan hikajat Tiongkok, samentara pladjaran-pladjaran laen, jaitoe baris, ilmoe itoeng dan laen-laen lagi dimasoeken ka dalem bagian sekola Inggris. Tjara demikian bagian Inggris djadi ambil kadoedoekan jang terlebih penting, dan berhoeboeng dengen ini Bestuur perkenanken pakerdjaken lagi satoe goeroe-pembantoe boeat bagian Inggris. Memang dengen poetoesan Bestuur dd. 12 September 1909 telah diteken boeat minia kapala dari American Missionary dateng preksa sekola Inggris T.H.H.K. tiga boelan sakali.

Moelai di itoe wakoe boleh dibilang bahasa Inggris ambil rol jang terlebih besar di dalem pengidoepan onderwijs Tionghoa. Tida heran, jang pada 28 Augustus 1910 Bestuur moefaket aken poedijken toeac Rev. J. R. Denyes B. A. pada semoea Tiong Hoa Hwe Koan dan sebaginja di antero Java dan Tanah Sebrang boeat djadi Inspecteur goena marika poenja sekola-sekola Inggris. Tapi ini voorstel kaliasannja tida ada banjak hasilnya, sebab pada 16 October 1910 telah dimadjoeken pikiran laen berhoeboeng dengen toeac Denyes.

Pikiran itoe ada dimadjoeken oleh toeac Lie Hin Liam, Eerelid, dengen soerat tertanggal 29 September 1910, dan ada aken kaloearken oewang f 1000.— dari kas Afdeeling E aken bantoe ongkos toeac Denyes pergi menilik keadahan sekola-sekola di Tiongkok, djadi boeat ini toeac lakoeken samatiem studiereis, dan lebih djaoe boeat ia tjari goeroe-goeroe jang tjakek melakoeken pakerdijahan boeat kabaekannja Hak Tong dari Tiong Hoa Hwe Koan Batavia. Djikaloe perdjalanan ini tida berhasil, toeac Lie Hin Liam nanti ganti itoe ongkos f 1000.—. Kaoem Pengoeroes telah njataken moefaket dengen itoe, dan di dalem



Bestuursvergadering tanggal 16 October 1910 itoe voorstel telah ditrima-baek.

Sajang di dalem Notulen tida ada diseboet-seboet lagi, apa itoe niatan telah kadjadian didjalankan. Bisa djadi telah oeroeng dilakoeken. Tapi pada 19 Maart 1911 ada ditrima-baek voorstel Directeur Sekola aken pakerdjaken lagi 2 goeroe lelaki dan 1 goeroe prampoean, dan dari ini 3 goeroe satoe antaranja nanti dikasi dateng oleh toean Denyes dan apabila ini goeroe baek pakerdjahannja, ia nanti diangkat djadi goeroe-kapala.

Toean J. R. Denyes B. A. sendiri, menoeroet Notulen No. 221 dari Perhimpoenan Loear-biasa dari Kaoem-Pengoeroes dd. 3 Februari 1911, ada oendang T.H.H.K. mengirim wakil ka dalem conferentie dari The Malaysia Mission of the Methodist Episcopal Church di Singapore. Dari ini ada ternjata, bahoesa toean Denyes ada satoe anggota dari itoe perkoempoelan. Sebagi oetoesan-oetoesan T.H.H.K. ka dalem itoe conferenchie, jang diadakan di dalem boelan Februari 1911, telah pergi ka Singapore toean-toean Tan Kim San dan Lauw Giok Lan.

Ini oetoesan-oetoesan boekan tjoema telah wa-kilken T. H. H. K. sadja di dalem itoe conferentie dari The Malaysia Mission of the Methodist Episcopal Church, tapi djoega ada dititih boeat ha-toerken trima-kasi pada Kaoem Pengoeroes dari itoe perkoempoelan soetji, minta toendjangan aken tjariken goeroe Inggris dari Amerika boeat Tiong Hak Tong — sekola-pertengahan — jang T.H. H.K. hendak berdiriken, dan laen dari itoe poen oendang Bishop Oldham dari Malaysia Mission dateng ka poelo Djawa aken berempoek di dalem hal mendiriken itoe roemah-pergoeroehan-pertengahan.

Ada njata dari sini, jang pengiriman oetoesan-oetoesan ka Singapore ada digoenaken djoega oleh T. H. H. K. boeat kapentingan sekola T. H. H. K., atawa boeat itoe sekola-tengah jang T. H. H. K. di itoe waktoe lagi hendak berdiriken.

Di dalem rapportnya, jang dimadjoeken di dalem persidangan loear-biasa dari Kaoem Pengoeroes pada 23 Februari 1911, toean-toean Tan Kim

San dan Lauw Giok Lan ada kabarken, bahoesa Methodist Mission soeka toendjang ini niatan aken mendiriken sekola-tengah, dan ini hal nanti diterangkan di dalem soerat dari Bishop Oldham jang aken dikirim.

Kerna ini hal, biarpoen ada menjangkoet T. H. H. K. poenja bagian onderwijs Inggris, ada berhoeboeng dengen T. H. H. K. poenja ichtiar berdiriken satoe sekola-tengah, biarlah itoe oeroesan kita nanti landjoetken di dalem fatsal tentang pendirian Tiong Hak Tong. Tentang itoe perhoe-boengan dengan Methodist Mission, pada sasoe-danja dilakoeken itoe pengiriman wakil-wakil ka Singapore, kita oendjoek sadja di sini, bahoesa Bishop Oldham dengen soerat tertanggal 20 Februari 1911 membri-taoe, ia merasa senang sekali dapat berkenalan dengen T. H. H. K. Batavia dan lanjutan itoe maka di dalem boelan Juli Bishop itoe hendak dateng di Batavia aken berdoempah sendiri dengen Kaoem Pengoeroes T. H. H. K. boeat samboet kadatengan siapa T. H. H. K. telah angkat satoe commissie.

Boeat bikin sampoerna atoeran pladjaran, pada 5 September telah diangkat satoe commissie dengen sebagi voorzitter toean Wang Fung Chiang, Inspecteur Tjeng-Im, dan sebagi lid-lid toean-toean J. R. Denyes, jang ternjata di itoe waktoe ada djadi Inspecteur Inggris, Kim Heng Hoe, goeroe-kapala Tjeng-Im, C. M. Worthington, goeroe-kapala Inggris, dan Tan Kim San, Directeur Sekola, samentara toean Lim Jauw Tjiang diangkat djadi Secretaris itoe commissie.

Di dalem Bestuursvergadering dd. 17 September 1911 ada dibilitaraken voorstelnja toean Khoe An Kauw tentang hal rapport jang T. H. H. K. moesti kasi pada Ministerie Onderwijs di Peking dari hal sekola, menoeroet nota, jang disoeroe-ish oleh Inspecteur Wang Fung Chiang, dimana ada diminta taoe hal waktoe berdiriken ini sekola, siapa-siapa adanja Hoat Kie Djin, siapa adanja Tjan Seng Wan dan siapa-siapa jang soeda kasi kaloear oewang boeat moelai boeka ini Hak Tong. Itoe koetiika ada diminta keterangan terlebih djaoe pada toean Tan Kim Bo, pada siapa djoega ada diminta tjetet nama-nama jang di-

RIWAJAT 40 TAON



T. H. H. K. BATAVIA

inginken dibawa ka dalem laen vergadering. Ini poen ada djadi boekti dari perhatian jang Pamerentah Tiongkok di itoe waktoe ada briken pada onderwijs Tionghoa di sini.

Samentara itoe ongkos sekola ada terlebih besar dari pada panerimahan oewang sekola. Poekoel-rata boeat tiap-tiap satoe moerid ongkos jang T.H.H.K. moesti kaloearken ada f 5.50. Maka di dalem Bestuursvergadering dd. 7 April 1912 ada dibilitaraken soewal minta Kong Koan tambah subsidie, kerna Kong Koan poenja subsidie, djikaloe dibagi-rata di antara moerid-moerid miskin, boeat satoe moeridnja tjoema djadi f 3.— pembajaran oewang-sekolanja, hingga boeat sa-soeatoe moerid miskin T.H.H.K. daptiken karoegian f 2.50 per boelan, atawa sama-sekali di dalem satoe boelan besarnya f 375.—. Pada Secretaris laloe dititah oeroes itoe soewal minta pertoloengan terlebih banjak pada Kong Koan.

Laen dari itoe, Commissie Sekola diwadjibken kasi naek lagi paling sedikit f 0.50 oewang sekola boeat moerid-moerid jang belon dapat pertambahan pladjaran Inggris, dan lebih dari f 0.50 boeat masing-masing hakseng jang soeda dapat pertambahan ini. Djoega bantoeannja Hoen Kiok-Hoen Kiok ada diminta, jaitoe dalem hal briken 1/6 bagian dari pendapatan contributie lid-lidnja boeat bantoe menoetop karoegiannja perkoem-poelan ini selama karoegiannja masih ada begitoe besar. Menoeroet peritoengan taon 2462, jalah peritoengan paling blakang jang telah dimadjoecken sampe sabegitoe djaoe dan jang telah ditrimalbaek di dalem Jaarlijksche Algemeene Ledenvergadering dd. 8 Maart 1912, tekort jang telah didapetken di dalem itoe taon besarnya ada f 14.161.25, satoe djoemblah jang sasoenggoenja djoega boekan ketjil adanja!

Sekola T.H.H.K. itoe waktoe samingkin lama djadi samingkin besar. Djoemblah moerid-moerid jang minta tempat ada besar, hingga Commissie Sekola pada 5 Mei 1912 telah kasi taoe pada Bestuur, bahoea sekola kita di itoe waktoe soeda tida ada sedia tempat lagi aken trima moerid-moerid baroe, kerna di itoe masa djoemblahnja moerid-moerid soeda ada 557, hingga Kaoem

Pengoeroes djadi kapaksa adaken „perwatesan” dengen menetepken, apabila moerid-moerid djoemblahnja soeda ada 570 orang tida aken ditrima lagi moerid-moerid baroe. Ini poetaesan berlakoe djoega bagi moerid-moerid Gie Oh, jang dipikoel ongkosnja oleh subsidie dari Kong Koan. Hal ini diwartakan di dalem soerat-soerat-kabar dan djoega pada Kong Koan.

Djoega telah ditentoeken, Commissie Sekola tida boleh trima moerid baroe di sembarang waktoe, hanja sataon tjoema doeä kali, jaitoe sabam Tjiagwee dan Tjhitgwee boeat orang di bilangan kota Betawi sadja, tapi panerimahan moerid-moerid baroe jang berasal dari laen-laen tempat diserahkan pada pertimbangannja Commissie Sekola. Ini poetaesan poen disiarken di dalem soerat-soerat-kabar Melajoe.

Permintaan pada Kong Koan aken tambah lagi subsidie boeat moerid-moerid Gie Oh, sebagimana jang telah dipotoesken pada 7 April 1912, pada 5 Mei 1912 ditarik poelang. Itoe waktoe Kaoem Pengeroes soeda dapat laen djalan boeat toetoep tekori pengoesahan sekolah, jaitoe dengan poetaesen di dalem ini vergadering aken goenaken oewangnja Afdeeling E banjaknja f 8000.— boeat goena Afdeeling A, di bawah mana sekolah ada termasoek, dengan perdjandjian, apabila di kamoedian hari Afdeeling A soeda ada mempoenjai oewang lebih, oewangnja Afdeeling E itoe nanti dibajar kombali dengan menjitil atawa dengan secanteronja sama-sekali.

Itoe koetika T.H.H.K. poenja goeroe-goeroe Inggris banjak ada terdapat dengen perantaraan Methodist Mission. Ini perkoempoelan ada perhatiken betoel kapentingannja goeroe-goeroe jang marika telah tjariken boeat T.H.H.K. Demikianlah Methodist Mission telah madjoeken permintaan, soepaja goeroe-goeroe jang ia tjariken tjoema bekerdj 200 hari di dalem satoe taon. Ini permintaan, jang telah dibilitaraken di dalem persidangan Kaoem Pengeroes dd. 29 December 1912, telah tida bisa diloeloesken oleh Bestuur, jang tjoema bisa briken pada itoe goeroe-goeroe 10 hari koerang boeat marika adaken conferentie



di Batavia, laen dari itoe marika moesti bekerdjia kira-kira 219 hari di dalem satoe taon.

Apa jang T.H.H.K. telah berboeat bagi moerid-moerid prampoean ada harganja boeat ditjatet.

Sebagimana orang taoe, di waktoe baroe diberdiken T. H. H. K. poen ada poenja angeng-angen aken mengadaken satoe sekolahans speciaal bagi anak-anak prampoean. Tapi blakangan, kerna ini sekolahans boeat anak-anak prampoean meloeloe belon bisa diijiptaken, maka anak-anak prampoean djadi ditrima berladjar djoega di dalam sekola anak lelaki.

Bagi ini anak-anak prampoean diadaken pendjagahan speciaal, kerna boeat marika diadaken . . . djoeroe-pendjaga moerid-moerid prampoean!

Ini pakerdahan telah dipegang oleh njonja Louw Giok Nio, jang telah djadi djoeroe-pendjaga moerid-moerid prampoean tida koerang dari 18 taon lamanja. Ini hoedjin telah letaken djabatanja di dalem taon 1920, dan sebagai tanda penghargaan pakerdjahannja itoe njonja, padanja dengan poatoesan Kaoem Pengeroes tanggal 25 Augustus 1920 dibriken toendjangan f 7.50 per boelan, tapi ini hoedjin telah toelak itoe pembruan toendjangan. Hingga di dalem hal jang menjangkoet dengan pladjaran bagi anak-anak prampoean Tionghoa haroes dibilang njonja Louw Giok Nio ada toeroet mempoenjai bagian djoega!

Di antara pladjaran-pladjaran jang dibriken pada moerid-moerid prampoean ada djoega pakerdahan-tangan, pladjaran mana ada ditaro di bawah penilikannja satoe commissie njonja-njonja, jang boeat taon 1905 - 1906 ada terdiri dari njonja-njonja Luitenant Khoe A Fan, Tan Kim San, Kan Hok Hoei dan Tjee Hoei Tjeng. Ini commissie penilikian pakerdahan tangan blakangan telah dihapoesken. Pada 2 November 1912 ada diangkat satoe commissie njonja-njonja boeat preksa pakerdahan-tangan dari moerid-moerid prampoean. Njonja-njonja Tian Teng An, Lim Wie Keng dan Lie Kang Sœy telah diangkat djadi anggota-anggota itoe commissie. Barang-barang pembikinan moerid-moerid dipotoesken aken dikirim djoear-

pada toko V.O.S., dan itoe commissie njonja-njonja dibri hak aken tentoeken harganja sasoeatoe barang itoe dengen bermoeifiketan sama 2de Secretaris, toeacn Khoe An Kauw. Itoe koetika djoestroe baroe berselang 2 boelan, jang dengen voorstelnja toeacn Tan Tjong Long Kaoem Pengeroes tetepken aken tambah terlebih banjak pakerdahan-tangan bagi moerid-moerid prampoean (poatoesan Bestuur dd. 7 September 1912).

Satoe incident berhoeboeng dengen moerid-moerid prampoean poenja pladjaran Inggris telah diberesken oleh Bestuur dd. 7 September 1912. Directeur Sekola, itoe koetika toeacn Hauw Tek Kong, telah prenta moerid-moerid sekola prampoean di bagian Ko Teng Siauw Hak aken berladjar bahasa Inggris saban hari 4 djam. Tetapi moerid-moerid prampoean jang tersangkoet roepa-roepanja tida soeka toeroet itoe prenta, oleh kerna moerid-moerid itoe soeda bebrapa kali dateng di kantoor Secretaris aken madoekken kaberratan marika dengen mengendoek, bahoea marika merasa sanget perloe madoekken pladjaran bangsa sendiri. Toeacn Khoe An Kauw, Secretaris Commissie Sekola, soeda madoekken ini oeroesan di dalem itoe Bestuursvergadering dengen oendjoek djoega, bahoea Directeur Sekola poen soeda taoe kainginannja itoe moerid-moerid prampoean.

Bestuur tida moefaket dengen kahendakannja Directeur Sekola, dan tetepken pladjaran Inggris bagi moerid-moerid prampoean saban hari 2 djam seperti doeloe dengen tida oesah toeroet atoeran jang berlakoe bagi moerid-moerid lelaki.

Selama itoe waktoe sekola T.H.H.K. tentoe sdja tida terloepoet dari karewelan-karewelan goeroe-goeroe.

Di dalem taon 1914, boeat seboet sadja satoe tjonto, sekola T.H.H.K. telah clamken pertjidrahan antara goeroe-kapala dan goeroe-goeroe-pembantoe. Broentoeng itoe hal telah bisa dibikin beres; Bestuur itoe waktoe soeda minta pertoeloengannja toeacn Tong Hong Wie di Tiongkok boeat oendang goeroe-kapala dari Tiongkok.

IV

PENGIRIMAN MOERID-MOERID KA NANKING.

*T*AON 1907 tida bisa dimoelaiken dengan terlebih baek lagi bagi T.H.H.K.

Itoe koetika di Batavia ada dateng toean Tjian Soen, Secretaris dari Legatie Tiongkok di Den Haag, dan ini toean ada toeroet berhadir di dalam Perhimpoenan Loear-Biasa dari Kaoem Pengoeroes, jang diadaken pada 1 Januari 1907.

Dengan soeratnja tertanggal 17 Tjap-iigwee 2457 (jalah 1 Januari 1907) toean Tjian Soen ada mengabarken pada Bestuur T.H.H.K., bahoea di sekola Pamerentah Tiongkok di Nanking moerid-moerid dari sekola T.H.H.K. di poelo Djawa boleh dateng meneroesken pladijarn, dengen tida oesah bajar oewang sekola. Tempat-tinggal dan makan poen nanti ditanggoeng oleh kas Pamerentah Tiongkok, hingga moerid-moerid itoe melacenkoen moesti sediaken oewang boeat beli pakean dan boeat blandja hari-hari. Bermoela nanti ditrima sadja sampe sadjoembah 30 moerid aken dateng berladjar di itoe sekola di Nanking.

Itoe ambtenaar Tiongkok poen ada kasi taoe djoega, bahoea toean Tong Hong Wie, jang dateng bersama-sama di sini dan jang djoega ada toeroet berhadir di dalam itoe vergadering, soeka anter moerid-moerid jang hendak masoek ka itoe sekola sampe di Nanking dan sekalian oeroesken halnja moerid-moerid itoe pada Tjongkok di sana.

Di dalam ini oeroesan jang penting Kaoem Pengoeroes soeda minta keterangan terlebih djaoe dengen moeloet pada toean Tjian Soen, jang telah tetepken apa jang ia toelis di dalam soeratnja.

Secretaris kasi pikiran kirim telegram pada Tjongkok di Nanking dengen pertoeloengannja

toean Tjian Soen boeat dapetken kasaksian jang sah. Ini voorstel telah ditrima-baek dan toean Tjian Soen diminta toeloeng karangken telegram itoe, jang diloelesken olehnya. Ongkos kirim ini telegram ditanggoeng oleh kas Afdeeling E Tiong Hoa Hwe Koan.

Itoe sekola di Nanking adalah Kay Lam Hak Tong, jang disediaken boeat anak-anak Hoakiauw jang tinggal di loear Tiongkok.

Berbareng dengen diambilnja poetesan boeat dengen telegram dapetken kapastian terlebih djaoe dari pembesar jang berwadjib di Tiongkok, di dalam itoe vergadering tanggal 1 Januari 1907 Kaoem Pengoeroes soeda adaken tindakan-tindakan terlebih djaoe boeat bisa lakoeken pengiriman moerid-moerid dengen lekas ka itoe sekola di Nanking.

Satoe commissie, jang terdiri dari toean-toean Nio Hoey Oen, Vice-President, Lie Hin Liam, Eerelid, Oey Koen Ie, secretaris Commissie Sekola, Tan Kim San, lid Commissie Sekola, dan Tan Kie Lam, lid biasa dari T.H.H.K., dan dikapalaken oleh Inspecteur Wang Fung Chiang, telah diangkat boeat pilih moerid-moerid sekola T.H.H.K. jang mempoenai pengartian tjoekoep dan jang soeka teroesken pladijarn ka Kay Lam Hak Tong di Nanking.

Tentang ongkos pergi ka Nanking ada dipotoesken, bahoea moerid-moerid dari klas „Ka” dan „It” boleh dapat ongkos kapal di klas II pergi dan poelang dari kas Afdeeling E Tiong Hoa Hwe Koan. Tapi djikaloe djoemblahnja moerid-moerid itoe ada terlaloe besar hingga kas Afdeeling E



tida mampoe pikoe itoe ongkos-kapal aken dipilih sadja bebrapa antara itoe moerid-moerid oleh commissie dengen mengimbangi kakoeantan-na kas Afdeeling E, sedeng jang laen-laen, kaloe maoe djoega pergi ka Tiongkok, moesti dibajari ongkos-kapalna oleh masing-masing poenja orang-toea.

Delapan-belas hari kamoedian — pada 18 Januari 1907 — kombali Bestuur telah adaken vergadering speciaal boeat ini oeroesan peneroesan pladjaran ka Tiongkok.

Toean-Toean Gouw Ek Pa, The Tjeng Ka dan Tan Kie Lam diangkat djadi lid-lid commissie boeat bitjaraken ongkos-kapal pada salah-satoe kantoor kapal-api goena moerid-moerid jang aken dikirim ka Nanking.

Soewal penjedahan ongkosna dipoetoesken terlebih djaoeh diserahkan pada toean Lie Hin Liam, voorzitter dari Afdeeling E Tiong Hoa Hwe Koan. Kaloe dirasa perloe, toean Lie dipoetoesken boleh pake oewang dari kas afdeeling E boeat talangi terlebih doeloe ongkos-ongkos itoe, jang kamoedian moesti digani kombali oleh orang-toeanja moerid-moerid itoe dengan menoeroet peratoeran dan perdjandjian jang aken ditetepken olehhna.

Boeat anter itoe moerid-moerid ka Nanking dikirim satoe antara lid-lid Kaoem Pengeroes, jaitoe toean Thio Sek Liang, 2de Secretaris. Ongkos-djalannja oetoesan ini pergi dan poelang dengen kapal-api di klas II sabagian nanti dipikoei oleh kas Afdeeling E dan sabagian lagi oleh orang-toeanja masing-masing moerid jang pergi, sebagimana jang nanti ditimbang oleh Voorzitter Afdeeling E.

Tiap-tiap boelan, salaennja pembajaran ini, orang-toea moerid-moerid diwadjibken meniiipken djoega sadjoembla oewang pada kas Afdeeling E boeat oewang-blandja hari-hari dari itoe moerid-moerid di Nanking. Besarnya ini oewang-blandja nanti ditetepken oleh Voorzitter Afdeeling E, jang diwadjibken mendjaga dan mengeroes pengiriman itoe oewang ka Nanking.

Toean Thio Sek Liang itoe wakoe ada pegang pakerdahan pada firma Lam Ho Hoat di Pintoek Ketjil. Boeat mintaken verlof bagi ia aken lakoe-ken itoe kawadjiban manganterken moerid-moe-

rid ka Nanking dari iapoenna chef, jaitoe toean Oen Kheng Hian, diangkat satoe commissie jang terdiri dari toean-toean Luitenant Nio Hoey Oen, Vice-President T.H.H.K., dan Luitenant Lie Hin Liang, Commissaris T.H.H.K.

Oeroesan lakoeken pemilihan moerid-moerid boeat dikirim ka Nanking dan mintaken verlof bagi toean Thio Sek Liang ada berdjalan dengen loeroes, hingga berselang lagi satengah boelan sadja, jaitoe pada 2 Februari 1907 boeat pertama kali telah brangkat 21 moerid dengen teranter oleh toean Tong Hong Wie, bekas goeroe T.H.H.K. Batavia, dan toean Thio Sek Liang.

Dari Shanghai dengen soerat tertanggal 21 Februari 1907 toean Thio Sek Liang kabarken, bahoea koetika ia brangkat dari Singapore di dalam perdjalanan ka Nanking toean Thio Sioe Kiat di Singapore ada anterken 2 krandjang djeroek Tjina dan 10 kaleng biskoewit dan toean Tan Moeng Tho ada briken 1 krandjang djeroek Tjina boeat moerid-moerid makan di tengah djalan. Toean Thio Sek Liang minta Kaoem Pengeroes T.H.H.K. kirim soerat pada kadoea toean terseboet aken hatoerken trima-kasi. Pada 24 Maart 1907 Bestuur telah loeloesken itoe permintahan.

Tentang perdjalananja manganterken moerid-moerid rombongan jang pertama ka Nanking oleh toean Thio Sek Liang telah diadaken lezing di gedong T.H.H.K. boeat orang banjak pada hari Minggoe 7 April 1907.

Tentang ongkos moerid-moerid jang dikirim berladjar ka Nanking ada ditrima oleh Kaoem Pengeroes T.H.H.K. Batavia satoe soerat dari toean Oen Peng Tiong, Directeur dari Kay Lam Hak Tong di Nanking, jang djoega ada mengabarken tentang pri kasehatan serta pladjarannja itoe moerid-moerid di sana. Bestuur T.H.H.K. Batavia telah ambil poetoesan dd. 6 October 1907 aken tjiat soerat itoe dan bagi-bagiiken dengen pertjoe-ma pada masing-masing orang-toea dari itoe moerid-moerid dan djoega pada semoea perkoem-poelan T.H.H.K. atas ongkosna T.H.H.K. Batavia. Di antara itoe moerid-moerid rombongan pertama memang ada djoega moerid-moerid dari T.H.H.K. T.H.H.K. di laen-laen tempat.



Dari satoe moerid jang berladjar di Nanking, toean Thio Ek Shan, ada ditrima soerat jang mengasi-taoe, bahoea kabarnja Kay Lam Hak Tong di Nanking hendak trima lagi moerid-moerid dari Java. Ini oeroesan telah djadi punt peroendingan dari vergadering Bestuur pada tanggal 24 December 1907. Kerna itoe koetika Djawa Hak Boe Tjong Hwe soeda berdiri, Kaoem Pengeroes ambil poe-toesan boeat minta Djawa Hak Boe Tjong Hwe, sebagai persarikatan dari Hak Tong-Hak Tong, atoer dan oeroes hal kirim lagi moerid-moerid dari sekola-sekola di Java ka Nanking.

Pengiriman moerid-moerid poela lantas djoega soeda dilakoeken; pada 24 Mei 1908 diambil poe-toesan boeat kabarken itoe pada toean Tong Hong Wie.

Bagimana dengen itoe moerid-moerid jang dikirim ka Nanking, dan bagimana marika diperlakoeken di sana?

Bceat katahoei ini kita rasa baek oendjoek apa jang didjawab oleh Kaoem Pengeroes T.H. H.K. Batavia di atas pertanahan ka-13 dari toean L. H. W. van Sandick, Controleur, sebagimana jang itoe telah ditrima-baek di dalam Buitengewone Bestuursvergadering dd. 25 October 1908.

Pertanahan Van Sandick ada sebagai brikoet: Brapa banjaknja anak-anak Tionghoa jang soeda dikirim ka Tiongkok aken beroeroe, apa Pamerentah Tiongkok membri toendjangan pada marika dan mengapa ia lakoeken itoe?

Djawaban jang dibriken atas itoe ada:

Sebagimana jang Bestuur Tiong Hoa Hwe Koan Betawi soeda taoe, anak-anak moerid jang soeda terkirim ka Tiongkok (Nanking) aken teroesken pladjarannja dalam sekola jang lebih tinggi (mid-delbare school) di sana, jaitoe 111 orang.

Pamerentah Tiongkok ada bri pertoeloengan dalam hal itoe, dan sebabnja ini brangkali dengan maksoed aken bisa goenaken anak-anak itoe boeat djadi pegawe negri, terlebih lagi djikaloe Tiong Kok soeda dapat djalan aken lakoeken politiekna di tanah-tanah asing (buitenland), jaitoe boeat djadi Consul-Consul dan sebaginjia.

Pada itoe djawaban ada dibrikoetken katerangan lebih djaoe sebagai brikoet:

Moela-moela, tatkala Pakoempoelan Tiong Hoa Hwe Koan baroe terdiri, tiada sekali ada di'inget atawa diniat aken mengirim moerid-moerid te-roesken pladjarannja di negri Tjina, kerna bestuur Tiong Hoa Hwe Koan tiada brani harep jang dalam hal itoe Pamerentah Tjina nanti bri bantoean.

Aken tetapi Sri Padoeka Toewan Tjian Soen, doeloe Secretaris Gezantschap Tjina di Den Haag, dan Toewan Tong Hong Wie, bekas goeroe sekola Tiong Hoa Hwe Koan Betawi, koetika dateng di poelo Djawa dalam taon 1906, ada membri taoe pada bestuur Tiong Hoa Hwe Koan Betawi, lantaran senang hati mendapat kabar dari hal gerakannja Pakoempoelan-pakoempoelan Tiong Hoa Hwe Koan di Hindia Nederland ini dalam perkara memadjoeken soerat dan bahasa Tjeng Im, Pamerentah Tjina soeka trima moerid-moerid dari sekola-sekolanja Pakoempoelan-pakoempoelan itoe, aken teroesken peladjarannja di Nanking, di bawah perlindoengannja Radja-Moeda Toan Hong di sana.

Maka di tanggal 2 Februari 1907 telah berangkat pertama kali 21 moerid ka itoe negri, dengan teranter oleh Toewan Tong Hong Wie.

Radja-Moeda Toan jang djadi Gouverneur-Generaal di Nanking, soedah trima itoe anak-anak dengen manis boedi dan kasi rawatan dan makanan jang baik di dalam gedong besar jang disediaken boewat marika itoe atas ongkosnya Negri Tjina. Kemoedian dengan pertoeloengannja Gouverneur-Generaal Toan, salaennja oewang sekola dan kitab-kitab, jang memang dari bermoela dipikoei oleh negri, Pamerentah Tjina soedah tanggoeng djoega oewang blandja (zakgeld) dan laen-laen, hingga orang-toewa dari anak-anak itoe melinken misti kaloe arken sadja ongkos-kapal-api dari Poelo Djawa ka Nanking dan sedikit oewang boewat beli pakean.

Ada beberapa orang dari antara moerid-moerid itoe, jang toelis-menoelis soerat pada orang-toewan ja di sini, jang dia-orang di Nanking dirawat dengan baik sekali, maka ija-orang merasa teramat senang tinggal beladjar di sana, hingga tida ada satoe dari marika itoe jang merasa kapengen poelang ka Djawa, sabelonnja tamat peladjarannja.



Laen dari rawatan baik, anak-anak itoe ada di-djandijken, jang djikaloe soedah tamat dalam peladjarannja di negri Tjina, ija-orang nanti dibri sempat aken kaloewar dari sana dengan ongkos negri ka negri asing, saperti : Japan, Amerika atawa Europa, boewat meloewaskens ilmoe pengata-hoeannja.

Pada tanggal 13 September 1908 dengan teranter oleh saorang soeroehan dari Gouverneur-Generaal Toan Hong, ada poelang kombali dari Nanking ka Djawa saorang moerid atsal dari sekola di Malang, lantaran sakit loempoeh. Tetapi sesampenna di daratan Semarang, itoe moerid soeda djadi semboeh dari penjakit itoe.

Dan pada tanggal 5 October 1908, tempo itoe soeroehan berangkat poelang ka Nanking, ija ada bawa lagi 38 moerid sekola Tiong Hoa Hwe Koan dari poelo Djawa ka sana. Anak jang baroe semboeh itoe minta toeroet kombali ka Nanking, tetapi itoe soeroehan tiada brani trima permintaannja, kerna toeroet prentah doctor dari sekola di Nanking, anak itoe sedikitnja misti tinggal satoe tahun di poelo Djawa baroe boleh kombali ka Nanking lagi.

Demikian ada apa jang Bestuur sendiri ada toe-toerken di dalem keterangan pada toean Van Sandick.

Perlakoean dari Radja-Moeda Toan Hong pada moerid-moerid dari sekola-sekola Tiong Hoa Hwe Koan di Java, menoeroet keterangan beberapa toean-toean jang doeloe telah dikirim ka Nanking, memang ada manis sekali. Demikian pada kita ada diteloerken, bagimana kaloe Radja-Moeda Toan Hong lagi kaloear djalan-djalan dengen kretanja dan di djalanannya katemoe satoe moerid dari Lamyang, ia soeka adjak moerid itoe doedoek bersama-sama ia di kretanja. Malahan kabarnya moerid-moerid itoe begitoe disajang oleh Radja-Moeda Toan Hong, hingga goeroegoeroe takoet pada itoe moerid-moerid, sebab kaloe dateng mengoendjoengi sekolahchan, Radja-Moeda itoe soeka menanja pada moerid-moerid, goeroegoeroe mana jang marika anggep bang-pak !

Demikian sadiek itoe waktoe djadi T.H.H.K.-T.H.H.K. ada poenia samatjem sekola-peneroesan boeat moerid-moeridnya.

Tentang Kay Lam Hak Tong baek kita koetib di sini apa jang ditoelis di dalem artikel „Onderwijs Tionghoa di Indonesia“, di dalem „Sin Po Jubileum-Nummer 1910 — 1935“ :

„Laen boekii dari Tiongkok poenia perhatian pada Hoakiauw poenia pergoeroean-pergoeroean T.H.H.K. adalah tentang didirikennja pergoeroean di Nanking oentoek anak-anak Hoakiauw, jaitoe Kay Lam Hak Tong. Ini pergoeroean dimaksoedken boeat segala Hoakiauw, boekan Hoakiauw dari Indonesia sadja ; tapi adalah moerid-moerid Hoakiauw dari Java jang pertama isiken Kay Lam Hak Tong. Roepaanja pamerentah Tiongkok niat bikin Kay Lam Hak Tong sebagai pergoeroean jang lebih tinggi oentoek moerid-moerid Hoakiauw kaloearan sekolahkan rendah di Lamyang teroesken peladjarannja di tanah laloehoer. Tapi ada banjak anak-anak Hoakiauw jang belon loeloes dari sekola rendah soeda dikirim ka Nanking, hingga Kay Lam Hak Tong djadi pelihara Tionghak dan Koteng-Siauw hak.“

Oleh Kay Lam Hak Tong perna dikirim oetoesan-oetoesan ka Hindia-Olanda. Demikian di dalem boekoe Notulen ada tertjetet jang pada 29 September 1908 Bestuur T.H.H.K. telah trima-baek ongkos-ongkos jang soeda terpake goena menjamboei kadatengannja oetoesan Kay Lam Hak Tong di Batavia besarnja f 170.—, dengen lebih doeoe poengoet oewang oeroenan dari antara orang-orang jang soeka kasi dan sakoerangnja kas sekola T.H.H.K. jang aken pikoel. Doeoe taon kamoe-dian, dalem taon 1910, ada dateng toean Teng Han Tjhay di Hindia-Olanda sebagai oetoesan dari itoe sekolahkan.

Samentara itoe tida semoea sekola T.H.H.K. sanggoep tanggoeng ongkos pergi ka Nanking dari moerid-moeridnya. Lantaran menghadepi hal demikian Tiong Hoa Hwe Koan Hoen Kioek Bandoeng dengen soerat tertanggal 11 Maart 1909 soeda minta T.H.H.K. Batavia kasi bantoean oewang dari kasnja boeat ongkos bebrapa moerid jang kapingin teroesken pladjaran marika ka

RIWAJAT 40 TAON



T. H. H. K. BATAVIA

Nanking, tapi tida mampoe kaloearken ongkos sendiri. Tapi kas T.H.H.K. Batavia tida bisa pikoel moerid-moerid dari Tjabang-tjabangnya, maka pada 28 Maart 1909 diangkat toean-toean Luitenant Lim Soey Seng, Khoe Siauw Eng dan Lim Tjeng Siang djadi lid-lid dari commissie boeat poengoet oeroenan dari pendoedoek Tionghoa di Bandoeng dengan ditentoeken, bahoea ini commissie baroe aken brangkat ka itoe tempat, apabila Hoen Kiek itoe maoe pikoel ongkos-djalannja pergi-poelang.

Pada 13 Maart 1910 telah diambil poeoesan aken angkat toean-toean Tjoa Kim Goan, Tan Tjiong Long dan Nio Peng Long djadi oetoesan T.H.H.K. ka Nanking boeat hatoerken hormat pada Tjongtok dan masing-masing Kay Lam Hak Tong Tangsoe, dan lebih djaoe boeat sekalian tengoki moerid-moerid poelo Djawa jang ada berladjar di dalem Hak Tong di sana. Toean Nio Peng Long telch pergi ka Tiongkok.

Samentara itoe pembajaran oetang-oetang moerid-moerid, brangkali berhoeboeng dengan marika poenia oewang-blandja, kaliaitannya telah tida kadadiam dengan litjin, kerna dengan iantgal post Shanghai 17 November 1910 Kay Lam Hak Tong ada kirim soerat pada T.H.H.K. Batavia, minta oetangnya moerid-moerid poelo Djawa, jang berladjar di sana, dikirimken dengan lekas, kerna kas itoe midrasah sendiri ada perloe oewang. T.H.H.K. Batavia telah kirimken salinannja itoe soerat dari Kay Lam Hak Tong pada Djawa Hak Boe Tjong Hwe dengan minta dikasi keterangan, apa oewang jang T.H.H.K. Batavia bebrapa kali kirim boeat bajar percetangannya bebrapa moerid soeda dikirim teroes ka Nanking atawa belon. Pada itoe midrasah di Nanking dibales soerat, jang merangken, bahoea itoe ada oeroesannja Djawa Hak Boe Tjong Hwe.

Sekarang kita sampe pada taon 1911, itoe taon jang penting di dalem hikajatinja Tiongkok, kerna adalah di dalem itoe taon jang di sana telah pe-tjeh revolutie, jang moelai di Wuchang pada 10 October 1911, dan berachir dengan berdirinya Republiek Tiongkok.

Toedjoe moerid dari T.H.H.K. Batavia, jang ada berladjar di Kay Lam Hak Tong, jaitoe toean-toean

Yap Djoe Ho, Tan Ho Seng, Gouw Goan Tek, Tjee Hoei Po, Pouw Ke Soey, Tan Tek Boan dan Tjio Kim Tjiong, pada iantgal 25 October 1911 ada kirim satoe telegram dari Nanking, jang ditrima di Batavia pada 27 October 1911, boeninja: „hoe-roehara wisselkawat tjihitpehkhoo“, jang maksoednya: „Di Nanking ada hoeroe-hara, minta dikirim wissel dengan kawat besarnya \$ 700.— boeat ija-orang“.

Ini telegram tentoe sadja membikin kaget pada Kaoem Pengoeroes T.H.H.K., jang lantas adaken satoe perhimpoenan loear biasa dari Kaoem Pengoeroes pada hari esoknya, djadi pada 28 October 1911, dengan dihadirken djoega oleh Majoor Khouw Kim An, Beschermheer.

Betoel di dalem itoe telegram tida ada diseboet, boeat apa itoe moerid-moerid minta dikirimken oewang, tapi toch boleh didoega dengan pasti, bahoea marika ada ingetan goenaken itoe boeat ongkos poelang ka Batavia.

Aken tetapi boeat dapet katentoean bener-tidanna kabar hoeroe-hara itoe, di dalem itoe vergadering ada dibatijken djoega telegramnya Tjongtok di Nanking, jang terkirim dari sana pada iantgal 21 October 1911 pada Hoa Siang Tjong Hwe Batavia dan ditrima di sini pada 27 October 1911, dimana ada dikabarken, kota Nanking tida terantjem bahaja dan moerid-moerid poelo Djawa ada slamat. Djoega dibatijken circulairena Djawa Hak Boe Tjong Hwe di Semarang tertanggal 3 Kauwgwee 2462 (24 October 1911), jang oendjoek, bahoea di Nanking tida ada terbit hoeroe-hara, hingga tida oesah dislempangken soeatoe apa.

Lantaran begitoe, dan djoega dengan menginget boeninja telegram dari President Universiteit di Nanking pada toean Worthington, goeroe-kapala dari sekola Inggris T.H.H.K. Batavia, maka Voorzitter, toean Nio Hoey Oen, rasa tida perloe dibijakken lagi hal hoeroe-hara, hanja dioeroes sadja permintachannja itoe 7 moerid. Kaoem Pengoeroes ada moefakat dengan anggepannya Voorzitter dan tanja pada 4 hakhoe, jang toeroet berhadlir di dalem itoe vergadering, apa marika soeka loeloesken itoe hakseng-hakseng poenia permoehoeinan.



Sekalian hakhoe jang berhadir lantas minta T.H.H.K. panggil poelang anak-anak marika dari Nanking.

Sasoeda ini soewal diroendingken, telah diam-bil poetoesan (1) trima-baek permintahannja hakhoe-hakhoe jang hendak panggil poelang anak-anak marika dari Nanking dengan adaken sendiri ongkos-kapalnja, jang apabila soeka boleh djoega diminta T.H.H.K. toeloeng kirimken ka Nanking atas pikoelannja hakhoe-hakhoe, (2) T.H. H.K. moesti lantas kirim lagi telegram, satoe pada Radja-Moeda di Nanking, aken moehoen kabar, bagimana moesti dia-toer halnja moerid-moerid poelo Djawa jang ada di sana, dan satoe kawat pada To Tai di Shanghai aken minta ini kapala-negri pindaken moerid-moerid Lamyang dari Nanking ka Shanghai dan lindoengken marika itoe, dari jang mana telegram kadoea adalah bermak-soed kaloe bener kota Nanking ada terantjem ba-haja, soepaja soeda ada sedia soecatoe tempat jang baek bagi moerid-moerid poelo Djawa melindoengken diri di bawah pendjagahannja pem-besar negri, dan (3) menoelis pada Djawa Hak Boe Tjong Hwe di Semarang aken kabarken apa jang soeda dibilitaraken dan dipotoesken dan har-rep djoega, soepaja Tjong Hwe poen sanantiasa nanti ambil daja-oepaja aken mendjaga kasla-matannja moerid-moerid dari Java jang ada di Nanking selama di Tiongkok ada hoeroe-hara.

Satoe minggoe kamoedian, pada 4 November 1911, kombali telah diadaken satoe Buitengewone Bestuursvergadering dengan dihadirken djoega oleh hakhoe-hakhoe jang berkapentingan. Ini ver-gadering dipimpin oleh toean Luitenant Liauw A Joeng.

Punt pertama dari agenda adalah soewal Djawa Hak Boe Tjong Hwe kirim telegram kombali aken minta idzin pake oewang \$ 2000 boeat ban-toe atoer oeroesannja moerid-moerid dari Lam-yang dari Kay Lam Hak Tong jang berada di Shanghai. Itoe koetika T.H.H.K. Batavia soeda brenti djadi anggota dari itoe Persariketan, hing-ga tentang ini diambil poetoesan boeat bales ka-wat pada Djawa Hak Boe Tjong Hwe, bahoea

T.H.H.K. Batavia soeda tida djadi lid lagi, maka tida bisa kasi soeara.

Tentang moerid-moerid jang berada di Shang-hai, dengen menoeroet hakhoe-hakhoe jang ber-hadir poenja pikiran, jaitoe kaloe masing-masing poenja anak ada di Shanghai, diambil poetoesan boeat panggil poelang itoe moerid-moerid. Lebih djaoe, berhoeboeng dengen ongkosnja, ada dite-tepenken boeat tiap-tiap satoe moerid orang-toeanja moesti tipken oewang f 100.— pada kas T.H.H.K. Pada hakhoe-hakhoe jang koerang mampoe ada dibriken kalonggaran di dalem hal jang berhoe-boeng dengan itoe penitipan oewang.

Begitoelah petjahnja Revolutie di Tiongkok soeda membuat moerid-moerid T.H.H.K. dipanggil poelang.

Ada ternjata, bahoea pada itoe dieman itoe pengiriman moerid-moerid ka Tiongkok, ata-wa terlebih betoel dibilang berladjar-teroesnja moerid-moerid ka Tanah Leloehoer, ada dengen penjampoeran-tangan dan pengoeroesannja Ka-oem Pengeroes T.H.H.K., teroetama di dalem ba-gian financien dari itoe oeroesan. Di dalem wak-toe blakangan ini keadahan tentoe sadja berubah. Moerid-moerid jang landjoetken pladjaran ka Tiongkok tjoe ma daptken soerat-soerat katera-ngan jang perloe berhoeboeng dengan pladjaran marika dan hal-hal jang laen masing-masing oeroes sendiri.

Sebagi penoetoep ini fatsal tentang pengiriman moerid-moerid ka Nanking kita koetib di sini apa jang ada ditoelis di dalem „Sin Po Jubileum-Num-mer 1910 - 1935“ didalem artikel „Onderwijs Tiong-hoa di Indonesia“ tentang keadahan terlebih djaoe dari Kay Lam Hak Tong dan moerid-moerid jang landjoetken pladjaran di Tiongkok :

„ . . . Seperti soeda dioendjoek Kay Lam Hak Tong telah didiriken di taon 1906. Dari bermoela berdiri sampe di taon 1911 pada sabelonnja petjahnja Revolutie di Wuchang, Kay Lam Hak Tong telah trim a kira-kira 200 moerid Hoekiauw dari Indonesia sadja.

„Waktoe masih ada Kay Lam Hak Tong sabelon-nja berdiri pamerentah Republiek, anak-anak Hoekiauw jang dikirim ka Tiongkok kabanjakan

RIWAJAT 40 TAON



T. H. H. K. BATAVIA

koempoel dalem itoe pergoeroean. Satelah Kay Lam Hak Tong dikoebraken berhoeboeng sama itoe Revolutie jang bikin djato pamerentah Boan, moerid-moerid Hoakiauw jang dikirim ka Tiongkok lantas terpentjar ka banjak pergoeroean. Blakangan oleh pamerentah Republiek Kay Lam Hak Tong diboeke lagi dengen nama Kay Lam Hak Hauw di Nanking dan kamoedian dipindaken ka Chenyu, Shanghai, dengen dirobah djadi Tayhak

(Universiteit). Tapi Chinan University boekan meloeoe boeat moerid-moerid Hoakiauw, hanja terboeka djoega boeat moerid-moerid di Tiongkok. Dan itoe waktoe anak-anak Hoakiauw soeda biasa landjoetken pelajaran di Tiongkok dengen terpentjar dalem berbagi-bagi midrasa, hingga tjoema sebagian jang ketjil masoek di Chinan University."

V

ICHTIAR BERDIRIKEN SEKOLA - TENGAH (TIONG HAK).

ATOE sekola tida bisa madjoe, kaloe moerid-moerid kaloearan sitoe tida ada dapat kasempatan aken landjoetiken pladjaran marika terlebih djaoe. Tegesnya satoe sekola-tengah moesti ada.

Jang soewal ini ada dapat perhatian sapenoehnya dari Kaoem Pengeroes T.H.H.K. Batavia ada terboekti dari niatan berdiriken satoe sekola-tengah.

Di dalem djawaban pada 14 pertanjahannja toeac L.H.W. van Sandick di dalem boelan October 1908 ada dioendjoek djoega di waktoe mendjawab peritanjahan ka-14, jaitoe „apa T.H.H.K. ada berhoeboeng djoega sama lain-lain pakoem-poelan di dalem atawa di loear Hindia Olanda?”, bahoea boeat diriken satoe sekola-tengah di poelo Djawa Ministerie van Onderwijs di Peking soeda djandijken oewang 20.000 thail perak, sedeng boeat pikoe ongkos-ongkosnya itoe, Radja-Moeda Toan Hong di Nanking soeka kasi 6000 thail perak sataon.

Pada 9 Juni 1909 telah diangkat satoe commissie boeat djalanken lijt oeroenan aken goena mendiriken Tiong Hak Tong di poelo Djawa. Di dalem ini commissie ada berdoedoek toeac-toeac Nio Hoey Oen, Oey Boen Hoey, Tan Hok Tin, Nio Peng Long, Tan Kim An, Tan Kim San, Be Swie Teng, The Tong Po, Tan Siong Ho, Oey Peng Lin dan Oey Koen Ie.

Ini commissie tanggoeng, jang ia aken bisa dapatken oewang sadjoemla f 1900.—.

Kerna ada ini tanggoengan, maka Bestuur bri idzin pada Secretaris boeat toelis soerat pada Djawa Hak Boe Tjong Hwe di Soerabaja aken ka-

barken, bahoea T.H.H.K. Batavia bisa bantoe f 2000.— boeat berdiriken sekola-tengah di poelo Djawa, kerna sekarang Pamerentah Tiongkok soeda kirim subsidie \$ 2800.— boeat itoe.

Djadi niatan boeat adaken Tiong Hak Tong bermoela ada dengan maksoed berdiriken itoe boeat seantero poelo Djawa, samentara jang atoer ada Djawa Hak Boe Tjong Hwe.

Kamoedian pada 28 Augustus 1910 toeac Lie Hin Liam, Eerelid T.H.H.K., madjoeken voorstel boeat diriken Tiong Hak dengan dihoeboengken sama Tiong Hak jang hendak ditijiptaken oleh toeac Denyes, pembesar dari perkoempoelan Methodist Amerikaansch, tapi bahasa dan pladjaran Inggris hendak didjadiken bahasa dan pladjaran jang teroetama, sedeng bahasa dan pladjaran Tjeng-im didjadiken pladjaran kadoea.

Kaoem Pengeroes telah njataken moefaket dengan itoe. Ditentoeken, itoe Tiong Hak aken berdiri sendiri dalem hal jang mengenaken kasja, dan lebih djaoe pada toeac-toeac Lie Hin Liam, Eerelid, Tan Kim San, Directeur Sekola, dan Denyes, Inspecteur Sekola Inggris T.H.H.K., dibri koeasa aken atoer halnja itoe Tiong Hak, bikin peratoerannja, pilih tempat kadoedoekannja dan tjariken oewang jang perloe bagi itoe sekola-tengah.

Di dalem ini soewal Tiong Hoa Siang Hwe poen diminta pertoeloengannja, kerna pada 10 Februari telah diambil poetoesan, Bestuur Tiong Hoa Hwe Koan dan Bestuur Tiong Hoa Siang Hwe nanti sama-sama kirim soerat boeat minta toendjangan-nya Majoor Oey Tiong Ham di Semarang.

RIWAJAT 40 TAON



T. H. H. K. BATAVIA

Commissie pendirian Tiong Hak Tong di residentie Batavia pada 23 Februari 1911 ditambah anggota-anggotanya dengan toean-toean Tan Kie Lam, Tan Hok Tin dan Tan Tjiauw San.

Adalah di dalem itoe vergadering djoega, jang toean-toean Tan Kim San dan Lauw Giok Lan, jang telah dioetoes ka Singapore aken hadlirken vergadering dari Methodist Mission, telah madjoecken rapport dari perdjalanan marika, djoega berhoeboeng dengan permintahan toendjang pada Methodist Mission aken tjariken goeroe-goeroe boeat Tiong Hak Tong jang hendak diberdiriken dan oendang Bishop Oldham dari Malaysia Mission dateng di poelo Djawa aken bikin perdamian tentang pendirian itoe roemah-pergoeroehan-pertenagahan. Toean-toean Tan dan Lauw menerangkan, bahoea Methodist Mission soeka toendjang itoe niatan aken berdiriken Tiong Hak Tong dan ini hal nanti diterangkan di dalem soerat dari Bishop Oldham jang sedikit hari poela tentoe aken dapat ditrima oleh T.H.H.K. Batavia.

Soerat dari Bishop Oldham, tertanggal 20 Februari 1911, ada mengoendjoek, bahoea ia merasa senang sekali dapat berkenalan dengan T. H.H.K. Batavia dan soeka membantoe ini perkoem-poelan dalem hal memadioeken pladjaran. Berhoeboeng dengan itoe di boelan Juli 1911 ia hendak dateng di Batavia aken berdoempah sendiri dengan lid-lid Bestuur T.H.H.K.

Berhoeboeng dengan ini pada 19 Maart 1911 diangkat satoe commissie boeat samboet kadatengannja Bishop Oldham di Batavia.

Samentara itoe, Peratoeran Tiong Hak soeda rampoeng dikarang oleh Commissie Tiong Hak, jang meminta lebih djaoe, soepaja pada semoea perkoempoelan T.H.H.K. dan sebaginjya di Hindia Nederland, demikian djoega orang-orang harta wan Tionghoa dikirimken circulaire dan inteken-lijst aken meminta marika sekalian soeka bantoe menoendjang oewang bagi ongkosnia Tiong Hak, jang hendak diberdiriken oleh perkoempoelan Malaysia Methodist Mission di Buitenzorg.

Itoe Peratoeran Tiong Hak telah ditrima-baek oleh Bestuur pada 19 Maart 1911, dan circulaire

jang dimaksoedken oleh itoe commissie aken di-siarken.

Ampat boelan kamoedian Djawa Hak Boe Tjong Hwe, jang sedeng iichtiarken pendirian Tiong Hak di poelo Djawa, ada minta T.H.H.K. Batavia bantoe toendjang itoe.

Sebagimana soeda ditoetoerken, di itoe koetika T. H. H. K. Batavia sendiri sedeng asik berdaja aken diriken satoe sekola-tengah di residentie Batavia. Dengan adanja ini dijadi tida heran jang pada 17 Juli 1911 diambil poetesan boeat bales pada Djawa Hak Boe Tjong Hwe, bahoea T. H. H. K. ada senang hati dengan gerakannja Tjong Hwe dalem hal mendiriken satoe Tiong Hak, tapi T. H. H. K. Batavia maoe beresken terlebih doeloe soewal Tiong Hak jang T. H. H. K. Batavia soeda moelai geraken; kamoedian baroe T.H.H.K. Batavia nanti timbang peratoerannja Tiong Hak jang Djawa Hak Boe Tjong Hwe hendak berdiriken.

Tapi di dalem itoe vergadering djoega, sasoedanja poetesenken boeat kasi balesan demikian pada Djawa Hak Boe Tjong Hwe, ada dibilitarkan hal koebrahken Commissie Tiong Hak, kerna telah ternjata, bahoea itoe maksoed berdiriken Tiong Hak tida aken bisa dapat disampeken, oleh kerna sabagian besar dari Hak Tong-Hak Tong jang dikirimken soerat oleh commissie tida kirim balesan apa-apa, sedeng antara jang membales ada beberapa jang menjataken tida setoedjoeh. Begitoe-lah itoe commissie dikoebrahken, dengan terlebih doeloe diwadjibken bajar poelang sebagimana pantes semoea oewang jang bebrapa Hak Tong soeda kirim dan soeda ditrima oleh commissie pendirian Tiong Hak Tong.

Tapi ini kagagalann jang membikin T. H. H. K. Batavia dijadi poetoes harepan.

Baroe sadja berslang doe minggoe lebih sa-diek diambil itoe poetesan, telah diangkat lagi satoe commissie boeat mendiriken Tiong Hoa Hwe Koan Tiong Hak Tong di dalem residentie Batavia, di dalem Buitengewone Bestuursverga-dering dd. 5 September 1911.

Sebagi Voorzitter dari itoe commissie baroe ada diangkat toean Liauw A Joeng, Secretaris toean Hauw Tek Kong, dan Leden toean-toean Lie Hin



Liam, J. R. Denyes, Tan Hok Tin, Tan Kim Say, Tan Tjiuw San, Tan Kim San, Buchanan, Nio Hoey Oen, Tan Tjong Long dan Pek Sioe San. Pada 15 October 1911 toean Tan Kim Say diangkat jadi Vice-Voorzitter, dan toean Tan Hok Tin jadi Kassier dari Commissie Tiong Hak.

Dari sini pakerdahan berdiriken satoe sekola-tengah ada berdjalan dengen terlebih litjin.

Toeau Louw Koei Hong, jaitoe goeroe-kapala pertama dari sekola T. H. H. K., jang di itoe waktoe berada di Pemalang, dengen poetoesan Bestuur dd. 9 Juni 1912 dioendang boeat bekerdja jadi goeroe-kapala di Tiong Hoa Hwe Koan Tiong Hak Tong dengen gadji f 100.— dan dapat oewang sewah roemah f 15.— saboelan, tapi dengen perdjandjian, apabila goeroe Tiong Hak, jang telah dioendang dari Tiongkok, soeda sampe di sini, ia wajib melepaskan djabatannja. Eerste Secretaris, toeau Tan Kim Bo, diserahkan hal karang rentjana Instructie Tiong Hak.

Di dalem Jaarlijksche Algemeene Ledenvergadering dd. 25 Februari 1913 lid-lid telah trimabæk pendirian Afdeeling Tiong Hak Tong, dan berbareng dengen itoe djoega pendirian Afdeeling E, jang masing-masing ada poenja kas jang terpisah.

Dengen begitoe T.H.H.K. jadi ada poenja Afdeeling Sekola Tengah di seblahnja iapoena Afdeeling Sekola Tionghoa dan Afdeeling Sekola Inggris. Kita soeda bilang, persatoean sekola Inggris dengen sekola Tionghoa tjoema ada menge-naken soewal pengeroesan dan tempat sadja, jaitoe doe-a-doea sekola itoe ditaro di dalem satoe gedong, tapi laen dari itoe boleh dibilang masing-masing ada berdiri sendiri dengen masing-masing ada poenja goeroe-kapala sendiri. Ini Tiong Hak Tong djoega ada di satoe tempat, tapi pengeroesan dan kasnja ada terpisah.

Kaperloean bahasa Olanda di itoe waktoe ada dirasaken. Maka di dalem Bestuursvergadering tanggal 29 December 1913 ada dibilitjaraken permintahannja bebrapa orang, soepaja di dalem Tiong Hoa Hwe Koan Tiong Hak Tong moelai 1 Januari 1914 pada saban hari Rebo dan Saptoe ditambah 2 djam pladjiran bahasa Olanda dan

soepaja njonja G. Kooyker diangkat jadi goeroe itoe bahasa dengen ditambah gadjinja f 40.—. Bestuur telah moefaket dengen itoe dan Commissie Tiong Hak Tong diserahkan kawadjiban aken atoer itoe.

Djalannja itoe Sekola Tengah tida ada sebagi mana jang diharep. Moerid-moerid jang berladjar di satoe tida ada tjoekoep banjak, hingga dengen tjara demikian ongkosna itoe Tiong Hak Tong tentoe sadja jadi tida bisa dipikoe.

Maka itoe pada 8 Maart 1915 Commissie Tiong Hak Tong kasi taoe pada Bestuur, bahoea moelai 1 Maart 1915 Sekola-Tengah itoe aken ditoetoep boeat sabegitoe lama sampe soeda ada djoembah moerid paling sedikit 20 orang, berhoeboeng dengen mana moelai boelan Maart 1915 gadji boeat goeroe-goeroe Inggris, Olanda dan Tjeng-im dari Tiong Hak Tong tida dibajar lagi. Bestuur trimabæk itoe penoetoepan, dan Secretaris diwadibiken boeat wartaken hal-toetoepna itoe Tiong Hak Tong dengen soerat Tionghoa pada soedagar-soedagar jang soeda briken oewang oeroenan bagi pendiriannja itoe Sekola-Tengah dan bantoe oewang donatie sambil hatoerken trimakasi pada marika.

Kagagalannja Tiong Hak Tong jang pertama tentoe sadja gampang dimengarti. Itoe Sekola-Tengah poen ada diangkat jang pertama jang orang Tionghoa di Hindia Olanda berdiriken, dan dengen begitoe di sini orang diangkat belon ada poenja pengalaman dengen itoe matjem onderwijs. Bahoea hal atoer satoe Sekola-Tengah tentoe sadja ada meminta terlebih banjak tenaga dan ada terlebih soesah, ini poen gampang dimengarti. Djoega tida haroes dilopaken, satoe Tiong Hak Tong tentoe sadja ada mengandel pada sekola-sekola-rendah boeat dapat moerid-moerid. Satoe sadja dari ini factor-factor tida terpenoeh, berdirin ja satoe Tiong Hak Tong nistjaja tida ada tertanggoeng.

Sekola-Tengah jang pertama dari T. H. H. K. jadi kandas lantaran kakoerangan moerid-moerid.

Bahoea ini kagagalannja tida membikin orang jadi moendoer, ternjata di kamoedian hari.

VI

TIONG HOA HWE KOAN DAN ONDERWIJS OLANDA.

*P*ERHOEBOENGAN Tiong Hoa Hwe Koan dengen pladjaran bahasa Olanda di dalam sekolah-an-sekolahan T.H.H.K.-T.H.H.K. dan djoega dengen onderwijs Olanda dari Pamerentah bagi anak-anak Tionghoa ada dijadi satoe bagian jang menarik hati di dalam riwajatnja T.H.H.K. Batavia. Adalah djoega boeat ini onderwijs Olanda jang toean Phoa Keng Hek di dalam iapoenja dijabatan President dari T. H. H. K. Batavia telah mengadep audience pada G. G. Van Heutsz.

Memang di dalam iapoenja „Soerat Kiriman kapada sekalian Orang bangsa Tjina”, oleh Bestuur T.H.H.K. ada dibilang djoega sasoedanja oetaraken maksoednja aken berdiriken Sekola Tionghoa: „Djikaloe Pakoempoelan ini bisa madjoe di dalam halnja, sabagimana jang diharap, maka nanti diadaken djoega roemah sekola boeat anak-anak lelaki peladjarin bahasa Olanda dan Inggris”. Djadi malahan ada diinget terlebih doeloe pada pladjaran bahasa Olanda dari pada pladjaran bahasa Inggris, satoe keadahan jang brangkali tida banjak orang njanch dengen meliat pada kadoedoekan jang penting dari bahasa Inggris di dalam sekola-sekola T.H.H.K.-T.H.H.K. sampe pada bebrapa taon jang laloe.

Di dalam lima taon pertama dari berdirinya Tiong Hoa Hwe Koan soewal pladjaran bahasa Olanda soeda bebrapa kali dijadi punt pembitjahan dari ini perkoempoelan. Permintaan boeat mengadaken loterij oewang besarnja f 200.000,—, jang telah dipoetoesken boeat dimadjoeken pada Pamerentah oleh Kaoem Pengeroes pada 27 Mei 1902, poen ada dengen maksoed boeat berdiriken

satoe sekola aken mengadjar bahasa-bahasa Europa, dalem mana ada termasuk djoega bahasa Olanda. Malahan sampe ditrima tawaran djoega dari orang-orang jang hendak mengadjar bahasa Olanda dan . . . bahasa Fransch !

Dengan perkoempoelan Nederlandsch Verbond Afdeeling Batavia telah diadaken perhoeboengan. Inj perkoempoelan dengen soeratnja dd. 29 Januari 1905 telah menanja, brapa besarnja subsidie jang T. H. H. K. kahendaki aken berdiriken satoe sekolah-an Olanda. Pada 26 Februari 1905 Bestuur T. H. H. K. telah ambil poetoesan boeat kabarken pada Nederlandsch Verbond itoe, bahoea oleh kerna maoe dibriken subsidie T.H.H.K. sanggoep djoega aken mengadaken satoe Sekola Olanda, sekola mana memang ada sangat diungginken oleh T. H. H. K., dan soepaja ongkos dijadi ketjil, T. H. H. K. hendak tjampoer Sekola Olanda itoe di dalam Sekola Tjina T.H.H.K. dengan teratoer sebagimana jang nanti ditimbang baek oleh Commissie Sekola T.H.H.K.

Nederlandsch Verbond kamoedian, pada 16 April 1905, ada toelis soerat pada T.H.H.K., dengen mana ia kabarken, bahoea ia tida bisa menjampeken permintahannja T.H.H.K. tentang hal gceroe Olanda sebagimana jang ada termaksoed di dalam Kaoem Pengeroes T.H.H.K. poenja soerat tertanggal 18 Maart 1905. Tetapi ini perkoempoelan berdjandji, bahoea sebrapa boleh ia nanti bantoe toendjang permoehoenannja T.H.H.K. pada Pamerentah di dalam hal mengadaken loterij oewang.



Blakangan Nederlandsch Verbond Afdeeling Batavia ada poedijken toean De Priester pada Kaoem Pengeroes T.H.H.K. aken djadi goeroe bahasa Olanda di dalem roemah-sekola T.H.H.K. Tapi T.H.H.K. tida bisa briken laen balesan dari pada, bahoea kaloe soeda dapat idzin aken mengadaken loterij oewang, baroe bisa dipakerdja ken satoe goeroe boeat mengadjar bahasa Olanda di roemah-sekola T.H.H.K.

Di dalem boelan Juni 1906 kombali ada jang menawarken boeat mengadjar bahasa Olanda, jaitoe nona Kiewiet de Jonge, jang ada poenja akte aken mengadjar bahasa Olanda, Fransch dan Inggris. Ini penawaran kombali telah moesti ditoelak, dengen dioendjoek, bahoea di itoe koeтика T.H.H.K. belon ada poenja ingetan boeat kasi pladjaran bahasa Olanda.

Doea boelan kamoedian kombali ditrima lamaran boeat djadi goeroe bahasa Olanda, jaitoe dari toean D. K. N. Selier, goeroe-sekola pensioen, pada siapa Kaoem Pengeroes telah kasi djawanban, bahoea di itoe waktoe T.H.H.K. belon bisa boeka sekola bahasa Olanda, hingga perminta-hannja itoe toean tida bisa diloeloesken.

Kamoedian dengen soeratnja tertanggal 27 September 1906, jang dialamatken pada toean Phoa Keng Hek, Directeur van Onderwijs, Eeredienst en Nijverheid, Mr. J. G. Pott, membri-taoe, bahoea Pamerentah lagi menimbang hal meloeasken pladjaran bangsa Tionghoa, dengen djalan briken bantoean atawa toendjangan pada sekola-sekola particulier, enz.

Maka tentang hal ini ada diminta pikirannja President T.H.H.K., tjara bagimana jang baek diteloeng oleh Pamerentah. Djoega ditanja, djikaloë ditimbang ada perloe didiriken sekola boeat bangsa Tionghoa sadja, sekola matjem apa jang ada teroetama bagi bangsa Tionghoa dan di tempat mana paling doeloe sekola itoe haroes didiriken.

Di dalem riwajat T.H.H.K. tida bisa disangkal lagi, bahoea ini ada satoe sa'at penting, oleh ker-na ada dioendjoek, bahoea pertama Pamerentah sedeng timbang aken briken toendjangan pada sekola-sekola particulier, dan kadoea bahoea

Pamerentah ada bajangken niatan aken berdiri-ken satoe sekolahna speciaal bagi bangsa Tionghoa. Ini niatan jang terseboet blakangan kamoe-dian telah memimpin — sebagimana orang taoe — pada pendirian dari H.C.S.-H.C.S. bagi anak-anak Tionghoa di dalem taon 1908 dengen satoe leerplan, jang kira-kira ada bersamahan dengan leerplan dari Europeesche Lagere School.

Bagimana pikiran Kaoem Pengeroes T.H.H.K. berhoeboeng dengen itoe pertimbangan-pertim-bangan Pamerentah?

Bestuursvergadering speciaal, jang telah diadakan pada 21 October 1906, berhoeboeng dengen itoe telah ambil poe-toesan boeat kasi pikiran pada toean Phoa Keng Hek, soepaja ini toean kasi penjaotan atas soeratnja Directeur van Onderwijs, Eeredienst en Nijverheid, bahoea lebih baek Pamerentah kirim goeroe atawa goeroe-goeroe jang tergadji oleh negri aken bri pladjaran bahasa Olanda, ilmoe itoeng dan ilmoe boemi pada moerid-moerid dari klas tinggi di dalem Sekola Tjina Tiong Hoa Hwe Koan selama Tiong Hoa Hwe Koan belon koeat pikoe gadjinja goeroe-goeroe itoe. Lebih djaoe dibri taoe, bahoea pakerdjahannja goeroe-goeroe itoe baek ditaro di bawah papreksahannja Inspecteur sekola Negri, dan djoega bahoea moerid-moerid dari sekola Tiong Hoa Hwe Koan tida bisa berladjar teroes antero hari di dalem pladjaran bahasa Olanda.

Djadi tentang toendjangan Pamerentah pada sekola-sekola T.H.H.K. Kaoem Pengeroes merasa lebih baek Pamerentah kirim satoe atawa lebih goeroe-goeroe pada sekola T.H.H.K. aken mengadjar bahasa Olanda dan beberapa vak laen dengen digadji oleh Pamerentah dan ditaro di bawah penilikannja Inspecteur Sekola Negri. Dari sini kombali ada ternjata, bahoea T.H.H.K. kapingin sekali bisa briken djoega pladjaran bahasa Olanda di dalem iapoenja sekola, tjoema sajang sebab-sebab financien membuat itoe tida bisa disampeken.

Sasoeda diambil ini poe-toesan pada itoe tang-gal 21 October 1906, jang djato pada hari Minggoe, laloe diadaken lagi satoe Perhimpoenan Loear-biasa pada hari Minggoe brikoetnja, djadi pada 28 October 1906, djoega boeat bitjaraken

RIWAJAT 40 TAON



T. H. H. K. BATAVIA

soewal soeratinja Directeur van Onderwijs, Eeredienst en Nijverheid.

Ini vergadering loear-biasa telah diadakan, oleh kerna — sebagimana pada permoelahan itoe vergadering ada diterangkan — sasoe danja hari Minggoe jang telah laloe vergadering ditoe-toep, ada 1 - 2 Lid Bestuur dapat ingetan, bahoea ada baek sekali, djikaloe pada waktoe membijaraken hal membre penjaoetan atas soerat-pertanjahannja Directeur van Onderwijs, Eeredienst en Nijverheid itoe, ada toeroet berhadir djoega wakil-wakil Kaoem Pengeroes dari Tjabang-tjabang T.H.H.K. boeat bantoe kasi pikiran pada Kaoem Pengeroes dalem hal membre penjaoetan itoe. Hal ini Secretaris lantas tjetat aken dibertaoeken pada President, jang koetika itoe soeda poelang. Pada hari esoknya dari Tjabang T.H.H.K. di Tanah Abang Bestuur ada trima satoe soerat tertanggal 22 October 1906, demikian djoega dari Tiong Hoa Hak Tong Pasar Baroe (Weltevreden), dan esokannya lagi dari Tjabang Tiong Hoa Hwe Koan di Tangerang, dengan mana ada diminta, soepaja Tjabang-tjabang dan perkoempelan Tiong Hoa Hak Tong itoe boleh bantoe kasi pikiran tentang hal membales soerat itoe dan diadakan lagi Perhimpoenan Loear-biasa dari Lid-lid Pengeroes dengan membatalken poatoesan-nya vergadering loear-biasa dari Kaoem Pengeroes pada 21 October 1906.

President timbang, permintahannja kadoea Tjabang T.H.H.K. itoe dan djoega Tiong Hoa Hak Tong di Pasar Baroe haroes ditoeroet, kerna dengan dapat bantoean pikiran dari sana-sini Kaoem Pengeroes TH.H.K. boleh djadi bisa bri penjaoetan jang terlebih sampoerna. Maka President telah tentoeken aken bikin lagi Perhimpoenan Loear-biasa dari Lid-lid Pengeroes pada hari terseboet, Minggoe 28 October 1906, dengan menitahkan djoega mengoendang semoea Tjabang T.H.H.K., anggota-anggota Commissie Sekola T.H.H.K. dan bebrapa Oud-Commissaris T.H.H.K., begitoe djoega Tiong Hoa Hak Tong Pasar Baroe aken berhadir di dalem ini persidangan.

Tjabang T.H.H.K. di Poerbolinggo telah kirim toeant Gan Thian Tik, Ceremoniemeester; Tjabang

T.H.H.K. di Indramajoe toeant Theng Liang Eng, Secretaris; Tjabang Tiong Hoa Hwe Koan di Tangerang toeant Louw Tjeng Giok, Secretaris; Tjabang T.H.H.K. di Serang toeant Tjoa Hoet Pie, Vice-President; Tjabang T.H.H.K. Tanah Abang toeant Tjo Ma Tjouw, Commissaris, dan Tiong Hoa Hak Tong di Pasar Baroe kirim sebagai oetoesan toeant-toean Tio Tek Hong dan Lie Kim Hoay, Commissaris dan Secretaris, samentara Tjabang-tjabang T.H.H.K. di Bandoeng dan Tjiandjoer kasi kabar dengen telegram, bahoea marika aken toeroet sadja poatoesan-nya vergadering. Oud-Commissaris jang dateng ada toeant-toean Lie Kim Hok dan Oey Soan Tek.

Di dalem itoe vergadering loear-biasa ada dibijaraken, apa baek :

a. Minta Gouvernement trima anak-anak bangsa Tionghoa di dalem sekola-sekola Gouvernement di Hindia-Nederland dengen menoeroet peratoeran dan pembajaran jang dilakoeken pada bangsa Europa ?

b. Minta Gouvernement boeka sekola jang perloenia boeat bangsa Tionghoa sadja? Dan sekola apa serta dimana moesti diboeka?

c. Minta Gouvernement kirim sadja goeroegoeroe-sekola di Sekola Tjina Tiong Hoa Hwe Koan di Batavia, sebagimana jang telah dipoetoesken oleh Perhimpoenan Loear-biasa pada Minggoe jang laloe?

Wakil dari Tjabang T.H.H.K. Serang pikir, baek diminta apa jang diseboet pada bab a. Wakil dari Tjabang T.H.H.K. Tanah Abang poen rasa baek begitoe, sebagimana djoega adanja pikiran wakil dari Tiong Hoa Hak Tong Pasar Baroe. Tetapi wakil-wakil dari Tjabang-tjabang T.H.H.K. di Poerbolinggo, Indramajoe dan Tangerang ada moefaket dengen bab c. Toeant-toean Lie Kim Hok dan Oey Soan Tek moefaket dengen bab a, sedeng dari antara lid-lid Commissie Sekola ada 4 jang setoedjoeh dengen bab a dan 3 sama bab c.

Pemoengoetan soeara di antara Lid-lid Bestuur berkasoedahan dengen 17 soeara boeat a dan 6 soeara boeat c.

Sebagi hasilnya pemoengoetan soeara laloe diambil poatoesan di dalem itoe vergadering tang-



gal 28 October 1906 aken membatalken poetoessannja Sidang Loear-biasa dari Kaoem Pengeroes pada 21 October 1906 dan kasi pikiran pada toean Phoa Keng Hek, President, boeat kasi penjaoetan atas soerat pertanjahannja Directeur van Onderwijs, Eeredienst en Nijverheid dd. 27 September 1906 sebagimana jang ada diseboet di bab a, djadi: Minta Gouvernement trimā anak-anak bangsa Tionghoa di dalem sekola-sekola Gouvernement di Hindia-Nederland dengan menoeroet peratoeran dan pembajaran jang dilakoe-ken pada bangsa Europa.

Di dalem hal meloeasken onderwijs bagi bangsa Tionghoa, Pamerentah boekan tjoema menajaken pikirannja President T.H.H.K. Batavia sadja, hanja djoega dari Tiong Hoa Tjong Hwee di Semarang. Ini Persariketan dengen soerat dd. 29 October 1906 telah minta T.H.H.K. poenja pikiran, jang mana baek dipilih antara ini doe:

- a. Apa Gouvernement baek boeka roemah-sekola Tjeng-im seperti adanja sekarang?
- b. Apa Gouvernement lebih baek kasi subsidie dan kaloe perloe boeka sekolahannya bahasa Olanda djoega?

Pada T.H.H.K. ditanja djoega, apa T.H.H.K. anggep perloe diboeka Conferentie aken membitaraken hal itoe.

Bestuur ambil poetesan pada 6 November 1906 aken minta keterangan lebih doeloe pada Tjong Hwee, apa boenjinja soerat pertanjahan jang ditrima oleh (dari? — N.J.L.) toean H. Borel, Ambtenaar voor Chineesche Zaken di Semarang, ada sama boenjinja atawa tida dengen soerat pertanjahan jang ditrima oleh President Tiong Hoa Hwee Koan Batavia dari Directeur van Onderwijs, Eeredienst en Nijverheid. Salinan soerat jang terseboet blakangan ini ada dikirimken pada Tjong Hwee.

Pada tanggal 2 December 1906 oleh T.H.H.K. Batavia telah diadaken Buitengewone Algemeene Ledenvergadering boeat tanja pikiran lid-lid tentang hal-hal jang ada diseboet di bab a, b dan c berhoeboeng dengen soeratnja Directeur van Onderwijs, Eeredienst en Nijverheid.

Vergadering itoe dipimpin oleh toean Phoa Keng Hek dan ada dikoendjoengken, salaennja oleh anggota-anggota Bestuur, oleh 35 lid biasa.

Lid-lid jang tinggal di laen-laen tempat ada njataken pikiran marika dengen soerat, dan itoe ada sebagai brikoet:

Medan 1 lid kasi soeara boeat bab a,
Malang 1 lid kasi soeara boeat bab a,
Tegal 1 lid kasi soeara boeat bab a,
Pemalang 1 lid kasi soeara boeat bab a,
Fort de Kock 1 lid kasi soeara boeat bab a,
Krawang 1 lid kasi soeara boeat bab a, b dan c,
Medan-Deli 22 lid kasi soeara boeat bab a
dan c.

Padang-Pandjang 1 lid njataken toeroet poetesan perhimpoenan,

Soemedang 1 lid idem,

Serang 1 lid idem,

Tjampea 1 lid kasi soeara boeat bab a, dan

Soekaradja 1 lid kasi soeara boeat bab c,
samentara dari lid-lid di Batavia ada 4 jang
njataken pikiran dengen soerat, dari jang ma-
na 3 ada moefaket dengen bab a dan 1 dengen
bab c. Tjabang T.H.H.K. Indramajoe njataken
menoeroet sadja poetesan perhimpoenan.

Di dalem itoe Buitengewone Algemeene Ledenvergadering bebrapa lid ada menjataken pemandangan marika, bahoera djikaloe tjoema diminta Pamerentah trimā dengen gampang anak-anak Tionghoa di dalem sekola Gouvernement dengen menoeroet peratoeran dan pembajaran jang berlakoe bagi bangsa Europa, jaitoe seperti jang ada terseboet pada bab a, moerid-moerid sekola T.H. H.K. dan sebaginjaa tida dapet kabagian dari koernianja Gouvernement, sedeng maksoednja Gou-
vernement adalah hendak menoeloeng semoea orang Tionghoa di Hindia Nederland ini.

Hal menoendjang sekola-sekola particulier jang soeda ada, poen tiada berfaeddah bagi maksoednja Pamerentah, kerna salaennja itoe semoea goeroe-goeroe tiada mempoenjai diploma, sekola-sekola particulier tida ada terdiri di koeliling tempat.

Minta Pamerentah diriken sekola-sekola Olanda boeat bangsa Tionghoa sadja, sebagimana jang ada terseboet pada bab b, hal ini poen ditimbang

RIWAJAT 40 TAON



T. H. H. K. BATAVIA

ada berat, kerna hal itoe tida bisa lekas kadjanian.

Laen dari begitoe lantaran tida bertjampoeran sama anak-anak Olanda, moerid-moerid dari sekola-sekola itoe tida bisa djadi lekas pinter dalem pladjaran marika.

Sedeng boeat minta Pamerentah kirim sadja goeroe-goeroe-sekola jang tergadji oleh negri aken kasi pladjaran bahasa Olanda, ilmoe-boemi dan ilmoe itoeng pada moerid-moerid klas tinggi di dalem sekola T.H.H.K., seperti jang ada termaksoed pada bab c, djoega tida bersetoedjoeh sama maksoednya Pamerentah, sebab sekolanja T.H.H.K. tida bisa trim a banjak moerid.

Achir-achir soeda dipikir, baek diminta sadja hal jang ada terseboet di bab a.

Aken tetapi lantas soeda di-inget, bahoea sekola-sekola Gouvernement melinken maoe trim a sadja anak-anak jang soeda mengarti sedikit bahasa Olanda dan tida maoe trim a anak-anak jang soeda beroemoer 16 taon, hingga ada sangkoetan bagi halnja bab a itoe.

Toean Kan Hok Hoei, Commissaris T.H.H.K., soeda bri pikiran, soepaja bisa linjapken sangkoetan jang ada dalem halnja bab a dan bisa menjampeken maksoednya Pamerentah, baek diminta djoega Gouvernement kasi subsidie pada perkoempoelan Tiong Hoa Hwe Koan dan sebaginjia seberapa jang ada perloe boeat gadjinja satoe goeroe Olanda dan ongkos-ongkos goenjanja; biar anak-anak jang masih di bawah oemoer dan hendak masoek ka dalem sekola Gouvernement, tapi belon mengarti bahasa Olanda, boleh berladjar lebih doeloe di dalem sekola-sekolanja itoe perkoempoelan-perkoempoelan, sedeng moerid-moerid jang soeda liwat oemoer, boleh dapat pladjaran bahasa Olanda, ilmoe-boemi dan ilmoe-itoeng di sitoe, jalah pladjaran-pladjaran jang dirasa ada bergenra boeat dipake dalem hal berdagang dan pentjarian.

President ada moefaket dengen ini, maka ia minta lid-lid kasi soeara, tapi Secretaris, toean Tan Kim Bo, oendjoek, jang soewal itoe tida ada diseboet di dalem soerat pembrian-taoe jang dikirimken pada lid-lid, hingga lid-lid belon taoe itoe.

Maka sabelonna poengoet soeara Secretaris minta dipoetoesken doeloe, apa itoe lid-lid jang kasi pikiran marika dengen soerat boeat bab a boleh dianggep djoega ada moefaket dengen itoe soewal subsidie atawa tida ?

Dengen menoeroet semoea soeara Perhimpoenan telah memoetoesken „boleh dianggep begitoe”.

Kamoedian President minta kombali lid-lid kasi soeara boeat soewal soeratna Directeur van Onderwijs, Eeredienst en Nijverheid itoe.

Banjak dari lid-lid jang berhadir ada setoedjoeh dengen pikirannja toean Kan Hok Hoei, maka dengen menoeroet soeara jang banjakan dan dengen merobah poetaesannja Sidang Loear-biasa dari Kaoem Pengeroes T. H. H. K. pada 11 Kauwgwee 2457 (28 October 1906), tentang hal ini Perhimpoenan-Besar telah memoetoesken :

Minta Gouvernement trim a dengen gampang anak-anak Tionghoa di dalem sekola-sekola Gouvernement di Hindia Nederland ini dengen menoeroet peratoeran dan pembajaran jang dilakoe-ken pada bangsa Europa, sedeng pada perkoempoelan-perkoempoelan T.H.H.K. dan sebaginjia dibriken subsidie seberapa jang ada perloe boeat bajar gadjinja satoe goeroe Olanda dan ongkos-ongkos aken kasi pladjaran bahasa Olanda, ilmoe-boemi dan ilmoe-itoeng pada moerid-moerid klas tinggi di dalem sekola-sekolanja perkoempoelan-perkoempoelan itoe, jaitoelah dari sebab sekola-sekola Gouvernement melaenken soeka trim a anak-anak jang soeda mengarti sedikit bahasa Olanda dan djoega toelak anak-anak jang soeda beroemoer 16 taon.

Sebagimana jang kita liat, standpunt T.H.H.K. Batavia terhadep pada soewal jang dimadioeken padanja oleh Directeur van Onderwijs, Eeredienst en Nijverheid ada satoe standpunt jang loeas, jang boekan tjoema didasarken atas kabaekan bagi diri sendiri sadja, hanja ada mengasi liat njata T.H.H.K. poenja mementingken kaperloean onderwijs — di sini onderwijs bahasa Olanda — bagi seantero anak-anak Tionghoa, boekan me-loeloe bagi itoe bagian dari anak-anak Tionghoa jang menoentoet pladjaran di dalem T.H.H.K. poe-



nja sekola. Dari mana kombali orang bisa meliat kainginan dari T.H.H.K. aken bekerdjā boeat kabekannja bangsa Tionghoa saoemoemnja.

Satelah di atas ini permintahan-permintahan masi belon djoega didapetken balesan, toean Phoa Keng Hek telah mengadep audientie pada Z. E. Gouverneur-General J. B. van Heutsz aken oelangken lagi itoe permintahan-permintahan.

Pendirian H.C.S.-H.C.S. di dalem taon 1908 ada djadi kasodahan dari ini soewal meloeasken onderwijs bagi anak-anak Tionghoa jang ada dinginken oleh Gouvernement.

Sekola kapoenjahan perkoempoelan Tionghoa dengan pimpinan orang Europa di itoe waktoe di ini Hindia Nederland djoega ada. Di itoe masa di Amboina perkoempoelan Poi Tik Hak Tong ada poenja satoe sekolahans di bawah pimpinan orang Europa dengan 94 moerid, antara mana ada 46 anak prampoean¹⁾.

Tentang permintahan-permintahannja orang Tionghoa, standpunkt Pamerentah terhadep padé itoe dan pendirian H.C.S. Dr. R. van Diffelen ada toelis di dalem iapoena artikel „Het Onderwijs voor Chinezen“ di dalem tiidschrift „Koloniale Studiën“, December 1936, dalem artikel mana ia pandang soewal onderwijs bagi orang Tionghoa dari djoeroesan Pamerentah, sebagimana itoe penoelis sendiri terangkan, di p. 46 dan 47 sebagai brikoe :

..... Kainginan-kainginannja fihak Tionghoa ternjata ada berbedahan djoega : beberapa ada minta pertoeloengannja Gouvernement boeat sekola-sekola T. H. H. K. jang soeda diberdiriken, baek dengan subsidie maoepoen dengan briken goeroe-goeroe boeat bahasa Olanda; jang laen-laen ada minta dikasi-masoeknja lebih banjak anak Tionghoa di Europeesche School, di dalem ini hal di sekola-sekola speciaal dan Inlandsche scholen. Jang laen lagi ada inginken satoe sekola Gouvernement speciaal boeat orang Tionghoa. T.H.H.K. di Batavia soeda terlebih doeloe minta satoe bagian dari loterij, soepaja dengan ini

¹⁾ Batja: H. Colijn, „Neerlands Indië“, Tweede Deel, bagian „Het Onderwijs in Ned.-Indië“ oleh Mr. J. H. Abendanon, Amsterdam 1912, p. 281. Gambar dari Poi Tek Hak Tong ada di p. 280.

bisa diongkosken satoe Europeesch-Chineesche school, jaitoe satoe sekolahans dengen bahasa Tionghoa dan djoega dengen bahasa Olanda. Tapi Pamerentah toelak ini permintahan toendjangan dan ambil poetoesan boeat saoemcemnja oeroes sendiri onderwijs boeat orang Tionghoa di ini negri dan tida briken toendjangan pada sekola-sekola T.H.H.K. jang soeda ada.

„Dengen ini dengen sedar Ia boeang itoe pikiran, bahoea onderwijs boeat ini golongan pendoe-doek sabagian ada terdjoeroes pada Tiongkok ; dengen mengikoti advies dari Prof. Snouck Hurgronje, Ia trima-baek sebagai garisan-berlakoe, bahoea iapoena penjampoeran-tangan dengen perboeatan di dalem ini soewal moesti berwates pada onderwijs, jang dengen pasti ada terdjoeroes pada Hindia Nederland sendiri. Onderwijs Tionghoa specifiek aken diperlakoeken dengen manis, tapi tida nanti bisa mempoenjai hak di atas toendjangan dengen perboeatan, biarpoen di dalem sekola-sekola demikian ada dibriken djoega pladjaran di dalem bahasa Olanda.

„Gouvernement djadi aken berdiriken sendiri sekola-sekola dan dari bermoela soeda pasti, bahoea di dalem ini sekola-sekola pladjaran di dalem bahasa Olanda aken djadi bagian jang penting dari pladjaran.“

Bagi Tiabang-tjabang T.H.H.K. di laen-laen tempat itoe waktoe soewal mengadaken pladjaran bahasa Olanda boleh dibilang ada djadi satoe soewal jang actueel.

T.H.H.K. Hoen Kiok Indramajoe kabarken dengan soerat pada tanggal 21 October 1907, bahoea di sekolahans Hoen Kiok itoe hendak dipakerdijken satoe nona Olanda boeat djadi goeroe dalem pakerdjhahan-tangan dan sedikit bahasa Olanda, boeat mana itoe Hoen Kiok ada minta perkenannja Kaoem Pengeroes T.H.H.K. Batavia, jang briken itoe perkenan.

Pada 11 Januari 1909 Kaoem Pengeroes T.H. H.K. Batavia ada bitjaraken soeratnja Assistent-Resident Batavia tertanggal 17 December 1908, dengen apa ada diminta T.H.H.K. toeloeng tjari



taoe dan membi kabar pada sabelonnja tanggal 15 Januari 1909, brapa banjak moerid kira-kira boleh didapet lagi boeat ditempatken di sekola baroe, jang hendak diberdiriken oleh Gouvernement.

Berhoeboeng dengen ini, dengen moefaketnja President, Secretaris soeda selebarken 4000 lembar circulaire di antara pendoedoek Tionghoa di residentie Batavia, aken minta orang jang ingin masoeken anaknja ka dalem itoe sekola baroe, jaitoe H. C. S., lekas bri-taoe kahendakannja itoe pada T.H.H.K.

Djadi T.H.H.K. Batavia poen ada membantoe tjariken moerid boeat sekola jang diberdiriken oleh Gouvernement. Ini kombali oendjoek sifatnja Tiong Hoa Hwe Koan sebagi satoe perkoem-poelan oemoem, jang dengen tjara demikian telah bekerdjā boeat kaperloean onderwijs oemoem, boekan meloeloe onderwijs bahasa Tionghoa, bagi semoea anak-anak Tionghoa.

Menoeroet soeratnja T.H.H.K. Hoen Kiok Soemedang dd. 10 Juni 1909, Assistent-Resident di Soemedang ada menanja pada Hoen Kiok itoe, apa Hoen Kiok itoe soeka di Soemedang diadaken Hollandsch-Chineesche School, atawa kaloe tida, apa Hoen Kiok soeka trimā pembrian subsidie dari Gouvernement tiap-tiap boelan kira-kira f 85.— aken goena kas T.H.H.K. Hoen Kiok Soemedang? Boedt mendjawab ini pertanjahan-pertanjahan Bestuur Hoen Kiok Soemedang telah minta adviesnja Kaoem Pengeroes T.H.H.K. Batavia, jang pada 18 Juli 1909 briken pikiran, soepaja di dalem oeroesan berdiriken H.C.S. di Soemedang Pamerentah tanjaken pendoedoek-pendoedoek Tionghoa di sana, sedeng hal pembrian subsidie dari Gouvernement boleh ditrima, tapi zonder disertaken perdjandjian apa-apa.

Satoe boelan sabelonnja itoe poen T.H.H.K. Hoen Kiok Pangkal-Pinang ada mewartaken antara laen-laen pada T.H.H.K. Batavia, bahoea kbarnja Gouvernement hendak kasi subsidie boeat sekola di sana jang belon tetep brapa besarnja, dan Kaoem Pengeroes T.H.H.K. Batavia diminta pikirannja, pembrian itoe baek ditrima atawa tida. Djawaban Kaoem Pengeroes T. H. H. K. Batavia, menoeroet poetoesan vergadering dd. 6 Juni 1909, adalah, menanja lebih doeloe pada Hoen Kiok itoe, boeat sekola apa subsidie itoe hendak dikasi.

Ampat taon kamoedian T.H.H.K. Batavia kombali hadepkēn soewal onderwijs bahasa Olanda, jaitoe di waktoe T.H.H.K. ini ada poenja Sekola-Tengah. Dengan poetoesan Bestuur dd. 29 December 1913, atas permintahannja bebrapa orang, di dalem itoe Tiong Hak Tong ada diadjar bahasa Olanda.

Di dalem taon 1914 T.H.H.K. Batavia ada trimā soeratnja toean Tan Tjin Soei di Siaoe, jang pake tanggal 22 April 1914, dengen mana itoe toean minta T.H.H.K. Batavia soeka akeoh Tjabang pada perkoempoelan di Liroeng jang hendak dibri nama „Holan Tiong Hoa Hak Tong — Liroeng” dan boeka sekola boeat adjar bahasa Olanda pada anak-anak Tionghoa dan laen-laen bangsa dengan adaken atoeran sendiri, sebagimana jang ternjata dari Notulen No. 1 dari vergadering orang-orang Tionghoa di Liroeng jang dibikin di roemahnja toean Tan Tjin Soei dd. 6 Februari 1914.

Kerna sifatnja itoe sekola ada laen dari pada sekola T.H.H.K., maka pada 25 Mei 1914 dipotoesken oleh T.H.H.K. Batavia aken kasi pikiran pada toean Tan Tjin Soei, apabila maksoednja itoe sekola tida bisa dirobah, baeklah sekola itoe didjadiken sadja sekola particulier di bawah pengeroesannja iapoenna perkoempoelan di Liroeng.

VII

AFDEELING B DAN AFDEELING F.

*T*AON ka-6 dari T.H.H.K. dimoelai bagi Afdeeling B dengan dibilitarakenja soeratnja toean Lie Tje Siang, itoe koetika agent T.H.H.K. di Fort-de-Kock, dengan mana toean Lie minta dikirimken satoe kwanpwhe, seperti jang telah dikirim pada agent T.H.H.K. di Padang. Ini permitahan diloeloesken pada 8 Januari 1905, dan ditetepken aken kirimken toean Lie satoe kwanpwhe saharga f 85.—.

Satoe hal penting jang berhoeboeng dengan prikasehatan orang-orang jang hendak masoek djadi lid Afdeeling B telah kadjadian di dalam taon 1905.

Panerimahan lid-lid Afdeeling B ada kadjadian, pada sasoedanja kasehatannja orang-orang jang hendak masoek lid itoe dipreksa oleh sihak T.H.H.K., maskipoen betoel papreksahan itoe boekan ada papreksahan thabib, hanja T.H.H.K. merasa tjoekoep, kaloe kasehatannja candidaat lid itoe soeda disaksiken oleh orang T.H.H.K.

Ditrimanja toean Tjioe Kong Yauw menjadi lid Afd. B soeda membuat di dalam vergadering tanggal 21 Mei 1905 moesti ditimbang lagi, apa itoe panerimahan ada sah, oleh kerna beberapa orang telah menjataken pada Bestuur, bahoea toean Tjioe ada berpenjakitan, dan sakitnya soeda lama, hingga menoeroet ajat 3 fatsal 4 dari Pertambahan Pertama Statuten T.H.H.K. ia tida boleh ditrima djadi lid Afd. B.

Maka Secretaris atas namanja Kaoem Pengeroes soeda minta toean Tjioe dateng di dalam itoe perhimpoenan, soepaja boleh diliat dan ditimbang oleh lid-lid Bestuur, apa betoel ia ada berpenjakitan.

Bestuur ada beranggepan dengen memandang pada roepa dan soearanja toean Tjioe Kong Yauw, bahoea dirasa bener toean Tjioe ada mempoenjai penjakit berat, jang soeda lama dikandoeng olehnya.

Kaoem Pengeroes laloe poetoesken, dengen ongkosnja T.H.H.K. toean Tjioe nanti dipreksa oleh satoe thabib Europa, jang moesti menjataken dengan soerat menoeroet anggepanja soeda brapa lama itoe toean ada dapat itoe penjakit. Djikaloe thabib itoe njataken toean Tjioe soeda lebih dari 8 boelan ada kandoeng itoe penjakit, ia moesti lantas dikaloearken dari Afd. B dan dimasoeken djadi lid Afd. A, sedeng oewang entree dan laen-laen jang soeda dibajar olehnya pada T.H.H.K. aken tinggal djadi poenjanja ini perkoempoelan. Tetapi djika thabib rasa, toean Tjioe Kong Yauw itoe belon 8 boelan dapat itoe penjakit, ia boleh tinggal tetep djadi lid Afd. B.

Toean Tjioe laloe dipreksa oleh Dr. Sypkens Brouwers, dan ini thabib tida bisa briken katerangan, apa ia baroe dapat itoe penjakit atawa soeda lebih dari 8 boelan. Berhoeboeng dengan itoe maka pada 4 Juni 1905 Bestuur wadjibken toean Tjioe kasi dirinja dipreksa lagi sakali oleh laen thabib Europa atas ongkosnja T.H.H.K. Ini kali jang lakoeken papreksahan ada Dr. Moltzer. Ini dokter poen tida bisa menjataken dengan pasti, soeda brapa lama toean Tjioe dapat itoe penjakit. Dengan adanja ini, maka pada 22 Juni 1905 Bestuur poetoesken aken tetepken toean Tjioe djadi lid Afd. B sabegitoe lama ia pegang betoel kawadjibannja.

RIWAJAT 40 TAON



T. H. H. K. BATAVIA

Roepanja berhoeboeng dengen ini soewal kasehatan candidaat lid Afd. B, pada tanggal 4 Juni 1905 ada dibilitarkan 3 voorstel dari President, jang satoe antaranja adalah tentang orang jang maoe masoek djadi lid Afd. B moesti kasi kasaksian dengen certificaat dokter Europa tentang hal kawarasannja. Doea voorstelnja jang laen adalah tentang pembajaran oewang entree dan tentang tida oesah wartaken lagi namanja orang-orang jang hendak masoek djadi lid Afd. B di dalem courant-courant Tionghoa-Melajoe, oleh kerna telah ternjata, bahoea hal itoe tida diopenken oleh lid-lid T.H.H.K., hingga T.H.H.K. moesti ilang banjak tempo aken toelis itoe nama-nama dan djoega membikin courant-courant djadi ilang banjak halaman. Ini voorstel jang terseboet blakangan telah ditrima-baek, samentara dengen doeae jang laen poen Bestuur moefaket, berhoeboeng dengen mana diambil poetaesan boeat robah peratoeran Afd. B, dengen diangkat satoe commissie jang terdiri dari toeanc-toean Lie Kim Hok, oud-Commissaris, Tan Tjong Long, Lim Tjieng Siang, Oey Han Seng dan Tan Kim Bo.

Orang tentoe ingin taoe, bagimana anggepan Bestuur terhadep pada orang pramroeple hamil jang minta djadi lid Afd. B ?

Poetaesan Bestuur pada 30 Juli 1905 ada oendjoek standpunkt Kaoem Pengeroes terhadep pada ini dengen njata. Di dalem vergadering itoe tanggal telah dibilitarkan permintahannja njonja Tee Gan Nio, jang sedeng doedoek peroet, boeat djadi lid Afd. B. Ini permintahan telah diloloesken, oleh kerna hamil tida dipandang seperti penjakin.

Rentjana perobahan peratoeran Afdeeling B telah dimadjoeken di dalem sidang Kaoem Pengeroes dd. 25 October 1905, dengen mana namanja itoe peratoeran poen dirobah. Sedeng doeloe itoe peratoeran diseboet „Pertambahan Pertama dari Statuten T.H.H.K. di Batavia”, dengen toeroet itoe rentjana perobahan namanja selandjoetnja aken djadi „Peratoeran Afdeeling B dari T.H.H.K. di Batavia”.

Perobahan peratoeran Afdeeling B telah ditrima-baek pada sasoedanja diadaken doeae Buitenge-

wone Algemeene Ledenvergadering, jaitoe pada 25 November 1905 dan 18 Januari 1906.

Tapi itoe peratoeran baroe tida ada wadjibken candidaat-candidaat lid oendjoeki keterangan thabib tentang kasehatan marika. Tjoema sadja ajat 1 dari fatsal 4, jang ada berhoeboeng dengen ini oeroesan dirobah djadi: „Sasoeatoe orang jang minta djadi lid Afd. B moesti membre kasaksian, bahoea kawarasan badannja ada baek. Ini kasaksian moesti dibri dengen soerat-keterangan jang tertanda oleh tiga lid Tiong Hoa Hwe Koan, atawa tiga orang jang kasaksianja boleh ditrima oleh Kaoem Pengeroes Tiong Hoa Hwe Koan, atawa dengen satoe certificaat dari dokter Europa”.

Itoe waktee kamadjoeannja Afd. B ada besar sekali. Saban boelan banjaknja lid-lid baroe jang ditrima ada bilang poeloe.

Jang ditrima djadi lid ada orang-orang dengen oemoer paling toea 55 taon.

Ini telah membikin 20 lid T.H.H.K. di bilangan Pasar-Senen, Weltevreden, menoelis soerat minta Kaoem Pengeroes adaken Perhimpoenan-Besar Loear-biasa boeat bitjaraken soewal merobah poela peratoerannja Afdeeling B begitoe roepa, hingga orang-orang jang beroemoer lebih dari 55 taon boleh ditrima djadi lid di dalem itoe afdeeling. Pada 13 Mei 1906 Bestuur telah loeloesken itoe permintahan.

Soewal ini laloe dimadjoeken di dalem Perhimpoenan-Besar Loear-biasa pada tanggal 21 Juni 1906, dimana permintahannja itoe 20 lid telah di-toelak.

Peratoeran Afdeeling B kombali dapat perobahan di dalem hal jang mengenaken pembajaran oewang bantoean di dalem Perhimpoenan-Besar Loear-biasa dd. 2 December 1906.

Tapi samentara itoe, soewal trima djoega orang-orang jang soeda beroemoer lebih dari 55 taon di dalem Afdeeling B tetep ada djadi satoe soewal jang anget. Boeat menjokoepi katinginan orang di dalem ini djoeroesan, satoe voorstel jang penting telah dimadjoeken di dalem sidang Bestuur pada tanggal 10 Februari 1907. Itoe voorstel adalah berdiriken satoe afdeeling baroe, jang aken dinamaken Afdeeling F, dengen toe-



djoehan mengadaken fonds oeroesan kamatian boeat lid-lid jang oemoernja soeda lebih dari 55 taon dan lebih djaoeh ambil over fonds dari laen-laen perkoempoelan kamatian.

Ini voorstel telah ditrima-baek. Toean-toean Tan Tjong Long, Oey Han Seng, Lie Kim Hok dan Gouw Peng Liang diangkat djadi commissie aken karang rentjana peratoeran Afdeeling F itoe. Lebih djaoe toean-toean Tan Tjong Long dan Oey Han Seng dioetoes boeat berempoek dengen Kaoem Pengoeroes dari Chineesche Begraafenisfonds Tjoe Hoe Tee Beng dalem hal ambil over kas itoe fonds boeat Afdeeling F.

Kadjadian rentjana peratoeran boeat itoe Afdeeling F dikarang oleh toean Tan Kim Bo.

Peratoeran Afdeeling F telah dibilitarkan di dalem Buitengewone Algemeene Ledenvergadering pada 14 Juli 1907, jang telah trima-baek itoe.

Dengan begitoe telah berdiri Afdeeling F, satoe afdeeling baroe jang nanti trima orang-orang jang soeda beroemoer lebih dari 55 taon, jang kerna soeda beroemoer sabegitoe djadi tida bisa ditrima djadi lid di dalem Afdeeling B.

Pakerdahan T.H.H.K. di dalem hal toeloeng-menoeloeng di dalem oeroesan kamatian dengen begitoe djadi samungkin loeas, dan ini ada berarti satoe kamadjoean poela bagi gerakannja T.H.H.K.

Itoe peratoeran Afdeeling F ditentoeken aken moelai berlakoe pada 1 Tjhitgwee 2458 (9 Augustus 1907), hal mana berarti bahoea Afdeeling F moelai berdiri pada itoe tanggal.

Di dalem itoe Perhimpoenan-Besar Loear-biasa djoega telah diadaken perobahan lagi pada peratoeran Afd. B, jaitoe ajat 2 dari fatsal 2 dirobah, hingga orang jang beroemoer lebih dari 50 taon tida boleh ditrima lagi djadi lid di dalem itoe afdeeling, dengen ditentoeken jang perobahan ini moelai berdjalan pada 21 Lakgwee 2458 (30 Juli 1907).

Tjabang-tjabang T.H.H.K. ada djoega jang hendak berdiriken afdeeling-afdeeling jang sama seperti Afd. B dan Afd. F.

Tjabang T.H.H.K. di Poerbolinggo dengen soerat pada tanggal 2 December 1907 ada minta keterangan, apa Tjabang di sana boleh berdiriken djoega soeatoe afdeeling seperti Afd. B atawa Afd. F dari T.H.H.K. Pada 5 Januari 1908 Bestuur ambil poetaes an briken keterangan pada Tjabang itoe, bahoea itoe afdeeling tida boleh diadaken oleh Tjabang, tapi Tjabang boleh berdiriken soeatoe fonds, jang tida termasoek ka dalam halnja Tjabang, tegesnya itoe fonds moesti berdiri sendiri dengen pake laen nama, tapi djikaloë lid-lid Bestuur dari Tjabang maoe djadi djoega anggota-anggota Kaoem Pengoeroes dari itoe fonds, itoe tida mendjadiken halangan soeatoe apa.

Sasoedanja berdiri kira-kira 1 taon, dengen poetaesannya Perhimpoenan-Besar Loear-biasa dd. 26 Juli 1908 telah diadaken perobahan pada Peratoeran Afdeeling F, jaitoe pada ajat 1 fatsal 6, jang selandjoenja berboenji sebagai brikoet: „Siapa jang ditrima djadi lid, ia wajib membayar entree pada kasnja ini Afdeeling, menoeroet atoeran jang berikoet di bawah ini: Orang jang oemoernja lebih dari 50 tahun sampe 65 tahun: f 10.—“.

Djoega berbareng dengen itoe telah dirobah ajat 2a fatsal 9 dari Peratoeran Afd. B, jaitoe berhoeboeng dengen penoenggakan lid-lid.

T.H.H.K. poenja Afdeeling B ada terkenal boekan tjoema di Java sadja, hanja djoega di Tanah Sebrang, dimana di banjak tempat T.H.H.K. ada poenja agent-agent boeat itoe Afd. B. Boeat seboet sadja bebrapa antaranja: pada 1 December 1907 telah dibilitarkan pengangkatan agent di Menado, pada 15 September 1908 pengangkatan agent di Priaman, pada 11 Januari 1909 pengangkatan agent di Bandjermasin, pada 9 Mei 1909 agent di Siaoe, 18 Juli agent di Goenoeng Sitoli, 12 September agent di Medan, 5 December 1909 agent di Poelau Tello, dan 18 Juni 1911 agent di Pajacombo.

RIWAJAT 40 TAON



T. H. H. K. BATAVIA

Peratoeran Afdeeling B kombali telah dirobah dengen poe toesan Perhimpoenan Besar dd. 1 Maart 1910 dan 18 Februari 1911. Di dalem ini Algemeene Ledenvergadering jang terseboet bla-kangan poen telah diadaken perobahan pada Peratoeran Afd. F.

Perhimpoenan Besar dd. 8 Maart 1912 telah atoer hakena Beschermheer di dalem Afd. B dan Afd. F.

Samentara itoe, soewal ambil over Chineesche Begraafenisfonds Tjoe Hoe Tee Beng, jang telah di-poe toesken boeat didamiken dengen Kaoem Pe-ngoeroes itoe begraafenisfonds di dalem sidang Bestuur dd. 10 Februari 1907, baroe dibilitarkan poela di dalem Bestuursvergadering 5 October 1912.

Ada dioendjoek di dalem itoe persidangan, bahoea harta-bandanja itoe perkoempoelan ditaksir koerang-lebih ada f 60.000.

Hakena lid-lid, 209 orang banjaknja, jang moesti dibajar pada marika di waktoe meninggal-doenia, ada kira-kira f 29.000.

Laen dari begitoe, itoe lid-lid semoea moesti di-perhitoengken sebagai lid lama dari Afd. B, tapi wajib membajar contributie dan oewang-bantoe-an dengen menoeroet poe toesan Afd. B moelai dari harian marika diambil-over dengen sah oleh T.H.H.K. Apabila kamoadian marika meninggal-doenia dengen tida beroetang, pada marika nanti dibriken oewang bantoean sebagimana jang marika haroes dapat dari Tjoe Hoe Tee Beng sampe di wates ia pinda pada T.H.H.K., dan djoega sabegitoe banjak oewang bantoean lagi menoeroet peratoeran Afd. B dengen dipotong 5% sadja serta ongkos titik soerat-soerat. Aken tetapi, kalo marika alpaken kawadjiban marika pada Afd. B, hingga hak marika di Afd. B djadi ilang, hak jang marika haroes dapat dari Tjoe Hoe Tee Beng tinggal tetep dibajar pada temponja oleh T.H.H.K.

Bestuur moefaket dengen itoe pengambilan-over, jang terlebih djaoe diserahkan pada poe-toesan Algemeene Ledenvergadering T.H.H.K.

Ini pengambilan-over achir-achirnja soeda tida kadjadian.

Dengen soerat dd. 23 December 1912 Kaoem Pe-ngoeroes Tjoe Hoe Tee Beng mengabarken pada T.H.H.K., bahoea Perhimpoenan Besar dari lid-lid-nja itoe perkoempoelan, jang telah diadaken pada 15 December 1912, telah memoetoesken itoe perkoempoelan tida soeka serahken miliknja pada T.H.H.K.

Berhoeboeng dengen iapoenja dijasah pada Afd. B, dengen poe toesannja Bestuur pada 1 Mei 1910 pada toeac Siauw Beng Tjoan, agent di Padang, jang sampe itoe waktoe soeda pegang itoe djabatan 9 taon lamanja dan di bilangan siapa ada 207 lid, dibriken insigne perak jang ada termaksoed di dalem ajat 4 letter a dari fatsal 7 Peratoeran Afdeeling B. Di dalem taon 1913, dengen poe toesannja Bestuur pada tanggal 19 October, toeac Siauw Beng Tjoan digandjarken lagi insigne mas. Berbareng dengen itoe toeac-toeac Tan Kee Siang, agent di Palembang, Lauw Lok Soey, agent di Mr.-Cornelis, dan Phang A Sam, agent di Pasar-Senen, Weltevreden, jang baroe melepas-ken djabatannya, masing-masing dibriken insigne perak.

Oleh President, toeac Phoa Keng Hek, di dalem Perhimpoenan Besar dari lid-lid T.H.H.K., jang te-lah diadaken pada 15 Februari 1914, ada dibriken pemandangan tentang djoembla lid-lid jang soeda dibriken oewang toendjangan di waktoe me-ninggalnya dan tentang djoembla oewang toen-djangan jang dikasiken. Djoega President oen-djoek, bahoea sedeng boeat kamadjoeannja Hak Tong ia kasi poedjian pada toeac Tan Kim San, jang telah bekerja banjak boeat itoe, orang jang telah berdjasah pada Afdeeling B ada toeac Ang Sioe Tjiang, oud-Vice-President, jang ada djadi orang teroetama di dalem hal berdiriken itoe fonds kamafian. Banjaknja lid jang telah dapat oewang toendjangan dan djoembla oewang toendjangan jang telah dikaloearken sampe di itoe waktoe (12 taon) ada sebagai brikoet boeat taon-taon Khong-tjoe :

RIWAJAT 40 TAON



T. H. H. K. BATAVIA

Taon :	Lid :	Djoemblah :	Rata-rata 1 lid:
2453	2	f 89.48	f 44.74
2454	1	" 102.50	" 102.50
2455	6	" 1.677.29	" 279.55
2456	19	" 10.877.05	" 572.48
2457	43	" 20.315.50	" 472.45
2458	27	" 12.423.44	" 460.13
2459	52	" 24.159.36	" 464.60
2460	60	" 28.766.30	" 479.44
2461	52	" 26.162.22	" 503.12
2462	62	" 33.973.14	" 547.95
2463	42	" 23.186.77	" 552.07
2464	51	" 24.614.68	" 482.64
<hr/>			
429	f	206.378.03	
		f 206.378.03	
Rata-rata tiap lid dapat		= f 481.07	
		429	

Banjknja lid-lid Afdeeling A dan Afdeeling B di itoe masa orang bisa bajangken diri sendiri, kaloe orang taoe, bahoea boekoe daftar namanja lid-lid jang diterbitken di dalem taon 1911 ada perloe tida koerang dari 102 pagina aken moeat itoe nama-nama dengan saban pagina moeat 40 nama lebih !

Soewal kreta-mati tida ada dapat perhatian terlaloe besar di dalem kalangan lid-lid Kaoem Pengeroes T.H.H.K. Ini ada ternjata koetika Rijtuig Maatschappij Van IJsendijk dengen soerat tertanggal 15 December 1913 minta keterangan tentang soewal kreta-mati. Pada 29 December 1913 Kaoem Pengeroes telah ambil poeoesan aken kasi pikiran pada itoe peroesahan boeat minta keterangan tentang itoe pada perkoempoelan Kong Boe Siang Hwee di Batavia.

Tiong Hoa Hwe Koan Hoen Kiok Bandoeng ada kabarken pada T.H.H.K. Batavia, bahoea itoe Tjabang hendak adaken Afdeeling Song Soe Hwee. Dengan poeoesan vergadering pada tanggal 23 Februari 1911 pada Tjabang Bandoeng dikasi pikiran aken berdiriken perkoempoelan Song Soe Hwee dengen tida berhoeboeng sama oeroesan atawa pakerdjahannja itoe Tjabang, oleh kerna hal itoe tida ada diseboet di dalem Instructie boeat Tjabang-tjabang.

Sademikian ada gerakan T.H.H.K. di dalem hal toeoloeng-menoeloeng di dalem kasoeschan kamatian selamanja taon-taon ka-6 sampe ka-15 dari berdirinja.

VIII

TIONG HOA HWE KOAN DAN KABOEDAHAHAN TIONGHOA.

D OEA punt jang ada berhoeboeng dengen kaboedajahan (cultuur) Tionghoa ada termasoek di dalem agenda vergadering Kaoem Pengeroes dd. 25 Maart 1905.

Jang pertama adalah permintahannja toean Lie Hin Liam aken T.H.H.K. mengadaken tentoonstelling dari barang-barang soelaman dan sebaginjya hasil pakerdjahannja moerid-moerid prampoean dari Sekola T.H.H.K. dan laen-laen orang prampoean bangsa Tionghoa dengen disediaken tiga premie boeat barang-barang jang bagoes-bagoes, tentoonstelling mana toean Lie voorstel adaken pada hari-lahirnja Khong Tjoe dengen bertempat di roemah perkoempoelan.

Itoe permintahan telah ditrima-baek oleh Bestuur, jang mengidzinken boeat pake oewang ba-njaknja f 500.— dari Kas Afd. A. dengen perdjandjam, djikaloe djadi roegi, dan karoegian ini tida maoe ditrima oleh Perhimpoenan Besar dari lid-lid T.H.H.K., lid-lid Pengeroes jang berhadir di dalem itoe vergadering dd. 25 Maart 1905 nanti ganti karoegian itoe.

Punt jang kadoea ada soeratinja toean-toean Tan Kie Lam dan Tan Tjiaww San, lid-lid T.H.H.K., jang mengasi pikiran, soepaja T.H.H.K. djalanken liest boeat minta orang-orang dagang bangsa Tionghoa toetoep masing-masing poenia toko pada harian Tjeng Beng jang mendatengi aken rajahken hari itoe.

Bestuur moefaket dengen itoe voorstel dan angkat commissie-commissee boeat djalanken liest itoe di bilangan kota Batavia, Pasar-Baroe, Pasar-Senen, Tanah-Abang dan Mr.-Cornelis.

Pada perkoempoelan-perkoempoelan T.H.H.K. dan sebaginjya di laen-laen tempat dan agent-agent T.H.H.K. poen dikirimken soerat aken minta soepaja ia-orang soeka rempoeken di antara orang-orang dagang bangsa Tionghoa di tempat-kadiamán masing-masing boeat toeroet toetoep toko atawa waroeng pada harian Tjeng Beng.

Pada 28 Augustus 1905 Kaoem Pengeroes T.H. H.K. telah njataken hari-lahirnja Khong Tjoe ada 27 Phiegwee. Satoe commissie telah diangkat boeat bawa liest aken minta orang toetoep toko pada itoe hari. T.H.H.K. sendiri tentoe sadja rajahken itoe hari-shedjitnja Khong Tjoe dengen sebagaimana moeslinja dengen gedongnja terhias. Boeat perajahan itoe telah diadaken satoe commissie.

Djoega pada doea taon brikoetnja — taon-taon 1906 dan 1907 — saban-saban T.H.H.K. ada minta orang Tionghoa toetoep toko pada hari-lahirnja Tay Seng Tji Seng Sian Soe Khong Hoe Tjoe. Dimana ada Hoen Kiek, diminta Bestuur Hoen Kiek jang oeroes itoe hal menoetoep toko-toko dan bengkel-bengkel pada hari terseboet.

Koetiika pada 29 September 1908 diadaken Perhimpoenan Loear-biasa dari Kaoem Pengeroes, ongkos jang boleh dikaloearken boeat merajahken hari-lahirnja Khong Tjoe tiap-tiap taon telah dinaekti dari f 25.— mendjadi f 100.— (boeat perajahan 27 Phiegwee 2459, jang dijato pada 22 September 1908, telah dipake ongkos f 90.38), kerna ditimbang T.H.H.K. memang telah diberdiriken boeat menoentoet dan menganoet pengadjarannja Nabi Agoeng Khong Tjoe.



Samentara hari-lahirnja Khong Tjoë ada dirajah-ken, iapoenja hari-wafat tida diperingetken. Sebab-nja orang tida taoe, menoeroet itoengan djeman sekarang, kapan itoe Nabi Agoeng telah wafat. Maka pada 3 Januari 1909 telah diambil poetoesan boeat kirim telegram pada Djawa Hak Boe Tjong Hwe aken minta dikirim rekest pada Madjelis Lee Po di Tiongkok boeat minta keterangan tentang itoe, dan sekalian menanja, apa hari-lahirnja Khong Tjoë betoel djato pada 27 Phewgwee.

Boeat membikin keagoengcnnja kita poenja hari-hari-rajah tida terganggoe toean Tan Kim San pada 23 April 1914 telah madjoeken voorstel, soepaja T.H.H.K. menoelis soerat pada Kong Koan aken minta seberapa boleh tida dibri idzin orang-orang Tionghoa di kota Betawi dan Weltevreden merajahken pesta perangkepan djodo atawa bikin „Hoen Sie” pada hari-wafatnja Khong Tjoë, jaitoe 18 Djiegwee, kerna itoe hari haroes dianggep soetji oleh bangsa Tionghoa. Djoega di harian Tieng Beng poen sabolehnja dilarang orang Tionghoa lakoeken salah-satoe dari itoe doeal hal.

Maksoednja ini permintahan adalah soepaja bisa ada soeatoe katetepan di antara orang-orang Tionghoa, di wakoe kapan ia-orang tida boleh bikin pesta penganten, dan dengan begitoe brangkali hari-bescarnja bangsa Tionghoa bisa djadi terlebih berharga di matanja laen bangsa.

Kaoem Pengeroes T.H.H.K. moefaket dengen itoe voorstel, dan Iste Secretaris diwadjibken hatoerken soerat termaksoed pada Kong Koan.

Buitengewone Bestuursvergadering dd. 28 October 1906 ada bitjaraken soewal menetepken peratoeran tentang perkawinan dan Instructie boeat commissie dari peratoeran itoe menoeroet rentjana jang dikarang oleh toean Tan Kim Bo, Iste Secretaris, dan soeda diperbaeki oleh toean Lie Kim Hok, lid Kie Yoe Seng Kong dari Tiong Hoa Hwe Koan. Peratoeran pernikahan itoe diadaken boeat meringankan hal merajahken perkawinan, jaitoe boeat pernikahan jang dilakoeken di dalem gedong T.H.H.K.

Bisa dioendjoek di sini, bahoea di antara orang-orang jang telah merajahken pernikahan anak atawa familie marika di dalem gedong T.H.H.K.

ada djoega toean-toean Ang Sioe Tjiang dan Tan Hok Tin.

Boeat trimaken soerat-kawin pada toean Lieutenant Khoe A Fan poenja Siotjia vergadering pada tanggal 31 Mei 1907 telah angkat sebagai commissie toean-toean Phoa Keng Hek, Lieutenant Nio Hoey Oen, Lieutenant Lim Soey Seng dan Lieutenant Oey Boen Hoey.

Pada sasoedanja Republiek Tiong Hoa Bin Kok berdiri, Tiong Hoa Hwe Koan kombali ada hadepken soewal peratoeran pernikahan. Jaitoe dengen soerat tertanggal 26 Januari 1912 toean Khouw Kim An, Majoor dari bangsa Tionghoa di Batavia, ada minta pikirannja Tiong Hoa Hwe Koan tentang bagimana baek diaoer soewal perkawinan dari bangsa Tionghoa di Hindia-Olanda, sasoedanja Staatsblad 1911 No. 586 dikaloearken. Menoeroet poetoesannja Bestuursvergadering pada tanggal 4 Februari 1912, pada toean Majoor dibriken penjaoetan, bahoea di itoe koetika T.H. H.K. belon bisa hatoerken pikiran tentang itoe soewal merobah peratoeran pernikahan dan djoega tentang soewal harta poesaka, kerna belon katahoean bagimana adanja atoeran jang nanti dikasi berlakoe di Tiongkok, sasoedanja di sana berdiri pamerentahan baroe.

Di dalem ini periode dari 10 taon soewal perkaboengan tentoe sadja tida terloepot dari pembitjarahan.

Toean Tan Goan Kiat, satoe lid dari T.H.H.K., menanja, apa orang Tionghoa jang soeda kwah tauwtjang dan tida berkaboeng tapi pake sepatoe poeti, tida melanggar atoeran adat-lembaga dari bangsa Tionghoa ? Bestuur, sebagimana ternjata dari poetoesannja pada 20 April 1908, ada moefaket dengen pikirannja toean Khoe Siauw Eng, jang bilang, kaloe orang boleh pake badjoe dan tjelana poeti, kerna apa tida boleh pake djoega sepatoe poeti, jang sama-sama ada teritoeng pakuan ? Laen sekali kaloe orang sedeng berkaboeng tapi pake barang jang berwarna merah, atawa soetra-soetra ; ini ada terlarang dan ada melanggar adat-istiadat dalem hal berkaboeng. Maka Bestuur timbang, sepatoe poeti boleh dipake oleh orang Tionghoa baek di wakoe tida maoe-

RIWAJAT 40 TAON



T. H. H. K. BATAVIA

poen di waktoe lagi berkaboeng, dengen tida langgar atoeran adat-lembaga bangsa Tionghoa.

Boeat meloeloesi permintahannja Redactie dan Administratie „Sin Po” boeat T.H.H.K. angkat commissie aken tentoeken, jang mana dari karangan-karangan pada „Sin Po” tentang hal peratoeran berkaboeng dari bangsa Tionghoa ada jang paling baek, soepaja pada penoelisnja bisa dibriken gandjaran f 100.—, Kaoem Pengeroes T.H.H.K. telah angkat pada 22 Januari 1911 satoe commissie, jang terdiri dari toeantoean Lie Kim Hok, Khoe Siauw Eng, Oey Soan Yoe dan Khoe An Kauw.

Itoe ada berarti, bahoea T.H.H.K. poen ada dihargaken sebagi perkoempoelan cultureel.

Commissie jang tersangkoet telah madjoeken rapportnja tentang itoe rentjana-rentjana jang dirima oleh „Sin Po” pada vergadering Kaoem Pengeroes dd. 7 April 1912, jang ambil poetoesan aken menghatoerken rapport dan karangan-karangan itoe pada Kong Koan boeat minta pertimbangannja ini Madjelis atas pendapetannja itoe commissie.

Apa jang kita toetoerken di atas ini soeda tjoekoep aken mengasi kanjatahan pada kita, bahoea arti kaboodajahan dari T.H.H.K. di itoe koetika ada besar sekali.

IX

TIONG HOA HWE KOAN DAN KAPENTINGAN OEMOEM.

KERNA T.H.H.K. ada satoe perkoempoelan sociaal oemoem, tida poen heran ada dimadjoeken banjak hal-hal jang ada berhoeboeng dengen kapentingan oemoem.

Toean Tjio Ma Tjouw poenja 4 voorstel demikian telah dimitjaraken oleh Kaoem Pengeroes pada 2 April 1905. Itoe voorstel-vorstel adalah :

1. Diriken satoe Societeit.
2. Moehoen pada Pamerentah, soepaja Roemah-sakit Tjina dioeroes oleh T.H.H.K.
3. Minta bebas dari bea verponding boeat roemah perkoempoelan ini menoeroet Staatsblad taon 1886 No. 78, fatsal 2, ajat 4.
4. Minta idzin, soepaja bangsa Tionghoa boleh boeka roemah-obat Olanda (apotheek) boeat briken pertoeloengan pada orang miskin jang ada perloe obat dokter.

Kasoedahan dari pembitjarahan adalah voorstel-vorstel 1, 2 dan 4 tida dimoefaket oleh Kaoem Pengeroes, samentara boeat oeroes hal jang terseboet di angkah 3 diangkat satoe commissie, jang terdiri dari toean-toean Lie Hin Liam dan Kan Hok Hoey, itoe koetika oud-Commissaris dan Commissaris dari T.H.H.K.

Pada 22 Juni 1905 ada dimitjaraken pertanjahan-na T.H.H.K. Semarang, apa T.H.H.K. Batavia soek ateroet atawa tida aken kirim telegram pada Minister Oeroesan Loear-Negri di Peking meminta ini Minister djangan teeken contract jang dikarang oleh Pamerentah Amerika Sariket tentang mela-rang orang Tionghoa masoek di Amerika Sariket dan djaduhan-djaduhannja, menoeroet tjonto te-

legram jang T.H.H.K. Semarang ada kirim pada T.H.H.K. Batavia.

Bestuur T.H.H.K. Batavia moefaket, dan begitoe-lah ditentoeken, bahoea itoe telegram aken dikirim pada esokan harinja.

Persidangan Bestuur pada 20 Augustus 1905 telah trima-baek voorstel President aken ambil over pakerdijahan „Roode Kruis Tjina” dari Hoa Siang In Kick di Batavia.

Berhoeboeng dengen satoe bahaja-api di Buitenzorg, T.H.H.K. telah poengoet oewang oeroenan boeat dibagi-bagi pada orang-orang Tionghoa di itoe tempat jang telah terbakar masing-masing poenja roemah. Boeat bagi-bagi itoe oewang, pada 28 Augustus 1905 Kaoem Pengeroes telah angkat satoe commissie, jang terdiri dari toean-toean Oey Koen Le dan Lim Tjeng Siang. Ini commissie moesti pergi ka Buitenzorg dan tjari-taoe pada toean Tjie Tjin Hoay, bagimana moesti dibagi-bagi itoe oewang oeroenan.

Ini roepaanja telah membikin tertijpta T.H.H.K. poenja „Fonds Roemah Angoes”. Tentang ini Fonds ada diseboet di dalem Notulen 130 (Bestuursvergadering 20 Mei 1906), bahoea boeat rombak roemah-roemah petak T.H.H.K. jang pernanja di seblah kanan roemah perkoempoelan boleh dipake oewang dari „Fonds Roemah Angoes”, dan kaloe perloe boleh pake djoega oewangnia Afdeeling E.

Boeat meloeasken pengatahoean publiek, pada 31 Mei 1907 telah diambil poeolesan boeat oendang toean Khouw Oen Giok, oud-Vice-President T.H.H.K., bikin lezing di gedong T.H.H.K. tentang

RIWAJAT 40 TAON



T. H. H. K. BATAVIA

ia poenja perdjalanan ka Europa dan laen-laen benoea, dan dengan poetoesan tanggal 24 December 1907 toean Khoe A Fan, Vice-President jang baroe balik dari Tiongkok, aken berpidato tentang perdjalanan dan pendapetannja.

Berhoeboeng dengen kada tengannja kapal-kapal perang dari Tiongkok, jaitoe kapal-kapal perang „Haichi“ dan „Haiyung“ pada 31 Mei 1907 Bestuur telah angkat toean-toean Khoe A Fan, Nio Hoey Oen, Tan Kim San, Thio Sek Lioong dan Kan Hok Hoei mendjadi Comité Penjamboetan, samentara sekola T.H.H.K. boleh ditoetoep tida lebih dari 2 hari.

Dr. A. Wörster dengen soerat tertanggal 23 December 1907 minta T.H.H.K. berdiriken kombali polikliniek aken menoeloeng dengen pertjoemá pada orang-orang miskin jang dapet sakit, dan ia nanti briken pertoeloengan di sitoe zonder bajaran, tjoema ongkos recept obat T.H.H.K. moesti adaken.

Bestuur — poetoesan dd. 5 Januari 1908 — membilang banjak trimá-kasi pada itoe thabib jang ada begitoe baek hati pada bangsa Tionghoa, aken tetapi dengen menjesel T.H.H.K. tida bisa trimá-baek itoe permintahan, kerna (1) T.H.H.K. tida bisa adaken receipt, dan (2) T.H.H.K. tida ada poenja tempat lagi boeat dipake djadi tempatna polikliniek, sebab tempat „Fonds Dokter Amal“ jang doeloe soeda digoenaken boeat kantoor administratie jang dipindaken ka sitoe, kerna kantoor administratie jang doeloe telah didjadiken sekolah.

Bahaja bandir di Kwangtung dan Kwangsi telah membikin perkoempoelan Tjoe Tie Hwee di Canton pada 17 Juli 1908 menoelis soerat pada T.H.H.K., meminta T.H.H.K. bantoe poengoet oewang dermahan aken menoeloeng pada korban-korban jang tida binasa di dalem itoe bintjana alam, jang sering terjadi di Tiongkok. Ini permintahan telah diloeloesken pada 16 Augustus 1908.

Berhoeboeng dengen koendjoengannja toean Ong Kong Kie dari Tiongkok, pada 29 October 1908 telah diambil poetoesan boeat pake oewang kas banjakanja f 150.— boeat ongkos samboet dan anter djalan tetamoe agoeng itoe selama ia ada

di Batavia, pergi ka laen tempat dan dateng kombalii di Batavia. Toean Tan Kim San diangkat dja-di oetoesan aken anter Ong Taidjin pergi ka Buitenzorg aken mengadep audientie pada Z. E. Gouverneur-Generaal.

Gedong T.H.H.K. itoe waktoe soeda banjak kali dipindjem oleh perkoempoelan-perkoempoelan laen atawa orang-orang biasa boeat satoe dan laen kaperloean. Pada 25 October 1905 telah diloeloesken Landbouw Vereeniging pindjem gedong T.H.H.K. boeat mengadaken vergadering, pada 10 April 1909 diperkenankan toean Phe Pin Tjioe yanswat pada saban hari Minggoe sore, pada 28 Augustus 1910 diperkenankan Anglo-Chinese Literary Society pake gedong T.H.H.K. pada saban Djoemahat malem aken adaken pembitjarahan, pada 26 December 1910 Pengeroes Bibliotheek Jwê Soe Sjê dapet perkenan aken pake beberapa locaai dari roemah-sekola T.H.H.K. Batavia boeat sekola-malem dan tempat batja boekoe-boekoe di waktoe malem dan hari Minggoe siang.

Pada 23 April 1911 ditetepken aken tjitak 5000 lembar soerat selebaran tentang ateroran boeat mendjaga diri terhadep pada penjerangan penjait pest menoeroet circulaire dari K.P.M. jang disalin ka dalem bahasa Melajoe oleh toean Lie Kim Hok, jang di itoe koetika ada djadi lid Kie Yoe Seng Kong. Itoe circulaire aken disiarkan teroetama di antara lid-lid dari ini perkoempoelan.

Goena menoeloeng orang-orang jang terlanggar bahaja bandir dan kalaparan di Tiongkok pada 7 April 1912 telah diambil poetoesan aken adaken Opera Derma, jang aken terdiri dari beberapa moerid prampoean dari T.H.H.K. Satoe Comité oentoek itoe telah diangkat dengen toean Khoe A Fan sebagai Voorzitter.

Siotjia-siotjia Tjan Tjian Lie dan Soa Siam Yok, masing-masing goeroe-pembantoe Tjeng-im, minta dibriken sakean procent dari pendapetannja Opera Derma, jang digeraki oleh moerid-moerid prampoean, boeat toeloeng kasnia Boe Poen Hak Tong di Shanghai. Bestuur njataken — poetoesan dd. 7 September 1912 — soeka bagi 20% dari pendapetan bersih. Pada moerid-moerid prampoean dikabarken, bahoea pendapetan itoe



Opera Derma, jang bermoela hendak didermaken pada orang-orang jang terlanggar bintjana di Tiongkok, berhoeboeng dengen kaperloean aken dibriken pada kas T.H.H.K.

Pada 3 Augustus 1912 ada dibilitaraken salinan soeratinja Assistent-Resident Batavia tertanggal 29 Juli 1912, jang dikirim oleh Majoor Tionghoa pada T.H.H.K., dengen mana ada dibri-taoe, bahoea Consul-Generaal Tiongkok jang pertama lagi sedikit hari aken sampe di Batavia aken djalanken djabatannja. Berbareng dengen ini ada dibilitaraken djoega soeratinja Siang Hwee Batavia jang minta T.H.H.K. kirim oetoesan boeat samboet sampenja Consul-Generaal itoe di Tandjong Priok.

Ini Consul-Generaal pertama adalah toeac Soo Rai Chau, Consul-Generaal Tiongkok di Singapore jang diangkat mendjadi Consul-Generaal pertama di Hindia Nederland. Toeac Soo sampe di Batavia bersama iapoenja secretaris, toeac Teng Ting Ying, satoe clerk, satoe tolk dan satoe boedjang pada tanggal 11 Augustus 1912 dengen disamboet dengen rameh oleh orang Tionghoa. Z. E. Gouverneur-Generaal telah trima toeac Soo mengadep audiencie pada tanggal 16 Augustus dan pada itoe hari djoega telah dilakoeken pengadahan Consulaat-Generaal Tiongkok di Batavia di Hotel des Indes, kantoor dari jang mana boeat samentara waktoe ditempatken di G. Holle¹⁾.

Oetoesan T.H.H.K. boeat menjamboet Consul-Generaal Soo di Tandjong-Priok, jang diangkat pada 3 Augustus 1912, ada toeac-toean Tan Hok Tin dan Oey Koen Ie.

Permintaan Soe Po Sah di Batavia soepaja ditonteng pengadahan hari-hari-besar seperti briket : (1) 19 Phegwee 2463, peringatan gerakan Kek Beng, (2) 5 Djiegwee Bin Kok, peringatan Selatan dan Oetara djadi satoe, dan (3) 1 Tjiagwee Bin Kok, peringatan berdirinja Bin Kok, ditrimabaeck oleh T.H.H.K. pada tanggal 7 September 1912. Sebagimana orang liat, ini ada hari-hari besar baroe pada sasoedanja di Tiongkok berdiri Republiek.

¹⁾ Batja : „A brief historical sketch of the Chinese Consulate-General at Batavia”, oleh F. T. Sung, Consul-Generaal Tiongkok di Batavia (1931 - 1937), di dalem „Sin Po Jubileum-Nummer 1910 - 1935”.

Satoe poetoesan penting telah diambil pada 1 Februari 1913. Di dalem Bestuursvergadering itoe tanggal telah dibilitaraken voorstelna toeac Khouw Tjeng An di Laboean boeat ambil poengoetan procent atas pendjoecalan copra di Batavia dengen perantaran agent-agent di sini. Boeat sasoeatoe karoeng nanti dipoengoet 5 cent oleh T.H.H.K. Batavia aken goena soeatoe Fonds jang didiriken sendirian dan jang dibri nama „Fonds Amal Tiong Hoa Hwe Koan Betawi”, jang kamoedian nanti ditentoeken lagi, bagimana oe-wangnja nanti digoenaken. Bestuur moefaket dengen itoe voorstel dan ambil poetoesan aken moelaiken itoe pemoengoetan pada tanggal 15 Februari 1913.

Pada 23 Februari ini oeroesan diroendingken poela, jaitoe boeat menentoeken, bagimana oe-wang itoe „Fonds Amal T.H.H.K. Betawi” nanti digoenaken.

Boeat ini oeroesan Kaoem Pengeroes T.H.H.K. telah minta agent-agent copra sendiri jang bri poetoesan, kerna sebagi fihak jang moesti trima derma dari itoe pendapatan, Kaoem Pengeroes merasa tida pantes tjampoer kasi pertimbangan.

Agent-agent copra, jang memang ada dioendang dateng di itoe vergadering oleh Commissie Fonds Amal jang telah diangkat pada 1 Februari 1913, laloe bikin conferentie di antara kaoem marraka sendiri. Agent-agent copra itoe jang berhadir ada toeac-toean Oey Koen Ie, Tan Tian Soe, Lim Tian Siong, Be Swie Teng, Tan Pia Teng, Oey Giok Lim, Khouw Yong Kie, Tan Kie Lam, Oey Seng Kim wakil toeac Lim Sin Tjiong, Tjan Peng Hong wakil toeac Thio Soey An, Tja Eng Tjan wakil toeac Kho Tjoe Liong, Auw Eng Hoat wakil toeac Lie Kiam Djiang, Tan Hok Tin wakil toeac Lie Geng Lok, dan The Tong Po wakil toeac The Tong Bong. Commissie Fonds Amal ada terdiri dari toeac-toean Oey Koen Ie, Be Swie Teng, Oey Giok Lim dan Tja Eng Tjan dengen dibantoe oleh toeac Tan Tian Soe sebagai Inspecteur.

Sasoeda timbang-menimbang sakean waktoe, conferentie dari agent-agent copra itoe telah me-moetoesken di itoe malem :

RIWAJAT 40 TAON



T. H. H. K. BATAVIA

1. Poengoetan 1 cent jang lebih doeloe soeda didjalanken oleh Hoa Kiauw Tie Yok Hwee di Batavia moelai dari sekarang dihapoesken sama sekali.

2. Oewang toendjangan f 30.— saban boelan jang dibriken pada T.H.H.K. Pandeglang dan honorarium jang dibajar pada toekang poengoet oewang procent, jang doeloean dipikoel oleh Hoa Kiauw Tie Yok Hwee, sekarang ini ditanggoeng oleh kas dari „Fonds Amal T.H.H.K. Betawi”.

3. Dari oewang pendapatan poengoetan 5 cent tiap-tiap boelan nanti dikaloearken doeloe boeat :

Subsidie T.H.H.K. Pandeglang	f 30.—
Honorarium Inspecteur „Fonds Amal”	.. 40.—
Ongkos tjiatik dan porti	.. 5.—
Ongkos administratie	.. 15.—
Djoemblah kira-kira	f 90.—

salebihnya baroe dibagi pada :

T.H.H.K. Batavia	50 %
Hoa Kiauw Tie Yok Hwee Bat.	10 %
Reservefonds „Fonds Amal”	40 %
	100 %.

Pendapatan poengoetan dari satoe boelan ada f 1500.—, dipotong doeloe f 90.—, dan salebihnya f 1410.— baroe dibagi-bagi sebagimana di atas ini.

Oewang boeat Reservefonds oleh Commissie Fonds Amal, jang diserahkan oeroes itoe semoea, moesti dititipken pada satoe bank Europa.

Satoe conferentie kadoea dengen agent-agent copra dan soedagar-soedagar copra di bilangan Bantam telah diadakan pada 27 April 1913 dengen dikapalaken oleh toean Oh Sian Tjeng, Vice-President T.H.H.K. dan Luitenant Tionghoa.

Di dalem itoe conferentie telah dipoetaesken, boeat ambil oewang itoe Fonds dari bank jang moesti teeken cheque adalah salah-satoe Secretaris bersama-sama salah-satoe Kassier dari T.H. H.K. menoeroet peratoeran dari T.H.H.K.

Lebih djaoe antara laen-laen ditetepken di dalem itoe conferentie soewal briken toendjangan oewang pada Hak Tong-Hak Tong di Pandeglang, Menes, Laboean dan Tjilegon, residentie Bantam, jang ada kasi masoek soerat-permintaan pada

Commissie Fonds Amal. Permintaannja itoe 4 sekolah dari bilangan Bantam, dari mana copra jang dikenaken poengoetan boeat Fonds Amal itoe ada dikasi dateng, dilaoesken oleh conferentie, jang poetaesken aken, selama kas Fonds Amal masih mampoe pikoel, briken toendjangan tiap-tiap boelan pada :

Hak Tong Pandeglang	f 40.—
Hak Tong Menes	.. 60.—
Hak Tong Laboean	.. 60.—
Hak Tong Tjilegon	.. 30.—
Totaal	f 190.—

jang nanti dikaloearken dari oewang Reserve, jaite dari itoe 40 % jang bakal dititipken pada bank, dengen ditentoeken lebih djaoe, bahoea itoe oewang toendjangan f 30.— satoe boelan jang masih berdjalan boeat Hak Tong di Pandeglang dihapoesken.

Sebagi Voorzitter Fonds Amal diangkat toean Auw Eng Hoat.

Poen di dalem itoe conferentie dibilitaraken voorstelnja toean Khouw Tjeng An djoega aken poengoet procent atas pendjoealan emping dan tjiptia (pinang katjip). Ini poengoetan ditrima-baek dan aken moelai berlakoe pada harian jang commissie nanti tetepken ; besarnya poengoetan itoe ada 10 cent boeat satoe peti (kas minjak-tanah) emping dan 50 cent boeat satoe karoeng tjiptia, tapi melaenken jang dibawa masoek ka Betawi dari bilangan Bantam sadja.

Di dalem penjiptahan Fonds Amal T.H.H.K. Betawi djadi soedagar-soedagar copra Bantam jang berdjasah.

Poengoetan atas emping kaliatannja tida berhalil banjak, maka pada 29 Juni Kaoem Pengeroes T.H.H.K. kombali telah bitjaraken soewal tjoba madjoeken poela poengoetan emping dengen minta toean Djiauw Koei Yan di Laboean toeloeng moefaketken sama orang-orang jang djoegal emping di bilangan Bantam sebagai wakil dari Commissie Fonds Amal. Begitoelah telah dipoetaesken.

Djoega telah diambil poetaesken aken atoer poengoetan di atas beras, dedak dan gaba, dan lebih djaoe tembako Djawa. Doeä commissie telah diangkat goena itoe di dalem itoe vergadering.



Sebagi tanda soekoor dan pembalesan boedi pada soedagar-soedagar copra dan laen-laen soedagar, jang ada briken toendjangan dengen oewang potongan procent atas pendjoealan copra dan laen-laen barang pada kas Afdeeling Fonds Amal, pada 2 Maart 1914 diambil poatoesan boeat pikocelan Kas Sekola, soedagar-soedagar jang kasi kahasilan paling sedikit f 30.— satoe boelan pada Kas Fonds Amal dapat hak boeat beroleh kabebasan oewang sekola boeat satoe anak sadja.

Kamoedian pada 23 April 1914 toean Lie Hin Liam, Voorzitter Afd. E voorstel, soepaja Afd. E dirangkep dengen Afd. Fonds Amal, tapi commissie Afd. Fonds Amal haroes berichtiar bikin lebih banjak pendapatan oewang-poengoetan atas pendjoealan minjak-tanah dengen diminta djoega bantoeannja laen-laen soedagar minjak-tanah salaeannja firma Soey Hin. Bestuur telah trima-baek itoe voorstel.

Tapi ini pergaboengan telah tida kadjadian, sebab di dalem Jaarlijksche Algemeene Ledenvergadering pada 20 Februari 1915 telah diakoeoh sah pendiriannja Fonds Amal sebagi satoe Afdeeling dari T.H.H.K. dan pendirian ini Afdeeling teranggep soeda moelai pada 15 Februari 1913.

Perang Doenia di Europa jang meletoes di dalem taon 1914 bikin perdagangan copra djadi mandek, dan pengaroehnja ini tentoe sadja djadi dirasaken djoega oleh Fonds Amal, jang memang penghasilannja teroetama ada dari poengoetan atas copra.

Ini telah membikin diadaken satoe Perhimpoenan Loear-biasa oleh Kaoem Pengeroes T.H. H.K. pada 10 Augustus 1914, dalem vergadering mana ada dioendang djoega agent-agent copra di Batavia, Kaoem Pengeroes Hoa Kiauw Tie Yok Hwee, Bestuur Tiong Hoa Hak Tong di Pasar-Senen, dan djoega toean Khouw Tjeng An, soedagar copra di Laboean, jalah jang telah voorstel pengadahan itoe Fonds Amal, dengen telegram. Toean Khouw Tjeng An soeda perloeken dateng berhadlir.

Sasoedanja vergadering diboeka oleh toean Phoa Keng Hek, toean Tan Kim Bo, Iste Secretaris,

laloe toetoerken, bagimana lantaran petjhahnja Perang Besar di Europa di itoe waktoe, perniagaan copra terpaksa djadi brenti, kerna toko-toko bangsa koelit-poeti tida bisa kirim itoe barang dagangan ka negri Barat, hingga poengoetan procent atas pendjoealan copra, jang ada djadi penghasilan jang teroetama dari kas Fonds Amal, poen toeroet djadi brenti, satoe hal jang ada merogiken besar pada Fonds Amal dan menerbitken kasoesahan jang boekan ketjil pada Hak Tong-Hak Tong jang biasa dapat oewang bantoean dari itoe Fonds Amal. Boeat brentiken djoega bantoean pada Hak Tong-Hak Tong dirasaken berat sekali, kerna itoe moesti dibikin dengen mendadak hingga boleh menerbitken kakaloetan pada oeroesannja sekola-sekola itoe. Maka seberapa bisa toendjangan dari Fonds Amal moesti diteroesken, kendati tida bisa begitoe banjak lagi seperti doeloe, soepaja sekola-sekola itoe dapat tempo aken iichtiarken laen djalan boeat toetoep karoegian marika.

Begitoelah soeda dipreksa keadahan oewang reserve dari Fonds Amal, jang di itoe koetika ada berdjoemblaah f 4000.— lebih.

Dengen meliat banjaknya oewang toendjangan jang Fonds Amal biasa briken tiap-tiap boelan pada Hak Tong-Hak Tong, ini perempoekan dengan soedagar-soedagar copra soeda memoetosken, bahoea dari itoe oewang reserve moelai dari boelan Augustus 1914 tiap-tiap boelan nanti dikaloearken f 500.—, salaeannja boeat bajar gadji penggawe dan ongkos administratie.

Dari itoe f 500.— nanti dibriken 50% pada T.H.H.K. Batavia, jang dengen begitoe djadi tjoema dapat saparoh dari apa jang doeloean ia biasa trima. Salebihnya dibagi-bagi di antara laen-laen Hak Tong dengen memake djoega anggaran 50% dari sebagimana jang doeloean marika dapat, sedeng pada Hak Tong, jang doeloean tida tentoe pendapetannja, nanti dibriken sadja seberapa adanja sisah dari f 500.— itoe.

Oewang poengoetan, jang sekarang masih ada sedikit-sedikit, tida boleh diganggoe, hanja moesti dimasoeki seanteronja ka dalem Reserve-fonds

RIWAJAT 40 TAON



T. H. H. K. BATAVIA

dari „Fonds Amal”, soepaja Fonds itoe bisa menahan lamahan.

Dengen atoeran begini ada diharel oewang-nja Fonds Amal paling sedikit bisa menahan 8 boelan. Kaloe perloe itoe oewang reserve boleh dipake sampe abis sama-sekali dan apabila soeda abis, poengoetan procent atas pendjoealan copra belon djoega djadi kombali sebagimana biasa, pembrian bantoean oewang pada Hak Tong-Hak Tong poen lantas dibrentiken doeloe. Sebaliknya apabila dagangan copra soeda djadi rameh kombali seperti doeloe, hingga Fonds Amal bisa dapat poela penghasilan sebagimana dceloe, sabelonnja oewang reserve terpake seanteronja, pada itoe sekola-sekola poen nanti dibriken lagi oewang toendjangan penoeh sebagimana doeloe, sedeng oewang reserve tida boleh diganggoe poela.

Boeat pendirian roemah-sakit anti-opium poen ada diminta toendjangan T.H.H.K., tapi kerna Bestuur sendiri lagi berdaja aken toetoep karoegian saban taon, maka pada 20 Juli 1913 diambil poe-toesan aken toenda itoe.

Vereeniging Insulinde di Semarang pada 10 Juni 1913 ada minta toendjangan boeat berdiriken satoe roemah-penginepan di Soerabaja berhoeboeng dengan sekola Indische Arts jang hendak dibooka di itoe tempat. Kaoem Pengeroes poe-toesken pada 20 Juli 1913 aken serahken toean Phoa Keng Hek, President, bales soeratinja itoe perkoempoeolan dan atoer apa jang perloe sebagimana jang ia rasa baek bagi T.H.H.K. Batavia.

Soewal Burgerlijke Stand bagi bangsa Tionghoa ada djadi satoe antara doeä punt jang diroendingken di dalem Buitengewone Bestuursvergadering dari 31 Tjapgwee Bin Kok II (31 October 1913), jang ada dihadlirken djoega oleh toean Khouw Kim An, Majoor Tionghoa.

Tentang ini soewal Burgerlijke Stand toean Khouw Kim An, sebagai wakil dari Raad Tjina Batavia, ingin minta Kaoem Pengeroes T.H.H.K. poenja pikiran, bagimana adanja pertimbangan Kaoem Pengeroes tentang soewal peratoeran bikin soerat-kawin, pertjerehan kawin, kalahiran dan kamatian, jang Resident Batavia soeda tetepken

dengen besluitinja tertanggal 29 September 1913 No. 19145/6.

Bestuur T.H.H.K. menimbang, itoe peratoeran boleh teranggep baek, hingga tida ada kaberatan aken dilakoeken. Djikaloe kamoedian ternjata moesti diadaken perobahan, biarlah Kong Koan soeka oeroes itoe.

Di dalem ini perhimpoenan djoega telah diam-bil poe-toesan boeat toeroet ambil bagian di dalem perajahan pesta Onafhankelijkheidsfeesten jang nanti diadaken di Java oleh Pamerentah. T.H.H.K. berhoeboeng dengan itoe telah adaken pesta bagi anak-anak-sekolanja pada hari Senen 17 November 1913. Raad Tjina kasi bantoean f 200.— boeat ongkos pesta dan kasi kembang-api prodeo jang berharga f 100.—. Di dalem itoe vergadering djoega ditelepken, T.H.H.K. nanti hatoerken slamat dengen bahasa Tionghoa pada Pamerentah boeat ini Pesta-peringatan Kamerdikahan 100 Taon dari Karadjahan Nederland, soerat mana oleh President dari ini perkoempoeolan nanti ditrimaken pada Resident Batavia aken minta disampeken pada Z. E. Gouverneur-Generaal.

Finanïieel Comite voor de Stichting eener Technische Hoogeschool in N. I. ada kirim soerat pada T.H.H.K. minta T.H.H.K. bantoe siarken circulaire, jang itoe Comite kirimken 25 lembar banjaknja, soepaja maksoed aken berdiriken satoe Technische Hoogeschool di sini bisa kadijian. Menoeroet poe-toesan Kaoem Pengeroes dd. 25 Mei 1914 itoe permintahan diloeloesken dan Secretaris diwadijibken minta lagi sakean banjaknja circulaire jang perloe, kaloe masih ada banjak orang jang maoe dikirimken.

Dengen begitoe T.H.H.K. djadi ada membantoe pada pendirianja itoe Technische Hoogeschool di Bandoeng.

Atas voorstelnja toean Tan Kim San, T.H.H.K. poe-toesken pada 10 Augustus 1914 aken briken satoe Pian dari soerat Tionghoa pada perkoempoeolan Chung Hwa Hui di Amsterdam, kerna perkoempoeolan ini ada bermaksoed baek bagi kamadjoean pladjaran anak-anak bangsa Tionghoa jang ingin toentoet pladjaran di Nederland.

RIWAJAT 40 TAON



T. H. H. K. BATAVIA

Pada achirnja taon 1914 Kaoem Pengeroes T.H.H.K. ada dapt trimā permintahan dari toean Fam Tek Keng, toekang-terbang, dengen soerat tertanggal 9 October 1914, soepaja T.H.H.K. soeka bri toendjangan dalem niatnja aken kasi pertoendjoekan terbang di Betawi dengen minta T.H.H.K. soeka koempoelken oewang oeroenan koerang lebih f 10.000, — sebagai iapoenja ongkos adaken

pertoendjoekan itoe. Ini soewal telah dibitjaraken oleh Bestuur pada 30 October 1914, jang ambil poetoesan boeat kasi-taoe pada itoe toekang-terbang, bahoea di itoe koetika di Europa masih ada perang besar, hingga ada soeker boeat dapet sampeken itoe maksoed, sebab soedagar-soedagar segala bangsa poen ada soesah di dalem hal oewang.

X

PERHATIAN LAEN-LAEN BANGSA.

*P*AKERDJAHAAN dari T.H.H.K. tentoe sadja ada menarik perhatian oemoem, tegesnya djoega dari laen-laen bangsa.

Banjak penoelis Olanda ada seboet T. H. H. K. di dalem boekoe marika, cepama Mr. P. H. Fromberg. Memang siapa jang hendak bitjaraken pergerakan Tionghoa di Hindia-Nederland tida bisa boeat tida seboet namanja T.H.H.K.

Di ini fatsal kita nanti toetoerken apa jang ternjata dari boekoe-boekoe Notulen T.H.H.K. tentang perhatiannja laen-laen bangsa pada ini perkoempoelan, sebagi penambahan dari apa jang di fatsal-fatsal di moeka kita soeda dapet kasempean aken oendjoek, seperti penawaran Dr. de Rochemont (1904) dan Dr. A. Wörster (1907) aken mengadaken poela afdeeling Roemah Dokter Amal.

Di dalem Perhimpoenan Besar Loear-biasa dari lid-lid dd. 18 Januari 1906 ada dibilitjaraken satoe voorstel dari President aken masoeki namanja toeant H. W. Verloop di boekoe daftar lid-lid T.H. H.K. sebagi notaris dari T.H.H.K. Ini voorstel telah ditrima-baek.

Toeant D. F. W. Boes Lutjens, notaris-vendumeester di Banjoemas, dengen soerat tertanggal 22 Augustus 1907 ada minta masoek dijadi lid T.H.H.K.

Ini permintahan oleh Bestuur T.H.H.K. telah dimadjoeken di dalem Jaarlijksche Algemeene Ledenvvergadering dari tanggal 21 Februari 1908, jang telah loeloesken itoe permintahan, dan toeant Boes Lutjens dianggep dijadi lid T.H.H.K. moelai 1 Tjiagwee 2459.

Pada 16 Augustus 1908 T.H.H.K. telah ambil poe-toesan boeat masoeken rekest pada Pamerentah boeat minta toeant H. W. Verloop, notaris dari T. H.H.K., diangkat dijadi notaris di Batavia dengan rekest itoe diminta djoega orang-orang dagang bangsa Tionghoa di Batavia teeken.

Pada 15 September 1908 ada dibilitjaraken soeratinja toeant L. H. W. van Sandick, Controleur B. B., jang itoe koetika berada dengen verlof di 's Gravenhage, jang minta roepa-roepa keterangan pada President dari T.H.H.K.

Boeat briken itoe keterangan-keterangan jang diminta oleh toeant Van Sandick, siapa sama-sekali ada madjoeken 14 pertanjahan, pada itoe tanggal ada diangkat satoe commissie dengen toeant Phoa Keng Hek sebagi Voorzitter dan toeant toeant Kan Hok Hoei, Khouw Kim An (itoe koetika ada pangkoe dijabatan Kapitein der Chinezen), oud-Luitenant Lie Hin Liam, Lie Kim Hok, Tan Tjong Long dan Ang Sioe Tjiang sebagi lid, samentara toeant Tan Kim Bo diangkat dijadi Secretaris dari itoe commissie.

Ini commissie telah madjoeken rentjana djawanban atas pertanjahan-pertanjahan toeant Van Sandick dalem iapoena soerat dd. 1 Augustus 1908 pada Buitengewone Bestuursvergadering jang dia-daken pada tanggal 25 October 1908. Itoe rentjana telah ditrima-baek di dalem itoe persidangan.

Pertanjahan-pertanjahan dari toeant Van Sandick dan djawanban-djawabannja, kerna ada penting dan ada mengoendjoek sifat dan sikep



terhadep pada berbagi-bagi hal dari T.H.H.K., kita brikoetken di bawah ini :

Pertanahan pertama :

Dengan maksoed apa itoe Tiong Hoa Hwe Koan soeda didiriken ?

Djawaban : Tiong Hoa Hwe Koan telah didiriken dengan maksoed aken bikin madjoe hal pengatahoean dan pri-sopan antara orang-orang bangsa Tjina soepaja ija-orang tiada tinggal bodo atawa tinggal berderadjat rendah.

Sebagi keterangan ditambahken lagi lebih djaoe :

Soedah lama sakali memang orang-orang Tjina ada kapingin sama hal itoe, jaitoe bikin madjoe perkara pengatahoean dan pri-sopan. Pri-sopan jang tinggi, telah ada antara bangsa Tjina, se dari belon terlahir ija-orang poenja nabi Khong Hoe Tjoe, jang di dalam temponja soedah perbaeki kaädaänja kitab-kitab adat-lembaga dan lain-lain. Bangsa Tjina melinken misti diboekaken sadja pikirannja, aken djadi terlepas dari kabodoan dan pri kaädaän jang rendah. Inilah jang telah terbitken gerakan aken diriken Tiong Hoa Hwe Koan.

Pertanahan ka-2 :

Dengan daja oepaia bagimana ija hendak dapatken maksoed itoe?

Djawaban : Dengan daja oepaia memcri peladjaran.

Keterangan lebih djaoe :

Kanjataän dari ini penjaoetan bisa dilihat di dalam fatsal 2 dari Statuten „Tiong Hoa Hwe Koan“, jang salinannja ada terlapis di sini. Pada 14—15 taon jang baroe laloe, orang-orang Tjina melinken ada inget perloe peladjari bahasa Olanda boewat bisa djadi madjoe di dalam hal pengataoean. Aken hal pri-sopan poen ada dingat djoega perloe mengenal bahasa Olanda, kerna orang-orang bangsa Tjina di Hindia-Nederland ada hidoe di bawah bendera Olanda. Bangsa Tjina di sini ada taoe, jang orang-orang Olanda tiada soeka lihat orang-orang Tjina mengehal bahasa Olanda, lain sekali dari pada orang-

orang bangsa Inggris, jang ada kalihatan soeka sekali segala orang mengenal bahasanja itoe. Maskipoen ada bagitoe — kombali dengan beringat ada hidoe di bawah bendera Olanda — orang-orang Tjina tiada hilang soekanja aken peladjari bahasa Olanda : bangsa Tjina poen ada ingat maoe mengenal bahasa itoe, b o e k a n soepaia bisa mengomong dengan itoe bahasa pada orang-orang Olanda, pada siapa ija-orang boleh bitjara dengan bahasa Melajoe, hanja ada bergoena boewat perkara perniagaän; sebab segala atceran Gouvernement ada tertolis dalam bahasa Olanda, demikian djoega contract-contract dari hal dagang dan laen-laen. Antara orang-orang Tjina Peranakan sini, soerat Tjina dan bahasa Tjina boleh dibilang ampir terhilang. Ija-orang bitjara dan menoelis dengan bahasa Melajoe, dari-sebab tiada perloeken banjak aken peladjari soerat dan bahasa sendiri, hanja ada soeka sadja aken mengenal bahasa Olanda. Melinken di dalam adat-lembaga, ija-orang ada kentara bangsa Tjina. Aken tetapi, boewat orang Tjina dapat mengenal bahasa Olanda, melinken ada terboeka satoe djalanan jang amat sempit. Melinken sadja orang-orang hartawan — djoega dengan banjak soesah — bisa dapat kasi anak-anaknja masoek di dalem sekolanja Kandjeng Gouvernement jang teratoer baik. Oleh kerna bagitoe, orang-orang Tjina soedah terpaksa ambil lain haloean, lebih lagi kaloe dipikir, sakalipoen ija-orang mengenal bahasa Olanda ija-orang poen tiada nanti bisa menggoenaken banjak bahasa itoe di Hindia ini, lantaran gerakannja bangsa Tjina di sini ada amat sempit kerna peratoeran Chineesche wijk- dan passenstelsel. Banjak onderneming-onderneming dari bangsa Olanda jang soeka pake pegawe bangsa Tjina, dalem kerdjajannja, tetapi banjak dapat halangan lantaran adanja peratoeran Chineesche wijk- dan passenstelsel. Brapa taon jang soedah laloe perkara ini banjak dibilitaraken dalem satoe vergadering dari Soekab. Landbouw-vereeniging, hingga diminta Gouverneur-Generaal poenja pertoeloengan, tetapi Gouverneur-Generaal tiada bisa tjampoer, kerna perkara itoe ada di dalem kwasanja resi-



dent. Sedang bagitoe di laen-laen benoewa baha-sa Olanda koerang terpake, dan boewat mendapat roepa-roepa pengataoean, orang-orang Tjina poen boleh mendapat djoega itoe dengan lantaran peladjari laen bahasa sabelonnja boekoe-boekoe bahasa Europa disalin ka dalam bahasa Tjina. Orang-orang Tjina di Betawi lanies dapat ingatan aken peladjari soerat dan bahasanja bangsa sendiri dan bahasa Inggris. Ija-orang poen ada lihat, bahoewa aken orang jang mengenal doewa bahasa itoe, bila kaloewar dari Djawa, dalam perlajaran 2—3 hari sadja (Straits-Settlements) lantas sabelah boemi ada terboeka aken ija menggoenaken pengataoeannja. Aken tetapi, sasoe dahnya Tiong Hoa Hwe Koan terdiri — kombali dari-sebab ada di bawah bendera Olanda — bestuur dari ini vereeniging soedah maoe adaken djoega sekola Olanda aken goena bangsanja. Tiong Hoa Hwe Koan soedah berichtiar sabrapa bisa dan djoega soedah soerat-menjoerat pada Algemeen Nederlandsch Verbond aken hal itoe. Tapi dengan menjesal hati tida bisa djadi „Tiong Hoa Hwe Koan“ adaken sekola Olanda, kerna ongkosnya ada banjak lebih berat dari pada jang ini Pakoempoelan bisa pikoel, sedeng permoehoenan idzin boewat bikin loterij oewang jang besar, jang kaoentoengannja nanti dipergoenaaken aken sekola jang termaksoed itoe, jang Tiong Hoa Hwe Koan ada minta sadari tanggal 28 Februari 1903, sampe sekarang belon dikaboelken. Satoe tanda orang-orang Tjina jang hidoepl di sini masih ada soeka pada bahasa Olanda, bisa ternjata koetika Gouvernement Hollandsch-Chineesche School dibuka di tanggal 1 Juli 1908, di mana tiada loepoet ada banjak anak-anak orang Tjina masoek bergenroere di dalam sekola itoe.

Pertanjahan ka-3 :

Brapa banjak roemah sekola soedah didiriken oleh Pakoempoelan itoe ?

Djawaban : Pakoempoelan Tiong Hoa Hwe Koan boekan tjoema ada satoe sadja, hanja di dalam poelo Djawa ada ± 50 Pakoempoelan dan ada djoega di loewar poelo Djawa dalam Hin-

dia Nederland, jang masing-masing sadikinjya ada mempoenjai satoe sekola.

Keterangan lebih djaoe :

Kita-orang rasa haroes djoega diterangkan, jang di antara Pakoempoelan-pakoempoelan itoe ada djoega jang pake nama laen dari „Tiong Hoa Hwe Koan“, tapi maksoed dan halcewannja sama sadja satoe dengan laen.

Pertanjahan ka-4 :

Brapa banjak moerid ada berladjar di dalam sekola-sekola itoe? Brapa goeroe ada membri pelajaran, tjara bagimana itoe Pakoempoelan soedah dapat goeroe-goeroe jang perloe itoe, dan pelajaran apatah jang diadjarken di sekola-sekola itoe ?

Djawaban :

Jang sabagimana bestuur Tiong Hoa Hwe Koan Betawi bisa dapat taoe, ada kira-kira 5500 anak-moerid lelaki dan prampoewan jang berladjar dan kira-kira 140 goeroe, jang membri pelajaran dalem sekola-sekola di bilangan poelo Djawa sadja. Pertama kali Tiong Hoa Hwe Koan Betawi, jang terdiri paling moela, dapat pertoeloengan goeroe dari Toewan Dr. Lim Boon Keng di Singapore; kemoedian dari Toewan Kong Yu Wee, jang toeloeng kasi dateng djoega bebrapa goeroe boewat Pakoempoelan-pakoempoelan di laen-laen tempat dalam poelo Djawa, dan sekarang samoewa Pakoempoelan bisa dapat pertoeloengan goeroe dari Hak Boe Tji (Departement van Onderwijs) di Tiongkok. Dalam sekola-sekola diadjar ilmoe soerat dan bahasa Tiong Hoa, ilmoe itoeng, ilmoe boemi, menjanji, baris dan gymnaastiek; tetapi jang terseboet paling blakang belon teratoer betoel. Dalam sekola-sekola vereeniging jang mempoenjai fonds jang tjoekoep, ada dibriken djoega pelajaran ilmoe soerat dan bahasa Inggris, dan kerdjaan tangan pada anak-anak moerid prampoewan.

Keterangan lebih djaoe: Djoemblanja moerid dan goeroe jang terseboet itoe, jaitoe menoeroet pertelaan sampe di achirnja boelan April 1908. Brapa banjaknja moerid dan goeroe poenja djoembla sekarang ini, kita-orang belon bisa dapat ka-



terangan, kerna verslagnja „Djawa Hak Boe Tjong Hwe” (Algemeen Chineesch Verbond), baroe dikaloewarkan di boelan Mei laen tahan.

Pertanjahan ka-5 :

Brapa besarnja oewang sekola jang moerid-moerid bajar ?

Djawaban : Jang membajar kabanjakan antara f 1.— dan f 2.50 ; jang bajar lebih dari f 2.50 ada sadikit sakali. Bagian besar dari djoembla moerid-moerid trima peladjaran gratis.

Keterangan lebih djaoe :

Moerid-moerid jang trima peladjaran gratis dapat djoega boekoe-boekoe prodeo, kerna orang-toewanja ada miskin.

Pertanjahan ka-6 :

Ada brapa banjaknja Lid dari Tiong Hoa Hwe Koan dan brapa besarnja oewang pendapetannja Pakoempoelan itoe ?

Djawaban: Tiong Hoa Hwe Koan Betawi sadja ada poenja lebih dari 5000 Lid, contributienja saboelan f 0.50 saorang. Laen dari pendapetan contributie, jang tiada tjoekoep dipake menoetoep ongkos-ongkos, kas vereeniging terkadang ada dapat djoega toendjangan dari oewang-derma dan oewang-oeroenan.

Keterangan lebih djaoe :

Aken bantoe memikoel ongkos-ongkosnya, „Tiong Hoa Hwe Koan” Betawi telah adaken djoega satoe begrafenisfonds, dari mana bisa terpoengoet sadikit oewang-potongan, tiap kali ada Lid jang meninggal doenia. Tapi „oewang-potongan” ini misti dikoempoel, tiada boleh dipake djikaloe belon dapat perkenannja Algemeene Vergadering.

Pertanjahan ka-7 :

Bagimana kainginannja orang-orang Tjina di poelo Djawa tentang hal kadatengannja orang-orang Tiong Hoa dari Tiong Kok ?

Djawaban : Sampe sekarang orang-orang Tjina di sini blon pikir perkara immigratie.

Keterangan lebih djace:

Toeroet kita-orang poenja pikiran, perkara immigratie baiklah dikasi tinggal sadja bagimana adanja sekarang; kerna orang-orang Tjina Totok jang dateng ka tanah Hindia ini dari negrinja masing-masing toch misti ada orang di sini jang tanggoeng pengidoepannja, hingga Gouvernement tiada dapat banjak soesah, malah ada dapat tambah kahasilan negri, apabila orang-orang itoe soedah ada poenja pentjarian. Poelo Djawa ini masih ada sampe lebar boewat trimi lagi orang-orang asing dateng bertampat di sini, asal sadja kampoeng-kampoeng Tjina ditiadaken. Perkara „het Gele Gevaar” jang orang Europa bagitoe gemari, betoel, sabagimana Toewan Controleur itoe sendiri ada bilang, boewat di Hindia ini ada soewatoe perkara impian sadja.

Pertanjahan ka-8 :

Apa atoeran pas boleh dihapoesken saanteronja ?

Djawaban : Boleh sakali.

Keterangan lebih djaoe :

Kita-orang bilang „boleh sakali”, kerna atoeran pas itoe ada satoe „atoeran jang tiada bergenra, melinken membawa soesah pada bangsa Tjina, terlebih poela pada orang jang baik-baik, jang takoet dapat nama nodai dan dapat perkara sama policie. Orang-orang tiada karoewan (orang-orang dihati), jang tiada takoet dapat nama djelek, banjak langgar atoeran itoe, tapi djarang sakali jang dapat dikatahoei atawa ditangkep oleh policie ! Laen dari itoe, atoeran pas ada dilakoe-ken, atawa didjalanken, toeroet maoenja atawa pahamnja masing-masing kapala negri, toeroet pikirannja sendiri-sendiri ! Tentang ini perkara, saorang jang seboet namanja „Hoa Djin” soedah banjak toelis dalem soerat-kabar „Perniagaan”, jang kita-orang ada kirimken, disini. Bangsa Tjina menoeroet wet, ada disamaken dengan boemi-poëtra. Tapi boemi-poëtra kaloe maoe berpegian, melinken misti ada mempoenjai sadja soerat-keterangan dari kapala kampoengnya, jang ija ada orang dari kapala kampoeng itoe, sedeng orang Tjina ada dirante dengan peratoeran pas, jang patoet diseboet rante besi jang amat berat.

RIWAJAT 40 TAON



T. H. H. K. BATAVIA

jang melinken pantes dijadi bagiannya orang boemian ! Djadi orang Tjina ada disamaken dengan boemi-poëtra melinken di dalam perkara misdrif dan overreding; lain dari pada itoe, apa jang tiada dimistiken pada boemi-poëtra, ada diwadibiken pada bangsa Tjina; hak dan kaloeswasan jang ada dibriken pada boemi-poëtra, tiada dibriken pada bangsa Tjina.

Pertanjahan ka-9 :

Apa kawadjiban aken tinggal di dalam wijk tiada boleh dihilangkan?

Djawaban : Tantoe sakali baek dihapoesken kawadjiban ini, djikaloë Gouvernement tiada kewatir bangsa boemi-poëtra nanti dijadi lebih pintar lantaran bertjampoeran sama bangsa Tjina.

Keterangan lebih djaoe :

Boewat dijadi boekti aken penjaoetan ini, kita-orang hendak mengoendjoek sadja bangsa boemi-poëtra jang tinggal beroemah-tangga di dalam kota, atawa soedah taoe pergi mengoembara. Kitao-orang rasa, jang kaloe ditanja pada kapala-kapala district, nanti ada banjak dari antara ija-orang jang maoe mengakoe, bahoewa bangsa Tjina ada di district-district dan onderdistrict, ada baik dan beroena aken boemi-poëtra; kerna orang-orang Tjina ada bangsa dagang, dan djikaloë ada orang jang bilang tiada bagitoe, itoelah soedah terjadi darisebab kapala-kapala boemi-poëtra ada takoet bilang dengan sabenarnja ija-orang poenja perasaän hati, kerna takoet pada ambtenaar Gouvernement.

Di tanah-tanah pagenoengan, di mana ada orang-orang Tjina, segala barang hoetan jang tiada atawa ampir tiada terpake di itoe tampat, bisa didjadiken doewit oleh boemi-poëtra, dengan djoewal barang-barang itoe pada bangsa Tjina, jang dengan tiada sajang tenaga soeka tjoba la-koeken itoe di laen tampat, di mana ada dirasa olehnya bisa terpake. Kawadjiban aken orang-orang Tjina tinggal terkoeroeng di dalam wijk, tiada sakali ada faedahnja, melinken ada terbitken banjak soesah pada bangsa ini di dalam hal bernia-ga, sedang ija-orang misti membajar padiek berat. Sabalikna djikaloë orang-orang Tjina dilepas

dari itoe kawadjiban jang menjoesahi pada ini satoe kaoem raäjat, jang tiada pantes disoesahi, dan jang sadari doeloe poen ada taoe berdjesa pada negri, sadiek di djaman Oost-Indische Compagnie, banjak tampat sepi nanti boleh djadi rame, banjak desa nanti mendjadi kota, hingga tampat-tampat jang sekarang ada beratsil koeroes, nanti terbitken atsil gemoek aken goena negri. Terlebih poela djika dipikir jang sekarang Gouvernement lagi berichtiar aken adaken sekola-sekola desa goena bangsa boemi-poëtra dan landbouw-credietbank (Gouvernements besluit 8 Nov. 1900 No. 25) (Staatsblad 1905 No. 35) goena kerjaan boemi dan laen-laen dari bangsa boemi-poëtra. Orang Tjina bisa bergaoelan sama boemi-poëtra melinken dalam perkara dagang sadja dan tiada poenja pengaroeh (invloed) lain dari pada oewang, jaitoe membrei harga lebih boewat hatsil boemi jang dioesahaken oleh boemi-poëtra, orang Tjina tiada bisa goenaken pengaroehnya agama pada boemi-poëtra, jang memang ada bertachajoel (fanatisme) dan gampang ditipoe atawa dibikin bodo dengan pengaroehnya agama. Maka dengan memandang pada apa jang terseboet di sini dan pada apa jang telah ditoetoerken pada angka 8 di atasan ini, haroeslah di ingat, bahoewa itoe kawadjiban aken tinggal di dalam wijk, boekan sadja boleh dihilangkan, hanja pantes sakali ditiadaken.

Pertanjahan ka-10 :

Apa tiada baik dipoedijken, soepaia officier-officier Tjina dibri gadji dan djoega dibri padanja kakoe-wasaän memerintah, saperti jang ada terjadi di Borneo-Barat ?

Djawaban : Hal officier-officier Tjina dibri gadji dan dikasi kakoe-wasaän memarentah, haroes sakali dipoedijken, kerna darisebab sekarang ija-orang tiada dibri gadji, melinken boleh dipilih orang-orang jang hartawan sadja.

Keterangan lebih djaoe :

Kabanjakan officier-officier Tjina jang sekarang, boleh dibilang memangkoe itoe djabatan dengan tiada mempoenjai pengataoeän tjoekoep aken mendjalanken djabatannja dengan sampoerna,



tetapi kaloe officier-officier Tjina dibri gadji dan dibri djoega kakwasaän, tantoe banjak orang jang ada kapandean dan jang sekarang tiada ingin djadi officier, soekə melamar dan pegang itoe pakerdjaän negri. Djoega kita-orang rasa, djikaloë officier-officier Tjina soedah digadji dan dibri hak mamerentah, perloe sakalian officier-officier Tjina jang kemoedian hendak dicambil dalam dienst, disaring kapinterannja, teroetama dalam hal adat-istiadat bangsa Tjina: mana jang koe-rang pengartiannja djangan ditrima, soepaia pe-mandangan tentang corps officier-officier Tjina djadi lebih tinggi dan ada berfaedah betoel bagi raajat dan negri, hal jang mana toeroet kita-orang poenja rasa, tantoe ada bersatoedjoe dengan pikirannja Pamerentah Olanda.

Pertanjahan ka-11 :

Apa tida baik diadaken dengan lekas sabrappa boleh satoe oendang-oendang boewat bangsa Tjina di dalam hal burgerlijk dan handelsrecht? Dan apa nanti ada kaberatan apa-apa, kaloe saän-teronja oendang-oendang perkara burgerlijk dan handelsrecht boewat bangsa Europa didjalanken boewat bangsa Tjina, katjoewali familierecht?

Djawaban : Troesa diadaken lagi satoe oendang-oendang laen; baik dilakoeken sadja saän-teronja oendang-oendang Burgerlijk en Handelsrecht boewat bangsa Europa pada bangsa Tjina, katjoewali familierecht, sabagimana jang Toewan Controleur ada bilang dalem soeratinja.

Keterangan lebih djaoe :

Pada bangsa Tjina ada dilakoeken beberapa bagian dari peratoeran burgerlijk dan handelsrecht jang berlakoe bagi bangsa Europa, menoe-roet Staatsblad 1855 No. 79, dalam perkara handelsrecht barangkali saäntero oendang-oendang jang berlakoe pada bangsa Europa ada didjalanken djoega pada bangsa Tjina. Aken tetapi, dalam perkara kadjahatan dan pelanggaran (misdrijf en overtreding) bangsa Tjina dibertaloeki pada wet bangsa boemi-poëtra dan hakim boemi-poëtra, jaitoe: politie-rol jang dikapalai oleh kapala negri, terbantoe oleh djaksə, dan landraad, jang dikapalai oleh President, terbantoe oleh lid-lid

boemi-poëtra. Dalem poelo Djawa tida ada orang bangsa Tjina jang diangkat djadi lid dalem sidang landraad. Dari pada apa jang ditoetoerken di atas ini ada ternjata, jang pada bangsa Tjina ada dilakoeken wet-tjampoeran. Apa djoega jang mendjadiken sebab, maka tjoema beberapa bagian sadja, tida saäntero dari burgerlijk dan handelsrecht bagi bangsa Europa, dilakoeken pada bangsa Tjina, salaenna familierecht?

Oleh-kerna, toeroet kita-orang poenja pikiran, tida ada alesan jang pantes boewat menjawab pertanjaän di atasan ini, maka djoega kita-orang soedah kasi penjaoetan atas Toewan Controleur ampoenja pertanjaän No. 11, „Troesa diadaken lagi satoe oendang-oendang laen”, enz.

Pertanjahan ka-12 :

Apa orang-orang Tjina jang genaturaliseerd djadi bangsa Olanda, bisa hilang kabangsaänja jang doeloe? atawa apa pemerintah Tjina ada tetap pandang marika itoe saperti rahajatnja?

Djawaban : Tentang hal ini kita-orang tida bisa kasi djawaban, kerna kita-orang tiada taoe bagaimana adanja wet di Negri Tjina.

Keterangan lebih djaoe :

Kita-orang tida bisa kasi laen penjaoetan. Tjoema kita-orang bisa bilang sadikit apa orang Tjina jang soedah dapat naturalisatie bisa hilang atawa tiada kabangsaänja jang doeloe, itoe ada bergantoeng pada pikirannja orang itoe sendiri.

Pertanjahan ka-13 :

Brapa banjaknja anak-anak bangsa Tjina jang soedah dikirim ka Tiongkok aken bergenroë; apa pemerintah Tjina membri toeloengan pada marika itoe, dan mengapa Ija bri toeloengan itoe?

(Kerna pertanjahan ini dan djawaban brikoe keterangan-lebih-djaoenja kita soeda koetib di dalem fatsal IV „Pengiriman moerid-moerid ka Nanking”, soeda tjoekoep di sini kita oendjoek sajja pada itoe.)

Pertanjahan ka-14 :

Apa Tiong Hoa Hwe Koan ada berhoeboeng djoega sama lain-lain pakoempoelan di dalam atawa di loewar Ned.-Indië?

RIWAJAT 40 TAON



T. H. H. K. BATAVIA

Djawaban: Pakoempoelan Tiong Hoa Hwe Koan tiada berhoeboeng dengan lain-lain pakoempoelan di loewar Hindia Olanda. Di poelo Djawa Pakoempoelan-pakoempoelan Tiong Hoa Hwe Koan ada berhoeboeng satoe sama lain dalam hal madjoeken peladjaran.

Keterangan lebih djaoe :

Di dalam Hindia Nederland, Pakoempoelan Tiong Hoa Hwe Koan ada poenja perhoeboengan dengan lain-lain Pakoempoelan sasamanja. „Tiong Hoa Hwe Koan” Betawi sendiri sekarang ini ada mempoenjai 15 Tjabang, jaitoe :

Tiong Hoa Hwe Koan di Tanah-Abang (Weltevreden) :

- “ “ Tangerang, Batavia ;
- “ “ Serang, Bantam ;
- “ “ Tjiandjoer, Preanger ;
- “ “ Bandoeng, “ ;
- “ “ Indramajoe, Cheribon ;
- “ “ Poerbolingga, Banjoemas ;
- “ “ Soekaradja, “ ;
- “ “ Banjoemas ;
- “ “ Soemedang ;
- “ “ Tjilatjap ;
- “ “ Poerwokerto ;
- “ “ Bandjermasin, Borneo ;
- “ “ Blinjoe, Banka,
- “ “ Pangkal-Pinang, Banka.

Tjabang-tjabang ini masing-masing ada berdiri sendiri dalam perkara mengadaken dan merawatken fonds, dan sekola, memilih bestuur sendiri, jang oleh Tiong Hoa Hwe Koan Betawi wadjib diperkenanken. Laen dari itoe, aken melakoeken kerdjaännya, itoe Tjabang-tjabang wadjib menoeroet boeninja Instructie jang dibriken padanja dan peratoeran Statuten dari Tiong Hoa Hwe Koan Betawi. Di antara pakoempoelan-pakoempoelan Tiong Hoa Hwe Koan dan laen-laen pakoempoelan jang sah di Djawa, jang bermaksoed sama, jaitoe aken madjoeken peladjaran, ada didiriken satoe Bond jang dibri nama „Djawa Hak Boe Tjong Hwe” (Pakoempoelan Besar dari pakoempoelan-pakoempoelan). Maksoednya Bond ini, aken mengadaken Congres pada saban tahan di Betawi, Semarang atau Soerabaia. Pakoempoelan jang ada djadi Lid dalam „Djawa Hak Boe Tjong Hwe”, kirim satoe atau lebih dari satoe orang saperti wakilnya, aken dateng dalem sidang Congres, boewat membitjarken hal kapentingannja atoeran peladjaran jang dilakoeken dalem sekola-sekolanja masing-

masing Pakoempoelan, menoeroet rapportnja Inspecteur Onderwijs dari Bond, dan laen-laen perkara lagi, jang dirasa perloe. Jang boleh dipilih aken djadi vertegenwoordiger (wakil) dari itoe Pakoempoelan Besar, melinken Pakoempoelan-pakoempoelan Betawi, Semarang atau Soerabaia. Pakoempoelan di laen-laen tampat tiada bisa dipilih djadi wakil dari Bond, kerna pada waktoe ada Congres, tiada bisa trima kadatengannya wakil-wakil dari Lid-lidnja „Djawa Hak Boe Tjong Hwe” itoe. Sasoewatoe lid dari Bond wadjib membajar contributie menoeroet banjaknja goeroe-goeroe dalam sekolanja, dan boewat satoe goeroe misti dibajar pada Bond f 3.— satoe boelan. Sekarang „Djawa Hak Boe Tjong Hwe” lagi berichtiar, aken mengadaken sekola goeroe (kweekschool) di Djawa, soepatia bisa menoeloeng dengan lekas pada Lidnja jang perloe dapat goeroe, kerna aken panggil dateng goeroe dari negri Tjina, ada memakan terlaloe banjak tempo dan blandja. Boewat goena diriken satoe Middelbare School di poelo Djawa ini Ministerie van Onderwijs di Peking soedah djandjiken oewang



20.000 thail perak, sedang boewat pikoel ongkosongkosnja sekola itoe, Radja Moeda Toan Hong di Nanking soeka kasi 6000 thail perak satahon.

Demikian boenjinja itoe rentjana djawaban jang ditrima-baek pada 25 October 1908 dan jang dipoetoesken aken disalin terlebih doeloe ka dalem bahasa Olanda atas ongkos T.H.H.K. dengen honorarium paling besar f 100.—. Toeant Van Sandick lebih djaoe dikasi-taoe, bahoea Bestuur T.H.H.K. tida ada kaberatan boenjinja antero soerat itoe disiarken di antara orang banjak.

Djoega dari fihak Poeta-negri ada didapetken perhatian.

Toeant Radja Sabaroedin, wedana Weltevreden, dengen perantarahannja toeant Han Tjoan Lim ada menanja pada President Tiong Hoa Hwe Koan, apa boleh ia, seperti President Boedi Oetomo, dateng koendjoengi perhimpoenan dari Kaoem Pengeroes. Pada 26 December 1910 Bestuur telah trima-baek itoe permintahan dengen menetepken terlebih djaoe, bahoea nanti dibri

kabar terlebih djaoe pada toeant Radja Sabaroe-din, kapan ia boleh dateng.

Pada 15 October 1911 dibilitjaraken hal menetepken poetoessannja Perhimpoenan-Besar Loear-biasa dari Hoen Kiok di Banjoemas dan Hoen Kiok di Soekaradja, jang telah diadaken masing-masing pada 20 Lakgwee 2462 dan 26 Lakgwee 2462, aken membriken gelaran Kie Yoe Seng Kong pada toeant J. J. Meijer, oud-Beschermheer Tiong Hoa Hwe Koan Hoen Kiok Banjoemas dan Assis-tent-Resident Secretaris pensioen di itoe residentie, jang di itoe waktoe ada berdiam di Nederland. Itoe poetoesan dari Hoen Kiok Banjoemas dan Hoen Kiok Soekaradja telah ditetepken.

Toeant Sech Oemar bin Joesoef Manggoes, Kapitein bangsa Arab di Batavia, dengen perantarahannja Majoor Khouw Kim An ada oendang Bestuur T.H.H.K. hadlirken pesta perdjamoean jang ia adaken pada 3 November 1912 berhoe-boeng dengen medaille mas jang dikoerniaken padanja oleh Pamerentah. Sebagi wakil pada 2 November 1912 telah diangkat toeant-toean Lim Sin Tjong dan Tan Kim Bo.

XI

ROEPA-ROEPA.

KITA moelai dengen menengok ka djoeroesan financien di dalem ini periode dari 10 taon.

Atas voorstelnja toean Lauw Soe Kie, pada 13 Mei 1906 diambil poëtoesan angkat commissie aken djalanken lijt boeat poengoet oewang oeroenan di antara orang Tionghoa goena rombak petak-petak T.H.H.K. dan berdiriken satoe roemah-sekola baroe. Pada laen minggoenja diambil poëtoesan boeat rombak petak-petak itoe dengen oewang dari Fonds Roemah Angoes dan kaloe perloe djoega dari Afd. E.

Buitengewone Ledenvergadering dari tanggal 26 Juli 1908 telah kasi koeasa pada Bestuur aken angkat Iste hypotheek roemah perkoempoelan dari firma Van Buuren & Co., pada siapa itoe roemah perkoempoelan ditaro Iste hypotheek besarnja f 19.000.— sedari dibeli dengen rente 6%, dan lantas gade kombali itoe roemah pada Kong Koan boeat f 18.000.— dengen bcenga 4% dan penjitian f 50.— tiap-tiap boelan, dan oewang sisah meneboes boleh digoenaaken boeat rombak sabagian dari roemah-roemah petak jang di seblah kiri dan berdiriken lagi roemah baroe di sitoe.

Subsidie Kong Koan moelai 1 Januari 1910 ditambah djadi f 400.—

Boeat bantoe pikoel karoegian sekolah, pada 5 December 1909 toean Oey Peng Lin madjoecken voorstel aken minta soedagar-soedagar lada derma 1 cent dari oewang courtage tiap-tiap pikoel lada jang marika beli dengen pertoeloengannja makelaar-makelaar Europa. Goena ini

telah diangkat satoe commissie, jang laen boelan-nja dikoebrahken lagi, oleh kerna commissie berpendapatan, bahoea ichtiaar itoe aken sia-sia sadja.

Laloe toean-toean Tan Kim Say dan Oen Kheng Hian voorstel minta toean-toean-tanah dan penjewah-penjewah-tanah bangsa Tionghoa di Batavia derma 1 cent boeat tiap-tiap pikoel beras kaloearan tanahnja jang terdjoeal, dermahan mana poen ada diminta dari soedagar-soedagar Tionghoa boeat beras jang marika kasi dateng dari laen negri, atawa minta toendjangan tiap-tiap boelan dari orang-orang hartawan dan soedagar-soedagar di Batavia. Voorstel jang pertama telah ditrima-baek (9 Januari 1910).

Satoe tindakan jang lebih mengaloearkan hasil adalah gerakan Opera Derma. Initiatief oentoek ini telah diambil oleh toean-toean Kam Pek San, Tan Som Yam dan Oey Kim Hay, jang pada 11 April 1910 mengabarken pada T.H.H.K., bahoea Opera Derma ada sedia aken boeka pertoendoekan, jang pendapatan-bersihnya, sasoceda di potong 10% boeat Fonds Opera Derma, aken dibriken pada T. H. H. K. Ini pertoendoekan telah kadjadian pada 24 Lakgwee 2461 atawa 30 Juli 1910 di schouwburg Thalia dengen pendapatan-nja kaliatannja besar djoega, sebab di dalem daftar panerimahan taon 2461, jang dimadjoeken pada Jaarlijksche Algemeene Ledenvergadering dd. 18 Februari 1911, ada terdapat post panerimahan Derma besarnja f 13.908,96.



Sadjek itoe waktoe berkali-kali oleh T.H.H.K. sendiri diadaken pertoendjoekan boeat membikin kas bernapas terlebih legah.

Tanggal 3 Juli 1910 ada djadi satoe tanggal jang loear-biasa di dalem hikajatna T. H. H. K. Pada itoe hari toean Lim Tjoe Wie, achliwaris dari toean Lim Liang Boe, kasi liat testamentna toean ini, jang ada briken legaat f 3000.— pada T.H.H.K., jang boleh ditrimaken satoe taon sasoe da meninggalnya toean Lim Liang Boe. Tapi toean Lim Tjoe Wie, dengen menginget T.H.H.K. selaloe perloe oewang, soeda briken dengen lantas itoe oewang f 3000.— Tentang ini di dalem boekoe Notulen ada dimasoeken satoe „Peringatan” dan pada toean Lim Tjoe Wie diminta soeka briken portret ajahnja pada T.H.H.K., jang angkat toean-toean Nio Hoey Oen dan Tan Hok Tin djadi oetoesan-oetoesannja aken pergi trima itoe di gedongnya toean Lim terseboet.

Sebab permintahan adaken loterij oewang besar belon djoega diloeloesken, maka pada 13 Augustus 1911 diambil poetoesan boeat masoeki rekest aken adaken loterij besarnya f 10.000.—. Tapi itoe rekest roepaanja sampe pada permoe-lahan taon 1914 tida ada dimasoeki, sebab pada 23 Maart 1914 atas voorstel toean Phoa Keng Hek, jang oendjoek permintahan mengadaken loterij f 250.000.— tida bisa diharep aken dikar-boelken dengen lekas lantaran masih ada banjak rekest jang soeda dikasi masoek terlebih doeloe dari pada T.H.H.K., rekest itoe ditarik poelang, dan sebagi gantinya dimadjoeken permintahan baroe aken mengadaken loterij oewang besarnya f 10.000, jang kaoentoengannya nanti digoenaken aken berdiriken satoe Kleerenfonds, jang nanti briken pakean dan laen-laen sebaginya pada moerid-moerid miskin dari T.H.H.K.

Satoe voorstel besar brikoet dermahan oewang jang tida koerang besarnya telah dimadjoeken oleh toean Oh Sian Tjeng, Vice-President, dengen soerat tertanggal 23 April 1914 jang dibilitjaraken di dalem vergadering itoe tanggal djoega.

Toean Oh Sian Tjeng voorstel T.H.H.K. berdiriken satoe Fonds dengen kakoeatan f 100.000.— boeat djaga kaperloeannja Hak Tong. Boeat itoe Fonds toean Oh serahken di itoe waktoe f 5000.—, dan apabila itoe Fonds soeda dapet koempoel f 100.000.—, pada itoe satoe ton ia aken tam-bahken lagi f 5000.— !

Bestuur tentoe sadja trima itoe dengen girang sekali. Itoe oewang f 5000.— laloe didjadiken satoe sama oewang-oeroenan f 1000.— pembri-annja toean Yo Soe Kie. Tapi sajang penjiptahan Fonds Satoe Ton itoe soeda tida tertjapei.

Nama Tiong Hoa Hwe Koan soeda perna ada jang goenaken boeat merk dagang. Kaoem Pengeroes telah dapet taoe ini, kerna toean Tan Hok Tin, Commissaris, ada menanja, apa nama Tiong Hoa Hwe Koan boleh dipake oleh toko boeat diboeboehi di atas barang-barang da-gangannja, kerna itoe ada dilakoeken oleh satoe toko Europa, jaitoe N.V. Generale Maatschappij voor den Handel met Ned.-Indië di Batavia, jang soeda mendaftarkan merk itoe pada Raad van Justitie di sini seperti ada ternjata dari satoe advertentie di dalem „Javasche Courant”. Kaoem Pengeroes tentoe sadja djadi kaget, dan pada 24 Maart 1907 telah diangkat toean-toean Lie Hin Liang dan Tan Hok Tin, doeà-doeà Commissaris, aken tjaboet itoe pendaftaran merk Tiong Hoa Hwe Koan pada Raad van Justitie dengen per-toeloengannja advocaat.

Berhoeboeng dengen ini oeroesan pada 16 April 1907 Generale Maatschappij voor den Handel met Ned.-Indië mengabarken dengen soerat pada T.H.H.K., bahoeà merk Tiong Hoa Hwe Koan tida nanti digoenaken lagi olehnja sasoe danja pesenan tjeroetoe 72.000 batang, jang peti-petinja ada pake itoe merk, soeda di-trima cleh itoe toko. Ini tjeroetoe nanti didjoeal pada T.H.H.K., kaloe orang jang pesen itoe barang, jaitoe toean Khouw Lam Tjiang, soeka perkenanken. Apabila barang-barang pesenan-nya soeda dateng semoeà, toko itoe nanti tjaboet merk T. H. H. K. dengen perdjandjian, berbareng dengen itoe merk itoe nanti didaftarkan pada

RIWAJAT 40 TAON



T. H. H. K. BATAVIA

Raad van Justitie oleh ini perkoempoelan. Ini telah ditrima-per-baek oleh fihak T.H.H.K. (21 April 1907).

Inspecteur Wang Fung Chiang ada minta dikasi-taoe pada Z. E. Liok Tay Sien namanja lid-lid Bestuur dan pahalanja marika. Menoeroet poe-toesan Kaoem Pengeroes dd. 12 September 1909 toeantoean Phoa Keng Hek dan Nio Hoey Oen diangkat djadi commissie aken briken itoe katerangan.

Di dalem taon 1912 Dr. Lim Boon Keng ada dateng di Batavia.

Toean-toean Lie Hin Liam dan Tan Hok Tin, dengen poe-toesan Bestuur dd. 9 Juni 1912, telah diangkat djadi oetoesan T.H.H.K. aken samboet kadatengannja Dr. Lim Boon Keng, jang telah banjak membantoe pada T.H.H.K., di Tandjong Priok.

Menoeroet fatsal 3 dari Instructie boeat lid-lid Pengeroes T.H.H.K., di dalem vergadering Kaoem Pengeroes lid-lid Bestuur moesti pake badjoe item.

Boenjinja itoe penetepan telah dirobah pada 10 Februari 1907 mendjadi : „Di dalem sidang Kaoem Pengeroes lid-lid Pengeroes boleh pake badjoe poeti, tapi di dalem perhimpunan besar lid-lid Pengeroes wadhib pake badjoe item”.

Tapi pada 21 April 1907 ditetepken poela, bahoea boeat berhadir di dalem Bestuursvergadering lid-lid Pengeroes moesti pake badjoe item.

Lantaran ini maka Luitenant Lie Hin Liang, Vice-President, jang dateng berhadir di dalem vergadering Kaoem Pengeroes tanggal 2 Mei 1907 dengen pake badjoe poeti dikenaken denda f 2.50.

Di dalem vergadering tanggal 13 December kombalii dimadioeken voorstel aken robah itoe fatsal 3 dari Instructie Lid-lid Pengeroes, soepaja orang

tida oesah hadlirken Bestuursvergadering dengen pake badjoe item poela. Tapi ini voorstel telah ditoelak !

Fihak jang anti pakean item di dalem vergadering Kaoem Pengeroes tida poe-toes harepan. Kombali marika madjoeken itoe soewal, jaitoe di dalem Bestuursvergadering dd. 13 Maart 1910. Ini kali marika dapet kamenangan, sebab itoe fatsal 3 dirobah dan salandjoetna boeat sidang Kaoem Pengeroes lid-lid Pengeroes diwadjibken moesti berpakean dengen sepantesna, tapi boeat Perhimpunan Besar marika tetep moesti pake badjoe item.

Itoe tempo keadahan gedong T.H.H.K. djadi samingkin beroepa sekolah dengen perombakan-perombakan jang dilakoeken dan pembelian pembelian roemah lagi.

Orang-orang jang telah berdjasah pada T.H.H.K. tida dilopeken. Toean-toean Lie Hin Liam diangkat djadi Eerelid (1906), toean Lie Kim Hok dapet insigne Kie Yoe Seng Kong (1906), Dr. Lim Boon Keng poen dapet tingkatan Eerelid (1906), Dr. Lee Teng Hwee idem (1909) dan demikian djoega toean Tan Kim San (1913).

T.H.H.K. poenja Beschermheer jang pertama ada Majoor Tio Tek Ho. Moelai taon 1910 adalah Majoor Khouw Kim An jang pangkoe itoe djabatan sebagai ini perkoempoelan poenja Beschermheer jang kadoea.

Atas pertanjahannja Consul-Generaal Tiongkok, jang minta dikasi tjatetan dari namanja orang-orang jang ada berdjasah di dalem kalangam kong-ek boeat digandjarken bintang-kahormatan oleh Pamerentah Tiongkok, Bestuur ada madjoeken namanja toeantoean Phoa Keng Hek, Kapitein Nio Hoey Oen dan oud-Luitenant Lie Hin Liam.